

MAANDIKO MATAKATIFU YA

KIBAHÁ'Í

**KWA AJILI YA AINA
MPYA YA WATU**

MAANDIKO MATAKATIFU YA

KIBAHÁ'Í

**KWA AJILI YA AINA
MPYA YA WATU**



Yamekusanywa na:
Bodi ya Washauri wa Bara wa Imani ya Kibahá'i
barani Afrika

Uhakiki wa Tafsiri ya Kiswahili na:

Kamati ya Uhakiki ya Kitaifa
ya Baraza la Kiroho la Kitaifa la Wabaha'i wa Tanzania

Kimechapishwa na Kamati ya Vitabu, Uchapishaji na Usambazaji
ya Baraza la Kiroho la Kitaifa la Wabaha'i wa Tanzania
S.L.P. 585, Dar es Salaam, Tanzania.

Simu: +255-769 900 495

+255-685 637 422

Baruapepe: nlpc@bahai.or.tz

Toleo la 2024

ISBN 978-9912-9985-1-3

© ***Baraza la Kiroho la Kitaifa la Wabaha'i wa Tanzania***

YALIYOMO

MATEUZI KUTOKA MAANDIKO MATAKATIFU YA KIBAHÁ'Í

UKURASA

MANENO YA BAHÁ'U'LLÁH

DONDOO KUTOKA KITAB-I-AQDAS.....	1
BUGA KUTOKA MAANDIKO MATAKATIFU YA BAHÁ'U'LLÁH.....	5
HII NDIYO ILE SIKU.....	6
UMOJANAAMANI.....	8
MASHAURI	11
BAADHI YA MANENO YALIYOFICHWA YA BAHÁ'U'LLÁH.....	15

MANENO YA BÁB

KUTOKA HOTUBA YAKE KWA HERUFI ZA WALIOHAI.....	19
KUTOKA MATEUZI YA MAANDIKO YA BÁB.....	19

MANENO YA 'ABDU'L-BAHÁ

KUTOKA MAZUNGUMZO YA PARIS (HEKIMA YA 'ABDU'L- BAHÁ)	22
DONDOO KUTOKA MATEUZI YA MAANDIKO YA 'ABDU'L- BAHÁ	27

AINA MPYA YA WATU

Baadhi ya Sifa za Kibahá'í	34
----------------------------------	----

Kujiepusha na Usengenyaji na Udaku.....	37
Hisani.....	39
Ubikira.....	41
Usafi.....	43
Adabu.....	44
Usawa wa Wanaume na Wanawake.....	46
Furaha.....	48
Ukarimu.....	50
Haki na Usawa.....	52
Elimu.....	56
Utovu wa Chuki	58
Uhuru kutokana na Ukabila.....	60
Upendo na Umoja.....	62
Kiasi.....	66
Huduma.....	68
Kujinyenyekeza kwenye Mapenzi ya Mungu.....	70
Uaminifu.....	72
Ukweli.....	74
Kazi ni Ibada.....	76
Mtazamo dhidi ya Wezi na Uingiaji katika Nyumba Bila Ruhusa.....	78

Kuishi Maisha ya Kibahá'í

Sala.....	80
Mfungo.....	84
Ndoa.....	87

Maisha ya Familia ya Kibahá'í

Upendo na Umoja.....	91
Mume na Mke.....	92
Watoto.....	94
Ndani ya Familia.....	97
Nyumbani.....	100
Uandikaji wa Wasia.....	101
Mazishi ya Kibahá'í	102

Kujiepusha na Pombe na Dawa za Kulevya.....	103
Kujiepusha na Kuombaomba.....	107
Kujizuia na Uchezaji Kamari.....	108
Kujiepusha na Siasa.....	109
Utiifu kwa Serikali.....	112
Kutokuwa Mshiriki katika Mekanisa na Mashirika Mengine ya.....	
Kidini.....	114

WAJIBU WETU KATIKA JUMUIYA YA KIBAHÁ'Í MABARAZA

Baraza la Kiroho la Kitaifa.....	115
Baraza la Kiroho la Mahali.....	116
Ushauriano.....	118
Karamu ya Siku Kumi na Tisa*	121
Mfuko wa Kibahá'í.....	125
Ufundishaji --Baadhi ya Mbinu na Ushauri.....	127
Kujielimisha kwa Kina.....	133
Ufunzaji Watoto.....	135
Kuwahamasisha Vijana*	137

MAREJELEO YA DONDOO KUTOKA MAANDIKO MATAKATIFU YA KIBAHÁ'Í.....	142
--	-----

** Karamu ya Siku Kumi na Tisa ni kwa ajili ya Wabahá'í tu*

“Yeye hutumaini kwamba mtaendelea kuwa Wabahá’í katika tabia vile vile katika imani. Kusudi zima la Baha’u’llah ni kwamba tuwe aina mpya ya watu, watu ambao ni waadilifu, wema, wenye akili, wakweli na wanyofu na ambao huishi kufuatana na sheria Zake kuu zilizowekwa kwa ajii ya kipindi hiki kipya katika maendeleo ya mwanadamu. Kujiita sisi wenyewe Wabahá’í haitoshi, asili yetu ya ndani kabisa lazima iwe bora na iliyoongolewa kwa kuishi maisha ya Kibaha’i.”

(Kutoka barua iliyoandikwa kwa niaba ya Shoghi Effendi, kutoka

Kiingereza, “Excellency in All Things” Compilation, p. 11)

“Kwa kweli kama marafiki wangetafuta, na kujibidiisha wenyewe, kuwa Wabahá’í kwa asilimia mia moja wangeona jinsi mvuto wao kwa wengine ungeongezeka, na jinsi gani Hoja ingeenea kwa haraka zaidi. Ulimwengu hautafuti muafaka, bali mfano halisi wa ubora wa juu unaong’aa. Kadiri marafiki waishivyo kulingana na mafundisho yetu katika kila namna ya maisha yao, majumbani mwao, katika shughuli, katika mahusiano yao ya kijamii, ndivyo mvuto wao utakavyokuwa mkubwa zaidi juu ya mioyo ya wengine.”

*Shoghi Effendi, katika kitabu cha Kiingereza “Living the Life”,
Compilation pg.22*

”Bila moyo wa upendo halisi kwa Baha’u’llah, kwa Imani Yake na Asasi Zake, na waumini mmoja kwa mwingine, Hoja haiwezi kamwe kuingiza idadi kubwa ya watu. Kwa kuwa ulimwengu hauhitaji mahubiri na sheria, bali upendo na vitendo.”

*Shoghi Effendi, katika kitabu cha Kiingereza “Living the Life”,
Compilation pg.31*

“... Vinginevyo na hadi hapo waumini watakapotambua kwa hakika kwamba wao ni familia moja ya kiroho, iliyofumwa pamoja kwa fundo linalodumu zaidi kuliko viungo vya kimwili kamwe viwezavyo kuwa, hawataweza kuleta ile hali nzuri ya kijamii ambayo pekee yaweza kuvutia mioyo ya wanadamu, ambayo imegandishwa kwa ukosefu wa upendo halisi na hisia.”

*(Kutoka barua ilioandikwa kwa niaba ya Shoghi Effendi, kwa
Kiingereza “The Individual and Teaching”, p. 25-26)*

**DONDOO KUTOKA
MAANDIKO
MATAKATIFU
YA KIBAHÁ'Í**

MANENO YA BAHA'U'LLÁH

Dondoo kutoka KITAB-I-AQDAS

Wajibu wa kwanza ulioamriwa na Mungu kwa watumishi Wake ni utambuzi wa Yule Ambaye ndiye Chimbuko la Ufunuo Wake na Chemchemi ya Sheria Zake, Ambaye huwakilisha Uungu katika vyote viwili; Ufalme wa Hoja Yake na ulimwengu wa muumbo. Yeyote atimizaye wajibu huu amefikia mema yote; na yeyote aliyenyimwa hilo amekengeuka, japokuwa awe mwanzilishi wa kila tendo jema. Inampasa kila mmoja afikiaye daraja hili adhimu kabisa, kilele hiki cha utukufu wa juu kabisa, kuzingatia kila agizo la Yule ambaye ndiye Haja ya ulimwengu. Wajibu huu pacha hautenganishiki. Mmoja haukubaliki bila ule mwingine. Hivyo ndivyo ambavyo imeagizwa na Yule Ambaye ndiye Chanzo cha uvuvio Mtakatifu. (1)

Wale ambao Mungu amewajalia umaizi watatambua bila kusita kwamba maagizo yaliyoandikwa na Mungu hufanya njia bora kabisa kwa ajili ya kudumisha utaratibu ulimwenguni na usalama wa watu wake. Yule ambaye huyapa kisogo huhesabiwa miongoni mwa walio duni na wapumbavu. Sisi, kwa kweli, tumewaamuru ninyi kukataa misukumo ya shauku potofu na tamaa zenu ovu, na kutovuka mipaka ambayo Kalamu ya Aliye Juu Kabisa imeiweka, kwa kuwa hizi ndizo pumzi ya uzima kwa vitu vyote vilivyoubwa. Bahari za hekima Takatifu na tamko Takatifu zimeinuka kwa uwezo wa pumzi ya upepo mwanana wa Mwenye Rehema-Zote. Harakieni kunywa funda lenu, Enyi watu wenye ufahamu! Wale ambao wamekiuka Agano la Mungu kwa kuvunja amri Zake, na wamepotoka ghafla, hawa wamekosea vya kusikitisha mno mbele za Mungu, Mwenye-Vyote, Aliye Juu Kabisa. (2)

Sema: Kutoka kwenye sheria Zangu harufu nzuri ya vazi Langu iweze kunuswa, na kwa msaada wake, bendera za Ushindi zitasimikwa kwenye vilele vya juu kabisa. Ulimi wa uwezo Wangu, kutoka mbingu ya utukufu Wangu wenye nguvu zote, umeuambia muumbo Wangu maneno haya: “Tiini amri Zangu kwa ajili ya upendo wa uzuri Wangu.” Ni mwenye furaha yule mpenzi ambaye amevuta manukato matakatifu ya Mpendwa wake Kabisa kutoka maneno haya, yaliyosheheni marashi ya neema

ambayo hakuna ulimi uwezao kuielezea. Kwa uhai Wangu! Yule ambaye amekunywa divai bora ya haki kutoka mikono ya fadhili Yangu yenye baraka tele atazungukia amri Zangu zinazong'aa juu ya Chimbuko la muumbo Wangu. (3)

Wakati wowote sheria Zangu zitokezapo kama jua kwenye mbingu ya tamko Langu, lazima zitiwe na wote kwa uaminifu, hata kama amri Yangu itasababisha mbingu ya kila dini kupasuka vipande vipande. Yeye hufanya apendacho. Yeye huchagua, na hakuna awezaye kuhoji chaguo Lake.

Chochote kile ambacho Yeye, Mpendwa-Kabisa huamuru, hicho ndicho, kwa kweli, kipendwacho. Kwa hili, Yeye Ambaye ni Bwana wa muumbo wote hunishuhudia. Yeyote ambaye amevuta manukato mazuri ya Mwenye Rehema-Zote, na kutambua Chanzo cha tamko hili, ataikaribisha kwa macho yake mwenyewe mishale ya adui, ili kwamba aweze kuthibitisha ukweli wa sheria za Mungu miongoni mwa watu. Heri ni yake yule ambaye amezigeukia, na amefahamu maana ya amri Yake mkataa. (4)

Sema: Msishangilie katika vitu mnavyovimiliki, usiku huu ni vyenu, kesho wengine watavimiliki. Hivyo ndivyo awaonyavyo Yeye Ambaye ndiye Ajuaye-Yote, Afahamuye-Yote. Sema: Je, mnaweza kudai kwamba kile mlichonacho ni cha kudumu au kimesalimika? La! Kwa Mimi Mwenyewe, Mwenye-Rehema-Zote, hamuwezi, ikiwa mu miongoni mwa wale wenye kuhukumu kwa haki. Siku za maisha yenu zaenda mbio kama vile pumzi ya upepo, na fahari yenu yote na utukufu vitakunjwa kama ilivyokuwa fahari na utukufu wa wale waliowatangulia. Tafakarini, Enyi watu! Zilikuwaje siku zenu zilizopita, karne zenu zilizopotea? Ni zenye furaha zile siku ambazo zimewekwa wakfu kwa ajili ya kumbukumbu ya Mungu, na zimebarikiwa zile saa ambazo zimetumiwa katika kumsifu Yeye Ambaye ni Mwenye Hekima-Zote. Kwa uhai Wangu! Si fahari ya wenye nguvu, wala ukwasi wa matajiri, wala hata mamlaka ya waovu, ambavyo vitadumu. Vyote vitaangamia, kwa Neno moja kutoka Kwake. Yeye, kwa kweli, yu Mwenye Nguvu-Zote, Mshurutisha-Vyote, Mwenyezi. (5)

Msiomboleze katika saa zenu za majaribu, wala kushangilia humo; tafuteni Njia ya Kati ambayo ni kunikumbuka Mimi katika mateso yenu na tafakarini juu ya kile ambacho kinaweza kuwasibu siku zijazo. Hivyo ndivyo awajuzavyo Yeye Ambaye ndiye Mwenye Maarifa-Yote, Yeye Ambaye hutambua. (6)

Enyi kundi la watawala! Tegeni sikio kwa kile ambacho kimeinuliwa kutoka Chanzo cha Ukuu. “Kwa kweli, hakuna Mungu mwingine ila Mimi, Bwana wa Neno, Ajuaye-Yote.” Waunganisheni wale waliovunjika kwa mikono ya haki, na mpondeni mkandamizaji ambaye husitawi, kwa fimbo ya amri za Bwana wenu, Muamuru, Mwenye Hekima-Zote. (7)

Sema: Uhuru wa kweli umo katika utiifu wa mtu kwenye amri Zangu, kidogo mlijuavyo hilo. Laiti watu wangetii kile ambacho Sisi tumewatelemshia kutoka Mbingu ya Ufunuo, hakika, wangeufikia uhuru kamili. Ni mwenye furaha yule ambaye ameelewa Kusudi la Mungu katika chochote kile Alichokifunua kutoka Mbingu ya Mapenzi Yake ambacho hupenyeza vitu vyote vilivyoubwa. Sema: Uhuru ambao huwanufaisha ninyi hauptikani popote isipokuwa katika utumishi kamili kwa Mungu, Ukweli wa Milele. Yeyote aliyeonja utamu wake atakataa kubadilishana na milki zote za duniani na mbinguni. (8)

Andamaneni na dini zote kwa urafiki na upatano, ili waweze kuvuta kutoka kwenu, manukato mazuri ya Mungu. Jihadharini isijetokea miongoni mwa watu mwale wa ujinga wa kipumbavu ukawashinda. Vitu vyote huanzia kwa Mungu na Kwake hurejea. Yeye ni chanzo cha vitu vyote na Kwake vitu vyote huishia. (9)

Amebarikiwa yule ambaye amekiri imani yake katika Mungu na katika Ishara Zake, na ametambua kwamba “Yeye hataulizwa juu ya matendo Yake.” Utambuzi kama huo umefanywa na Mungu kuwa pambo la kila imani na msingi wake hasa. Kukubalika kwa kila tendo jema lazima kutegemee juu yake. Kazia macho yako juu yake, ili huenda minong’ono ya waasi isiweze kukusababishia kuteleza. (10)

Mizania ya ulimwengu imevurugwa kupitia nguvu itetemeshayo ya Utaratibu huu mpya wa Ulimwengu, huu mkuu kabisa. Maisha yaliyotengamaa ya mwanadamu yamepinduliwa kupitia utendaji wa Mfumo huu wa kipekee, huu wa ajabu—ambao mfano wake macho ya umauti kamwe hayajapata kushuhudia. (11)

Jizamisheni wenyewe katika bahari ya maneno Yangu, ili muweze kufumbua siri zake, na kugundua lulu zote za hekima zilizofichika katika vina vyake. Jihadharini msiumbe-yumbe katika dhamira yenu ya kuukumbatia ukweli wa Hoja hii—Hoja ambayo kupitia kwayo uwezo wa nguvu ya Mungu umefunuliwa, na mamlaka Yake kusimikwa. Kwa sura zing’azo kwa furaha, harakieni Kwake. Hii ni Imani ya Mungu isiyobadilika, ya milele katika wakati uliopita, ya milele katika wakati ujao. Acha yule aitafutaye, aifikie; na kwa yule aliyekataa kuitafuta—kwa kweli, Mungu ni mwenye kujitosheleza juu ya hitaji lolote la viumbe Vyake. (12)

Sema: Huu ni Mzani usiokosea ambao Mkono wa Mungu unaushikilia, ambamo wote walioko mbinguni na wote waliomo duniani hupimwa, na hatima yao kuamuliwa, kama mkiwa miongoni mwa wale wanaoamini na kuutambua ukweli huu. Sema: Huu ni Ushuhuda Mkuu Kabisa, ambao huo uhalali wa kila ushahidi katika zama zote umewekwa, laiti mngeliweza kuwa na uhakika na hilo. Sema: Kupitia huo masikini wametajirishwa, wasomi wameangaziwa, na watafutaji wamewezeshwa kupanda hadi mbele ya Mungu. Jihadharini msije mkaufanya kuwa chanzo cha mfarakano miongoni mwenu. Mbaki imara kabisa kama mlima usiosogezeka katika Hoja ya Bwana wenu, Mwenye nguvu, Apendaye. (13)

BUGA KUTOKA MAANDIKO YA BAHÁ'U'LLÁH

Na kwa kuwa hapawezi kuwapo mawasiliano ya moja kwa moja kumfungamanisha Mungu mmoja wa kweli na muumbo wake, na hakuna mfano wowote uwezao kuwapo kati ya kile kipitacho na Yule wa Milele, kile cha nasibu na Yule Mkamilifu, Yeye ameamuru kwamba katika kila zama na Kipindi Kitakatifu Roho takatifu na isiyo na mawaa, idhihirishwe katika falme za nchi na mbingu. Kwa huyu mwenye busara, huyu asiyeleezeka na wa kidunia Yeye amempatia asili za aina mbili; ya kimwili, ihusikanayo na ulimwengu wa muumbo, na ya kiroho, ambayo hutokana na asili ya Mungu Mwenyewe. Aidha, Yeye amemjalia daraja la aina mbili. Daraja la kwanza, ambalo linahusiana na uhalisi Wake wa ndani kabisa, humwakilisha Yeye kama Yule Ambaye sauti Yake ni sauti ya Mungu Mwenyewe....daraja la pili ni daraja la kibinadamu, ambalo hubainishwa kwa mfano na aya zifuatazo: “Mimi ni mtu tu kama ninyi.” “Sema, sifa iwe kwa Bwana wangu! Je, Mimi ni zaidi ya mtu, mtume?” (14)

“Kama Mungu angependa, Yeye hakika angewafanya watu wote kuwa jamii moja.” Madhumuni Yake, walakini, ni kuwawezesha wenye roho safi na waliojitenga moyoni, kupaa kwa nguvu zao wenyewe za kiasili, hadi kwenye fuko za Bahari Kuu Kabisa, ili kwa jinsi hiyo wale ambao hutafuta Uzuri wa Yule aliye Mtukufu Kabisa waweze kutofautishwa na kutenganishwa kutoka wapotovu na wakaidi.(15)

Ninyi mnajulikana vyema zaidi kwa wakaazi wa Ufalme wa juu kuliko mnavyojijua wenyewe. Mnafikiria maneno haya kuwa bure na matupu? (16)

Hii ndiyo ile Siku

Hii ndiyo ile siku ambamo Bahari ya rehema ya Mungu imedhihirishwa kwa watu, Siku ambamo Nyota ya Mchana ya wema Wake wa upendo imetawanya wangavu wake juu yao, Siku ambamo mawingu ya fadhili Yake ya ukarimu yametia kivuli juu ya jamii nzima ya binadamu. Sasa ni wakati wa kuwachangamsha na kuwaburudisha wale wenye huzuni kupitia upepo utiao nguvu wa upendo na undugu, na maji ya uzima ya urafiki na hisani. (17)

Kwa kweli Mimi nasema, hii ndiyo ile siku ambamo binadamu wanaweza kuutazama Uso, na kusikia Sauti ya Yule Mwahidiwa. Mwito wa Mungu umepaazwa, na nuru ya uso Wake imeinuliwa juu ya watu. Inambidi kila mtu kufutilia mbali dalili ya kila neno la upuuzi kutoka ubao wa moyo wake, na kutazama, kwa akili iliyo wazi na isiyo na upendeleo, juu ya ishara za Ufunuo Wake, mathibitisho ya Ujumbe Wake, na alama za utukufu Wake. (18)

Hakika siku hii ni Kuu! Vidokezo vilivyofanywa juu yake katika Maandiko yote Matakatiifu kama Siku ya Mungu, huthibitisha ukuu wake. Roho ya kila Nabii wa Mungu, ya kila Mjumbe Mtakatifu, imeitamani sana Siku hii ya ajabu. Koo zote tofauti tofauti za dunia, kadhalika, zimetamani sana kuifikia...(19)

Wakati ulioamriwa tangu awali kwa watu na koo za dunia sasa umefika. Ahadi za Mungu, kama zilivyoandikwa katika Maandiko matakatiifu, zote zimetimizwa. Kutoka Sayuni imetokea sheria ya Mungu, na Yerusalem, na vilima na ardhi yake, vimejawa na utukufu wa Ufunuo Wake. Ni mwenye furaha mtu yule ambaye hutafakari moyoni mwake kile ambacho kimefunuliwa katika Vitabu vya Mungu, Msaada Hatarini, Ajitoshelezaye Mwenyewe. Tafakarini juu ya jambo hili, Enyi wapendwa wa Mungu, na acheni masikio yenu yawe masikivu kwa Neno Lake, ili kwamba muweze, kwa neema na rehema Yake, kunywa tani yenu kutoka maji maangavu kabisa ya uthabiti, na muwe imara na msioyumba kama mlima katika Hoja Yake. (20)

Enyi Wayahudi! Kama mmedhamiria kumsulubisha kwa mara nyingine tena Yesu, Roho wa Mungu, niuweni Mimi, kwa kuwa Yeye kwa mara nyingine tena, kupitia nafsi Yangu, amedhihirishwa kwenu....Wafuasi wa Injili! Kama mnahifadhi shauku kumuua Muhammad, Mtume wa Mungu, nikamateni Mimi na komesheni uhai Wangu, kwa kuwa Mimi ndiye Yeye, na Nafsi Yangu ni Nafsi Yake....Wafuasi wa Muhammad! Ikiwa ni haja yenu kutoboa kwa mishale yenu kifua cha Yule Ambaye amekifanya Kitabu Chake cha Bayan kushushwa kwenu, nikamateni na mnitese, kwa kuwa Mimi ndiye Mpendwa - Kabisa Wake, ufunuo wa Nafsi Yake Mwenyewe, ingawa Jina Langu siyo jina Lake....Enyi watu wa Bayan! Kama mmeamua kumwaga damu ya Yeye Ambaye kuja Kwake Báb amekutangaza, Ambaye majilio Yake Muhammad ametabiri, na Ambaye Ufunuo Wake Yesu Kristo Mwenyewe ameutangaza, nitazameni Mimi nikisimama, tayari na bila kinga, mbele yenu. Nitendeeni kulingana na tamaa zenu wenyewe. (21)

Umoja na Amani

Enyi wana wa watu! Kusudi la kimsingi lihuishalo Imani ya Mungu na Dini Yake ni kulinda raghba na kukuza umoja wa mbari ya binadamu, na kuendeleza moyo wa upendo na upatano miongoni mwa watu. Msiifanye kuwa chanzo cha mafarakano na ugomvi, cha chuki na uadui. Hii ndiyo Njia iliyonyoka, msingi uliowekwa imara na usiosogezeka. Chochote kiinuliwacho juu ya msingi huu, mabadiliko na nasibu za ulimwengu haviwezi kupunguza nguvu yake, wala mzunguko wa karne zisizohesabika kudhoofisha muundo wake. (22)

Enyi watu mpinganao na koo za dunia! Elekezeni nyuso zenu kwenye umoja, na acheni wangavu wa nuru yake ung'ae juu yenu. Kusanyikeni pamoja, na kwa ajili ya Mungu amueni kung'olea mbali chochote kilicho chanzo cha ukinzani miongoni mwenu. Ndipo mng'ao wa Mwanga mkuu wa ulimwengu utaizingira dunia nzima, na wakazi wake kuwa raia wa mji mmoja, na wanaoketi juu ya kiti kile kile kimoja cha enzi. Mdhulumiwa huyu, tangu siku za mwanzoni za maisha Yake, hakuwa na haja nyingine yoyote ila hii, na ataendelea kutoendekeza shauku yoyote isipokuwa shauku hii. Hapawezi kuwa na shaka yoyote kwamba watu wa ulimwengu, wa mbari au dini yoyote, hupokea uvuvio wao kutoka Chanzo kimoja cha mbinguni, na ni raia wa Mungu mmoja. Tofauti kati ya amri ambazo chini yake wao huishi lazima zifikiriwe kama mambo yanayosababishwa na mahitaji mbali mbali na haja ya wakati ambamo amri hizo zilifunuliwa. Zote, isipokuwa chache ambazo ni matokeo ya upotovu wa binadamu, ziliamriwa na Mungu, na ni onesho la Mapenzi Yake na Kusudi. (23)

Yule Aliye Mkuu, alipotaka kufunua mahitaji ya amani na utulivu wa ulimwengu na maendeleo ya watu wake, Aliandika: Wakati lazima ufike ambapo haja ya lazima ya kuitisha mkusanyiko mkubwa ukumbatia watu wote, utatambuliwa ulimwenguni kote. Watawala na wafalme wa dunia sharti waone uhitaji wa kuhuhudhuria, na, wakishiriki katika mashauri yake, lazima wafikirie zile njia na nyenzo za zitakazoweka misingi ya Amani Kuu ya ulimwengu miongoni mwa watu. Amani hiyo huhitaji kwamba Mataifa yenye nguvu kubwa lazima yaamue, kwa ajili ya utulivu wa watu wa dunia, kupata kikamilifu miongoni mwao wenyewe. Endapo

mfalme yeyote huchukua silaha dhidi ya mwingine, wote sharti wainuke kwa pamoja na kumzuia. Ikiwa hili litafanyika, mataifa ya ulimwengu hayatahitaji tena zana za kivita, isipokuwa kwa kusudi la kulinda usalama wa milki zao na kwa ajili ya kudumisha utaratibu wa ndani katika nchi zao. Hili litahakikisha amani na utulivu wa kila jamii ya watu, serikali na taifa. Tunadiriki kutumaini kwamba wafalme na watawala wa dunia, ambao ni vioo vya jina la rehema na lenye nguvu la Mungu, wataweza kulifikia daraja hili, na kuwalinda wanadamu kutokana na shambulio la udhalimu. (24)

Siku inakaribia ambapo watu wote wa ulimwengu watakuwa wamechagua lugha moja na mwandiko mmoja kwa wote. Jambo hili likitimizwa, mtu atakayesafiri katika mji wowote, itakuwa kana kwamba ameingia nyumbani kwake mwenyewe. Mambo haya ni ya lazima na muhimu kabisa. Inampasa kila mtu mwenye umaizi na uelewa kujitahidi kutafsiri yale ambayo yameandikwa katika uhalisia na vitendo. (25)

Huyo kwa kweli ni mtu ambaye, leo, hujitoa mwenyewe kwa ajili ya huduma ya mbari nzima ya binadamu. Yule Aliye Mkuu husema: Amebarikiwa na ni mwenye furaha yule ambaye huinuka kuendeleza raghba bora kabisa za watu na koo za dunia. Katika kifungu kingine Yeye ametangaza: Haistahili kwa mtu kujivunia kwamba yeye huipenda nchi yake, bali kwamba huupenda ulimwengu mzima. Dunia ni nchi moja tu, na binadamu ni raia wake. (26)

Enyi wawakilishi wa watu mlischaguliwa katika kila nchi! Shaurianeni pamoja, na acheni fikra zenu ziwe tu juu ya yale ambayo huwanufaisha wanadamu, na kuboresha hali yao, ikiwa mu miongoni mwa wale ambao huchunguza kwa umakini. Uchukulieni ulimwengu kama mwili wa binadamu ambao, ingawa katika kuumbwa kwake ulikuwa mzima na mkamilifu, umedhuriwa, kupitia vyanzo mbali mbali, na matatizo makubwa na maradhi...Na kama, wakati fulani, kwa kupitia uangalizi wa tabibu mwenye uwezo, kiungo cha mwili huo kiliponywa, vingine vilibakia vimedhurika kama hapo mwanzo. (27)

Kile ambacho Bwana ameamuru kama tiba kuu na chombo cha nguvu kabisa kwa ajili ya uponyaji wa ulimwengu mzima ni muungano wa watu wake wote katika Hoja moja ya Ulimwengu, Imani moja kwa wote. Hili kwa vyovyote haliwezi kutimizwa isipokuwa kwa kupitia uwezo wa Tabibu stadi, mwenye nguvu zote na aliyevuviwa. Huu kwa kweli, ndiyo ukweli, na vingine vyote si chochote bali makosa. (28)

Matamshi ya Mungu ni taa, ambayo mwangaza wake ni maneno haya: Ninyi ni matunda ya mti mmoja, na majani ya tawi moja. Tendeani wenyewe kwa wenyewe kwa upendo wa hali ya juu na mapatano, kwa urafiki na ushirika. Yule Ambaye ni Nyota ya Mchana ya Ukweli hunishuhudia! Ni wenye nguvu mno mwanga wa umoja kwamba unaweza kuiangazia dunia nzima. (29)

Jielekezeni wenyewe kwenye ukuzaji wa usitawi na utulivu wa watoto wa watu. Elekezeni akili na nia zenu kwenye uelimishaji wa watu na koo za dunia, ili huenda mafarakano ambayo huigawa yaweze, kupitia uwezo wa Jina Kuu Kabisa, kufutiliwa mbali kutoka uso wake, na wanadamu wote wawe watetezi wa Utaratibu mmoja, na wakazi wa mji mmoja. Angazeni na takaseni mioyo yenu; msiiache inajisiwe na miiba ya chuki au magugu ya husuda. Ninyi mnaishi katika ulimwengu mmoja, na mmeumbwa kupitia utendaji wa Nia moja. Amebarikiwa yule ambaye huchangamamana na watu wote kwa moyo wa wema na upendo wa hali ya juu (30)

Mashauri

Onesheni ustahimilivu na ukarimu na upendo mmoja kwa mwingine. Endapo yeyote miongoni mwenu hushindwa kuufahamu ukweli fulani, au akiwa anajitahidi kuufahamu, onesheni wazi, mnapozungumza naye, moyo wa wema mkuu na nia njema. Msaidieni kuuona na kuutambua ukweli, bila kujiona hata kwa kiasi kidogo, kuwa bora zaidi kuliko yeye, au kuwa mwenye karama kuu zaidi. (31)

Msiibebeshe roho yoyote mzigo ambao ninyi msingependa kubebeshwa, na msimtakie yeyote mambo ambayo msingependa kujitakia ninyi wenyewe. Huu ndio ushauri Wangu bora kabisa kwenu, laiti mgeliufuata. (32)

Muwe wenye haki kwenu ninyi wenyewe na kwa wengine, ili ushuhuda wa haki uweze kufunuliwa, kupitia matendo yenu, miongoni mwa watumishi Wetu waaminifu. Jihadharini msije mkaingilia mali ya jirani yenu. Jithibitisheni wenye kustahili kuaminika kwake, na kuwa na imani nanyi, na msiwanyime masikini baraka ambazo neema ya Mungu imejalia juu yenu. (33)

Sema: Fundisheni Hoja ya Mungu, Enyi watu wa Baha, kwa kuwa Mungu ameamuru kwa kila mtu wajibu wa kuutangaza Ujumbe Wake, na kukichukulia kama kitendo kistahilicho sifa bora kabisa kati ya matendo yote. (34)

Usihuzunike ikiwa unaifanya kazi hii wewe mwenyewe peke yako. Acha Mungu awe Mtoshelezi wako kamili. Zungumza kwa ukaribu mkubwa na Roho Yake, na uwe mwenye shukrani. (35)

Uwe mkarimu katika ufanisi, na mwenye shukrani katika shida. Uwe mwenye kustahili kuaminika na jirani yako, na umwangelie kwa uso mwangavu na wa kirafiki. Uwe hazina kwa maskini, muonyaji kwa tajiri, mwikitaji wa kilio cha muhitaji, mhifadhi wa utakatifu wa ahadi yako. Uwe mwenye haki katika maamuzi yako, na mwangalifu katika kauli yako. Usiwe mwenye dhuluma kwa mtu yeyote, na oneshwa upole

wote kwa watu wote. Uwe kama taa kwa wale ambao hutembea gizani, furaha kwa wenye huzuni, bahari kwa wenye kiu, kimbilio kwa wenye dhiki, mtetezi na kinga kwa mwathirika wa ukandamizaji. Acha ukamilifu wa tabia na unyofu vitofautishe matendo yako yote. Uwe maskani kwa mgeni, marhamu kwa anayeteseka, ngome ya nguvu kwa mkimbia hatari, Uwe macho kwa kipofu, na mwanga uongozao kwa miguu ya mpotovu.

Uwe pambo kwa wajihi wa ukweli, taji kwa paji la uso wa uaminifu, nguzo ya hekalu la uadilifu, pumzi ya uzima kwa mwili wa mwanadamu, bendera ya majeshi ya haki, uwe mng'aro juu ya upeo wa njema, umande kwa udongo wa moyo wa mwanadamu, safina juu ya bahari ya ujuzi, jua katika mbingu ya fadhili, kito kwenye taji la hekima, mwanga ung'aao katika mbingu ya kizazi chako, tunda juu ya mti wa unyenyekevu. (36)

Andamaneni na watu wote, Enyi watu wa Bahà, kwa moyo wa urafiki na usharika. Ikiwa mnaufahamu ukweli fulani, ikiwa mnamiliki kito, ambacho wengine wamenyimwa, gawaneni nao kwa lugha ya wema wa hali ya juu na nia njema. Kikipokelewa, kikatimiza kusudi lake, lengo lenu limefikiwa. Ikiwa yeyote akikikataa, mwacheni mwenyewe, na msihini Mungu amwongoze. Jihadharini msije mkamtendea vibaya. Ulimi mwema ni sumaku ya mioyo ya watu. Ni mkate wa roho, huyavika maneno kwa maana, ni chemchemi ya mwangaza wa hekima na ufahamu.... (37)

Rembesheni ndimi zenu, Enyi watu, kwa ukweli, na pambeni roho zenu kwa pambo la uaminifu. Jihadharini, Enyi watu, msije mkamtendea kwa hila mtu yeyote. Muwe wadhamini wa Mungu miongoni mwa viumbe Wake, na alama za ukarimu wake katikati ya watu Wake. (38)

Sema: Acheni ukweli na adabu viwe pambo lenu. Msijiruhusu ninyi wenyewe kunyimwa vazi la ustahimilivu na haki, ili harufu nzuri za utakatifu ziweze kupeperushwa juu ya viumbe vyote kutoka mioyoni mwenu. Sema: Jihadharini, Enyi watu wa Bahà, ili msije mkatembea katika njia za wale ambao maneno yao hutofautiana na matendo yao. Jitahidini ili muwezeshe kudhihirisha kwa watu wa dunia ishara za Mungu, na kuakisi waziwazi amri Zake. Acheni matendo yenu yawe mwongozo kwa wanadamu wote, kwa kuwa kauli za watu wengi mno,

wawe wa hali ya juu au wa hali ya chini, hutofautiana na mwenendo wao. Ni kwa kupitia matendo yenu kwamba mnaweza kujipambanua wenyewe kutoka wengine. Kwa kupitia kwayo wangavu wa mwanga wenu unaweza kutawanywa dunia nzima. (39)

Wamebarikiwa wale wenye elimu ambao hawajivunii mafanikio yao; na heri ni yao wanyofu ambao hawawadhihaki wenye dhambi, lakini zaidi husetiri makosa yao, ili kwamba mapungufu yao wenyewe yaweze kubakia yamefichwa kwenye macho ya watu. (40)

Jihadharini msije mkajipendelea wenyewe zaidi ya majirani wenu.... Ikiwa tofauti zozote hutokea miongoni mwenu, nioneni Mimi nimesimama mbele ya uso wenu, na sameheaneni makosa ya mmoja kwa mwingine kwa ajili ya jina Langu na kama dalili ya upendo wenu kwa Hoja Yangu iliyo dhahiri na angavu. (41)

Usiku umefuata siku, na siku imefuata usiku, na saa na dakika za maisha yenu zimekuja na kupita, na bado hakuna hata mmoja kati yenu, hata kwa kitambo kidogo, amekubali kujitenga mwenyewe kutoka kile ambacho hutoweka. Jishughulisheni wenyewe, ili kwamba muda mfupi ambao bado ni wenu, usiweze kutawanyika na kupotea. Kama vile wepesi wa radi ndivyo siku zenu zitakavyopita, na miili yenu itazikwa chini ya kipaa cha vumbi. Je, mtatimiza nini tena? Mtajifidia vipi kushindwa kwenu katika wakati uliopita? (42)

Enyi watumishi Wangu! Msihuzunike kama, katika siku hizi na katika maisha haya ya kidunia, mambo yaliyo kinyume na matakwa yenu yameamriwa na kudhihirishwa na Mungu, kwa kuwa siku za kipeo cha furaha, za nderemo za mbinguni, bila shaka zimewekwa akiba kwa ajili yenu. Malimwengu, matakatifu na yenye utukufu wa kiroho, yatafunuliwa machoni penu. (43)

Wale ambao wameacha nchi yao kwa kusudi la kufundisha Hoja Yetu—hawa Roho Aminifu itawaimarisha kwa nguvu zake. Kundi la malaika Wetu wateule litasonga mbele pamoja nao, kama ilivyoamriwa na Yeye Ambaye ni Mwenye Nguvu—Zote, Mwenye Hekima—Zote. Ni baraka kuu jinsi gani inayomngojea yule ambaye amepata heshima

ya kumtumikia Mwenyezi! Kwa uhai Wangu! Hakuna kitendo, hata kiwe kikubwa jinsi gani, kinachoweza kulinganishwa nayo, isipokuwa matendo kama yale ambayo yamekwisha amriwa na Mungu, Mwenye Uwezo—Wote, Mwenye Nguvu—Kabisa. Huduma kama hiyo, kwa hakika, ni mfalme wa matendo yote mema, na pambo la kila tendo jema. (44)

Yeyote ainukaye kufundisha Hoja Yetu sharti ahitaji kujitenga mwenyewe kutoka vitu vyote vya kidunia, na afikirie, nyakati zote, ushindi wa Hoja Yetu kama kusudi lake kuu kabisa....Na wakati adhamiriapo kuondoka nyumbani kwake, kwa ajili ya Hoja ya Bwana wake, acha aweke imani yake yote kwa Mungu, kama maandalizi bora kabisa kwa safari yake, na ajivike kwa joho la njema. Hivyo ndivyo ilivyokwisha amriwa na Mungu, Mwenyezi, Asifiwaye—Kabisa.

Ikiwa amewashwa kwa moto wa upendo Wake, na kama akiacha vitu vyote vilivyoubwa, maneno ayatamkayo yatawasha moto kwa wale watakaomsikia. (45)

**Baadhi YA MANENO
YALIYOFICHWA YA
BAHA'ULLÁH**

EWE MWANA WA ROHO!

Shauri langu la kwanza ni hili: Uwe na moyo safi, mwema na ung'aao ili yako iwe enzi ya kale, isiyopotea na inayodumu milele. (46)

EWE MWANA WA ROHO!

Kipenzi kabisa kuliko vitu vyote mbele ya macho Yangu ni Haki: usiikwepe ikiwa unanihitaji Mimi, na wala usiipuuze ili Mimi nipate kukufanya kuwa msiri Wangu. Kwa msaada wake utapata kuona kwa macho yako mwenyewe na siyo kwa macho ya wengine, na utapata kujua kwa akili yako mwenyewe na siyo kwa akili ya jirani yako. Waza hili moyoni mwako; jinsi inavyokupasa uwe. Hakika haki ni zawadi Yangu kwako na ishara ya wema Wangu wa upendo. Basi iweke mbele ya macho yako. (47)

EWE MWANA WA KUWA!

Paradiso yako ni upendo Wangu; makao yako ya mbiguni, muungano tena Nami. Ingia humo na wala usikawie. Hili ndilo lililokusudiwa kwa ajili yako katika ufalme Wetu ulio juu na milki Yetu iliyotukuka. (48)

EWE MWANA WA KUWA!

Wewe ni taa Yangu na nuru Yangu imo ndani mwako. Pata mng'ao wako kwayo na usimtafute mwingine zaidi Yangu. Kwa maana nimekuumba tajiri na kukupa fadhili Zangu kwa wingi. (49)

EWE MWANA WA ROHO!

Usiniombe kile tusichopendelea kwa ajili yako, hivyo ridhika na kile tulichoamuru kwa ajili yako, kwa kuwa hicho ndicho kinachokufaa, kama utajiridhisha nacho. (50)

EWE MWANA WA MTU!

Usinong'one dhambi za wengine ilhali wewe mwenyewe ni mtenda dhambi. Endapo ukiikiuka sheria hii, utakuwa umelaaniwa, na kwa hili Mimi nashuhudia. (51)

EWE MWANA WA KUWA!

Jifanyie hesabu mwenyewe kila siku kabla hujaitwa kwenye kutoa hesabu: kwa maana kifo, bila onyo, kitakufikia na utaitwa kutoa hesabu ya matendo yako. (52)

EWE MWANA WA MWENYE ENZI!

Nimekifanya kifo kuwa mjumbe wa kukuletea furaha. Kwa nini basi unahuzunika? Niliifanya nuru ili iangazie utukufu wake juu yako. Kwa nini unajizuia kutoka kwayo? (53)

EWE MWANA WA MTU!

Usizipuuze amri Zangu ikiwa unaupenda uzuri Wangu, na usisahau ushauri Wangu ikiwa unataka kupata ridhaa Yangu njema. (54)

EWE MWANA WA MTU!

Kama neema itakuangukia, usishangilie, na kama udhilifu ukikujia, usiwe na deraya, kwani vyote vitapita na havitakuwepo tena. (55)

EWE MWANA WA KUWA!

Kama ufukara ukikufika, usihuzunike, kwa kuwa kuna wakati Bwana wa utajiri atakutembelea. Usiogope udhilifu, kwa kuwa utukufu siku moja utakaa juu yako. (56)

EWE MWANA WA KUWA!

Usijihangaishe na ulimwengu huu, kwa kuwa kwa moto tunajaribu dhahabu, na kwa dhahabu twawajaribu watumishi wetu. (57)

EWE MWANA WA KUWA!

Moyo wako ni makao Yangu; uutakase kwa ajili ya mshuko Wangu. Roho yako ni mahali Pangu pa ufunuo; isafishe kwa ajili ya udhihirisho Wangu. (58)

EWE RAFIKI!

Katika bustani ya moyo wako usipande kingine ila miwaridi ya upendo, na kutoka shorwe wa upendo na shauku usiuachilie mkono wako. Thamini urafiki wa wanyofu na uepukane na ushirikiano wowote na waovu. (59)

EWE MWANA WA DUNIA!

Ikiwa upo Nami; usimtafute mwingine zaidi Yangu; na ikiwa unautazama uzuri Wangu, fumba macho yako kwa dunia na yote yaliyomo ndani mwake; kwa maana mapenzi yangu na mapenzi ya mwingine zaidi Yangu, kama vile moto na maji, haviwezi kukaa pamoja katika moyo mmoja. (60)

EWE MGENI ULIYEFANYWA RAFIKI!

Mshumaa wa moyo wako huwashwa kwa mkono wa uwezo wangu, usiuzime kwa pepo za upinzani za nafsi na shauku. Mponyaji wa maradhi yako yote ni kunikumbuka Mimi, usilisahau hilo. Uufanye upendo Wangu hazina yako na uutunze kama utunzavyo macho yako yenyewe na uhai wako. (61)

ENYI MLIO MATAJIRI DUNIANI!

Mafukara kati yenu ni dhamana Yangu; itunzeni dhamana Yangu; na msidhamirie tu kwenye starehe zenu wenyewe. (62)

EWE MWANA WA SHAUKU!

Jitakase mwenyewe kutoka unajisi wa utajiri na kwa amani kamili jongelea kwenye milki ya umaskini; ili kutoka katika chemchemi ya kujitenga uweze kunywa mvinyo wa maisha ya umilele. (63)

EWE MWANA WA KIJAKAZI WANGU!

Uongozi daima umekuwa ukitolewa kwa maneno, na sasa unatolewa kwa matendo. Kila mmoja lazima aoneshe wazi matendo yaliyo safi na matakatifu, kwa kuwa maneno ni mali ya wote sawasawa, ambapo matendo kama haya ni mali ya wapendwa Wetu tu. Jitahidini basi kwa moyo na roho kujipambanua wenyewe kwa matendo yenu. Kwa jinsi hii tunawashauri katika waraka huu mtakatifu na ung'aao. (64)

EWE MWANA WA KIJAKAZI WANGU!

Kunywa kutoka kwenye ulimi wa mwenye rehema mkondo wa siri takatifu, na kutazama kutoka kwenye chimbuko la maneno matakatifu fahari iliyofunuliwa ya nyota ya mchana ya hekima. Panda mbegu za hekima Yangu takatifu katika udongo safi wa moyo, na uzinyunyizie kwa maji ya yakini, ili maua bora ya elimu na hekima yaweze kuchipuka yakiwa mabichi na ya kijani kutoka katika mji mtakatifu wa moyo. (65)

MANENO YA BÁB
Kutoka HOTUBA YAKE KWA
HERUFI ZA WALIO HAI

Enyi marafiki Zangu wapendwa! Ninyi ni wachukuzi wa jina la Mungu katika Siku hii. Mmechaguliwa kama ghala za siri Yake. Inampasa kila mmoja wenu kudhihirisha sifa za Mungu, na kuonesha kwa mfano matendo na maneno yenu ishara za unyofu wake, uwezo na utukufu Wake. Viungo vyenyewe vya miili yenu lazima vishuhudie juu ya utukufu wa madhumuni yenu, uadilifu wa maisha yenu, uhalisia wa imani yenu, na mwenendo wenu uliyotukuka kiibada. (b-1)

Kutoka MATEUZI YA MAANDIKO YA BÁB

Enyi watu wa dunia! Yeyote ambaye humtii Yeye aliye Kumbukumbu ya Mungu na Kitabu Chake, kwa kweli amemtii Mungu na wateule Wake na katika uhai ujao mbele ya Mungu, atahesabiwa miongoni mwa wakaazi wa Paradiso ya ridhaa Yake njema. (b-2)

Mimi ni Fumbo la Hekalu ambalo limeinuliwa na Mkono wa Mweza wa Yote. Mimi ni Taa iliyowashwa na Kidole cha Mungu, ndani ya kishubaka chake— na kuifanya ing’ae kwa wangavu na umaui. Mimi ni Mwali wa moto wa ile Nuru takatifu ambayo ilimetameta juu ya Sinai katika Mahali pa furaha na iiyokuwa imefichwa katikati ya Kichaka Kiwakacho. (b-3)

Ni bora kuongoza roho moja kuliko kumiliki vyote vilivyomo duniani, kwa kadiri ile roho iongozwayo inavyokuwa chini ya kivuli cha mti wa Umoja Mtakatifu, yeye na yule ambaye amemwongoza, wote wawili watakuwa wapokeaji wa rehema ya upendo wa Mungu, ambapo umiliki wa vitu vya kidunia utaisha wakati wa kifo. Njia ipelekayo kwenye uongozi ni ya upendo na huruma, siyo ya nguvu na shuruti. Hii imekuwa mbinu ya Mungu hapo awali, na itaendelea kuwa hivyo siku zijazo! Yeye humfanya yule ampendaye kuingia katika kivuli cha Rehema Yake. Kwa kweli, Yeye ni Mlinzi Mkuu, Mkarimu Kabisa. (b-4)

Ni idadi kubwa iliyoje ya watu ambao ni wajuzi sana katika kila sayansi, lakini ni kushikamana kwao na Neno takatifu la Mungu ambako kutaamua imani yao, kwa kuwa tunda la kila sayansi siyo lingine ila elimu ya mafundisho matakatifu na utiifu kwa ridhaa yake njema. (b-5)

Inastahili kwamba mtumishi, baada ya kila sala, sharti amuombe Mungu kujalia rehema na msamaha juu ya wazazi wake. Hapo ndipo mwito wa Mungu utapaazwa; “Elfu kwa elfu ya kile ambacho umekiomba kwa ajili ya wazazi wako kitakuwa thawabu yako!” Amebarikiwa yeye ambaye huwakumbuka wazazi wake wakati azungumzapo na Mungu. (b-6)

Msizishushie hadhi amri za Mungu hadi kufikia mawazo ya kipuuzi ya kwenu wenyewe; bali tazameni mambo yote ambayo Mungu ameyaumba kwa amri Yake kwa jicho la roho, kama vile mvionavyo vitu kwa macho ya miili yenu. (b-7)

Siku inakaribia ambapo Mungu atayafanya majeshi ya Ukweli yashinde, na Yeye ataitakasa dunia nzima kwa jinsi ambayo, ndani ya eneo la ujuzi Wake hakuna hata roho moja itakayobakia vinginevyo inamuamini Mungu kwa ukweli, haimuabudu Mungu mwingine ila Yeye, inasujudu mchana na usiku katika ibada Yake, na inahesabiwa miongoni mwa wale ambao wamehakikishiwa kabisa. (b-8)

Kazieni macho yenu kwa yeye Ambaye Mungu atamdhihirisha katika Siku ya Ufufuko, kisha amini kwa uthabiti katika kile ambacho kimetelemshwa na Yeye....

Wakati Nyota ya Mchana ya Bahà itakapong’aa kwa wangavu juu ya upeo wa umilele, inawabidi mjitokeze wenyewe mbele ya Kiti Chake cha Enzi Ninyi, kila mmoja na wote, mmeitwa katika uhai, kutafuta uwepo Wake na kufikia lile daraja bora na tukufu. Kwa hakika, atatelemsha kutoka mbingu ya rehema Yake kile ambacho kitawanufaisha ninyi, na chochote kitakachojaliwa na Yeye kwa rehema kitawawezesha ninyi kuachana na wanadamu wote. (b-9)

Imewapasa ninyi kungojea Siku ya kutokea kwa Yule Ambaye Mungu atamdhihirisha. Kwa hakika kusudi Langu katika kupanda Mti wa Bayan halikuwa lingine zaidi ya kuwawezesha ninyi kunitambua Mimi. Kwa ukweli Mimi Mwenyewe ni wa kwanza kusujudu mbele ya Mungu na kumuamini Yeye.... Walakini, wakati Mti wa Bayan ufikiapo ukuaji wake wa juu kabisa, Sisi tutauinamisha chini kama dalili ya ibada kuelekea kwa Bwana wake ambaye atatokea katika nafsi ya Yule Ambaye Mungu atamdhihirisha. (b-10)

MANENO YA ‘ABDU’L-BAHÁ
Kutoka MAZUNGUMZO YA PARIS
(HEKIMA YA ‘ABDU’L-BAHÁ)

Mtu aelekezapo uso wake kwa Mungu huona mwangaza wa jua kila mahali. Wanadamu wote ni ndugu zake. Msiache mtindo wa desturi fulani kuwafanya muonekane baridi na msio na huruma mkutanapo na wageni kutoka nchi zingine. Msiwatazame kana kwamba mnawashuku kuwa ni waovu, wezi na watovu wa adabu....

Wasaidieni ili wajisikie kama wako nyumbani; waulizeni wanakoishi, waulizeni ikiwa mnaweza kuwapa huduma yoyote; jaribuni kuyafanya maisha yao yawe kidogo yenye furaha zaidi.

Kwa jinsi hii, hata kama wakati fulani, yale uliyoyashuku awali yawe ya kweli, hata hivyo endelea kuwa mwema kwao—wema huu utawasaidia kuwa bora zaidi.... Acha wale wanaokutana nawe wajue, bila wewe kujitangaza ukweli, kwamba wewe kwa hakika ni Mbaha’i. (A-46)

Mtu ambaye hufanya mema makubwa, na hayazungumzii, yu njiani kuelekea ukamilifu. Mtu ambaye amefanya jambo dogo zuri na kulikuza katika mazungumzo yake, thamani yake ni ndogo sana. Ikiwa nakupenda, sihitaji kuendelea kuzungumzia upendo wang—utajua bila maneno yoyote. Kwa upande mwingine ikiwa sikupendi, hilo pia utalijua—na hutaniamini, hata kama ningekuambia kwa maneno elfu moja, kwamba nakupenda.

Watu hupenda sana kuutangaza wema, wakizidisha maneno mazuri kwa sababu wanataka waonekane kuwa wakubwa na bora zaidi kuliko wenzao, wakitafuta fahari machoni pa ulimwengu. Wale wafanyao mema mengi hutumia maneno machache zaidi kuhusu vitendo vyao. Watoto wa Mungu hufanya kazi bila kujisifu, wakitii sheria Zake. (A-47)

Msikate tamaa! Fanyeni kazi kwa nia thabiti. Nia safi na upendo vitashinda chuki. Ni mambo mangapi yaliyofikiriwa hayaweze kani yanafanyika siku hizi! Elekezeni nyuso zenu kwa uthabiti kuelekea Nuru ya Ulimwengu. Onesheni upendo kwa wote; ‘Upendo ni pumzi ya

Roho Mtakatifu katika moyo wa mtu'. Piga moyo konde! Mungu kamwe hawaachi watoto wake wanaojitahidi na wanaofanya kazi na kusali! Acha mioyo yenu ijazwe na shauku kubwa kwamba utulivu na mapatano viweze kuuzunguka ulimwengu huu mzima uliojaa vita. Hivyo ndivyo mafanikio yenu yatakavyovika taji juhudi zenu na kwa ule undugu wa wanadamu wote utakuja Ufalme wa Mungu katika hali ya amani na nia njema. (A-48)

Mungu hawaachi watoto wake bila faraja, lakini wakati giza la kipupwe linapowafunika, hapo tena Yeye hutuma Wajumbe Wake, Manabii, pamoja na msimu mpya wa machipuko yaliyobarikiwa. Jua la Ukweli hutokeza tena katika upeo wa ulimwengu, likiangaza katika macho ya wale wanaolala, likiwaamsha ili wauone utukufu wa pambazuko jipya. Hapo tena ndipo mti wa ubinadamu huchanua na kuleta matunda ya unyofu kwa ajili ya uponyaji wa mataifa. (A-49)

Hebu itazameni bustani nzuri iliyojaa maua, vichaka na miti. Kila ua lina mvuto tofauti, uzuri wa namna ya kipekee, manukato yake ya kipekee ya kuvutia na rangi ya kupendeza.... Hivyo ndivyo ilivyo kwa jamii ya wanadamu. Imewndwa na mbari nyingi, na watu wake ni wa rangi mbalimbali, nyeupe, nyeusi, manjano, hudhurungi na nyekundu – lakini wote wanatokana na Mungu yule yule, na wote ni watumishi Wake....

Hivyo ndivyo ipasavyo kuwa miongoni mwa wana wa watu! Anuwai katika familia ya binadamu inapaswe iwe chanzo cha upendo na mapatano, kama ilivyo katika muziki ambapo sauti mbalimbali huungana pamoja kufanya sauti moja kamilifu. Mkikutana na wale wa mbari na rangi tofauti na yenu, msiwashuku na kukimbilia katika tundu lenu la mila na desturi, bali wafurahieni na kuwaonesha wema. Wafikirieni kama maua yenye rangi tofauti tofauti ya mawaridi yameayo katika bustani nzuri ya jamii ya wanadamu, na shangilieni kuwa miongoni mwao.

Hali kadhalika mnapokutana na wale ambao fikra zao hutofautiana na zenu, msigeuzie uso wenu mbali nao. Wote wanatafuta ukweli, na kuna njia nyingi zielekeazo huko. Ukweli una sura nyingi, lakini daima na milele hubakia mmoja.

Msiruhusu tofauti ya maoni, au anuwai ya fikra ziwatenganishe na wanadamu wenzenu, au kuwa chanzo cha mabishano, chuki na ugomvi mioyoni mwenu.

Bali, tafuteni ukweli kwa juhudi na wafanyeni watu wote kama rafiki zenu.

Kila jengo hujengwa kwa mawe mengi tofauti tofauti, hata hivyo, kila moja hulitegemea lingine kwa kiwango ambacho kwamba ikiwa moja litaondolewa jengo zima litadhurika; ikiwa moja lina hitilafu, muundo mzima haujakamilika.

Bahá'u'lláh amechora duara la umoja, ametengeneza mfumo wa kuunganisha watu wote, na kwa ajili ya ukusanyikaji wao wote chini ya kivuli cha hema la umoja wa ulimwengu. Hii ni kazi ya Baraka Takatifu, na sote lazima tujitahidi kwa moyo na roho hadi tupate uhalisia wa umoja miongoni mwetu, na kadiri tufanyavyokazi, ndivyo nguvu itakavyotolewa kwetu. Acheni fikra zote za ubinafsi, na jitahidini tu kuwa watiifu na wanyenyekevu kwa Amri ya Mungu. Kwa jinsi hii pekee ndivyo tutakuwa raia wa Ufalme wa Mungu, na kufikia uzima wa milele. (A-50)

Roho Mtakatifu ni Nuru kutoka Jua la Ukweli anayeleta, kwa nguvu zake zisizo na kikomo, maisha na wangavu kwa wanadamu wote, akizijaza roho zote Mng'ao Mtakatifu, akipeleka baraka za Rehema ya Mungu kwa ulimwengu mzima....

Hali kadhalika Roho Mtakatifu ndiyo chanzo hasa cha uhai wa mwanadamu; bila Roho Mtakatifu asingekuwa na akili, asingekuwa na uwezo wa kupata ujuzi wake wa kisayansi ambao kwa huo uwezo wake mkuu juu ya viumbe vingine vyote hupatikana. Mwangaza wa Roho Mtakatifu humpa mtu uwezo wa kufikiri, na humwezesha kufanya uvumbuzi ambao kwa huo huzigeuza sheria za muumbo kulingana na matakwa yake.

Roho Mtakatifu ndiye ambaye, kupitia kiunganishi cha Manabii wa Mungu, humfundisha mtu njema za kiroho na kumwezesha kufikia Uzima wa Milele.

Baraka hizi zote huletwa kwa binadamu kupitia Roho Mtakatifu; kwa hiyo tunaweza kuelewa kwamba Roho Mtakatifu ndiye kiungo baina ya Muumba na muumbwa. Mwanga na joto la jua husababisha ardhi kuwa yenye matunda, na kuleta uhai katika vitu vyote vinavyokua; na Roho Mtakatifu huhuisha roho za wanadamu. (A-51)

Inueni mioyo yenu juu ya wakati wa sasa na tazameni kwa macho ya imani kwenye siku zijazo! Leo mbegu inapandwa, punje huangukia juu ya ardhi, lakini tazameni siku itafika ambapo itainuka kuwa mti mtukufu na matawi yake yatakuwa yamejaa matunda. Shangilieni na muwe na furaha kwamba siku hii imepambazuka, jaribuni kuutambua uwezo wake, kwani kwa hakika ni ya ajabu! Mungu amewavika taji la heshima na katika mioyo yenu ameweka nyota ing’aa; kwa kweli mwanga wake utauangazia ulimwengu mzima! (A-52)

Katika Injili kufuatana na Mt. Yohana, Kristo amesema: “Isipokuwa mtu amezaliwa kwa maji na kwa Roho, hawezi kuingia katika Ufalme wa Mbinguni”. Makasisi wametafsiri hii kuwa na maana kwamba ubatizo ni wa lazima kwa ajili ya wokovu. Katika Injili nyingine, inasemwa: ‘Yeye atawabatiza kwa Roho Mtakatifu na kwa moto.’

Hivyo basi maji ya ubatizo na moto ni kitu kimoja! Haiwezi kumaanisha kwamba ‘maji’ yanayozungumziwa ni maji ya kimwili, kwani moja kwa moja ni kinyume cha ‘moto’, na kimoja hukiharibu kingine. Kristo anapotaja ‘maji’ katika Injili, amaanisha kile kinachosababisha uhai, kwani bila maji hakuna kiumbe chochote cha dunia kinachoweza kuishi--madini, mimea, wanyama na wanadamu, kimoja na vyote, vinategemea maji kwa ajili ya uwepo wao hasa. Naam, uvumbuzi wa hivi karibuni wa kisayansi unatuthibitishia kwamba hata madini yana aina fulani ya uhai, na kwamba pia yanahitaji maji kwa ajili ya uhai wao.

Maji ni chanzo cha uhai, na Kristo anapoongelea maji, Anaonesha kwa mfano kile ambacho ndicho chanzo cha *Uzima wa Milele*.

Haya maji yatiayo Anayoyazungumzia ni kama moto, kwani si kingine bali ni Upendo wa Mungu, na upendo huu humaanisha uhai kwa roho zetu.

Kwa moto wa Upendo wa Mungu vizuizi ambavyo hututenga sisi kutoka hali halisi ya mbinguni huunguzwa, na kwa maono yaliyo dhahiri tunawezeshwa kujitahidi, kwenda mbele na kuelekea juu, na daima kusonga mbele katika njia za sifa na utakatifu, na kuwa njia ya mwangaza kwa Ulimwengu. (A-53)

Hakuna kitu kikubwa zaidi au kilichobarikiwa zaidi kuliko Upendo wa Mungu! Unawapa uponyaji walio wagonjwa, marhamu kwa waliojeruhiwa, furaha na faraja kwa ulimwengu mzima, na kwa kupitia huo pekee ndiyo binadamu anaweza kupata Uzima wa Milele. *Kiini* cha dini zote ni Upendo wa Mungu, na ndio msingi wa mafundisho yote matakatifu. (A-54)

MANENO YA ‘ABDU’L-BAHÁ

Dondoo kutoka MATEUZI YA MAANDIKO YA ‘ABDU’L-BAHÁ

Huduma kwa marafiki ni huduma kwa Ufalme wa Mungu, na kuwajali masikini ni mojawapo ya mafundisho makuu ya Mungu. (A-55)

Hivyo umoja wa binadamu wote unaweza kupatikana katika siku hii. Kwa kweli hili si lingine bali ni mojawapo ya maajabu ya wakati huu wa ajabu, karne hii tukufu. Jambo hili nyakati zilizopita zimenyimwa, kwa kuwa karne hii—karne ya mwangaza— imejaliwa utukufu wa kipekee na usio na kifani, nguvu na mwangaza. Kwa sababu hiyo ndiyo ukunjukaji wa kimiujiza wa maajabu mapya kila siku. Hatimaye itaonekana jinsi mishumaa yake itakavyowaka katika mikusanyiko ya watu.

Tazama jinsi mwangaza wake unavyopambazuka sasa juu ya upeo uliotiwa giza wa ulimwengu. Mshumaa wa kwanza ni umoja katika milki ya kisiasa, ambapo dalili zake za mwanzoni sasa zaweza kuonekana. Mshumaa wa pili ni umoja wa fikra katika shughuli za ulimwengu, ambapo ukamilifu wake utashuhudiwa hivi punde. Mshumaa wa tatu ni umoja katika uhuru ambao bila shaka utapatikana. Mshumaa wa nne ni umoja katika dini ambao ndiyo jiwe la msingi la msingi wenyewe, na ambao, kwa uwezo wa Mungu, utafunuliwa katika utukufu wake wote. Mshumaa wa tano ni umoja wa mataifa—umoja ambao katika karne hii utasimikwa kwa uthabiti, ukisababisha watu wote wa ulimwengu kujiona wenyewe kama raia wa nchi moja. Mshumaa wa sita ni umoja wa mbari, kuwafanya wale wote waishio ulimwenguni wawe watu na koo za mbari moja. Mshumaa wa saba ni umoja wa lugha yaani, uchaguzi wa lugha moja ya ulimwengu ambayo kwayo watu wote watajifunza na kuitumia. Kila moja ya hii itatimia bila kuepukika, kwa sababu uwezo wa Ufalme wa Mungu utaauni na kusaidia utambuzi wao. (A-56)

Kwa sababu hiyo, Enyi wapendwa wa Mungu, toeni shukrani mlizonazo, katika siku ya mapambazuko, geuzieni nyuso zenu kwenye Nuru ya Ulimwengu na kuona fahari Zake. Mmepokea fungu la nuru ya ukweli, mmefurahia sehemu ya zile baraka ambazo hudumu milele; na kwa hivyo, kama kurudisha shukrani kwa baraka hii, msipumzike hata kwa kitambo kidogo, msinyamaze, pelekeni kwenye masikio ya watu habari njema za Ufalme, enezeni kwa marefu na mapana Neno la Mungu (A-57)

Tendeni kulingana na mashauri ya Bwan: yaani, inukeni kwa namna ambayo, na kwa sifa kama zile ambazo, zitaujalia mwili wa dunia hii roho iliyo hai, na kumlea mtoto huyu mchanga, jamii ya wanadamu, kufikia daraja la utu uzima. Kadiri muwezavyo washeni mshumaa wa upendo katika kila mkutano, na kwa huruma ufurahisheni na uchangamsheni kila moyo. Mjalini mgeni kama mnavyomjali mmoja wenu; waonesheni wageni wema ule ule wa upendo muutoao kwa marafiki zenu waaminifu. Ikiwa yeyote ataanza kupigana nawe, tafuta urafiki naye; ikiwa yeyote atakuchoma kisu moyoni, uwe marhamu iponyeshayo vidonda vyake; ikiwa yeyote atakusuta na kukudhihaki, kutana naye kwa upendo. Ikiwa yeyote atalundika lawama zake juu yako, wewe msifu; ikiwa atakupa sumu ifishayo, mpe badala yake asali bora kabisa; na ikiwa atatishia maisha yako, mpatie tiba ambayo itamponya milele. Ikiwa yeye ndiye maumivu yenyewe, wewe uwe dawa yake; na akiwa miiba, wewe uwe mawaridi yake na mimea mizuri. Huenda njia na maneno kama haya kutoka kwenu hatimaye yataifanya dunia hii yenye giza igeuke kuwa angavu; yataifanya dunia hii ya mavumbi kugeuka kuwa ya mbinguni, mahali hapa pa gereza la kishetani kuwa jumba la kifalme la Bwana—ili kwamba vita na ugomvi vitapita na visiwepo tena, na upendo na imani vitasimika mahema yao kwenye vilele vya ulimwengu. Hiki ndicho kiini cha maonyo ya Mungu; haya kwa jumla ndiyo mafundisho kwa Kipindi Kitakatifu cha Bahá. (A-58)

Ewe ambaye umegeuzia uso wako kuelekea kwa Mungu! Fumba macho yako kutoka vitu vingine vyote, na uyafumbue kwa milki ya Mtukufu Kabisa. Omba chochote kile ukitakacho kutoka Kwake pekee; tafuta chochote kile ukitafutacho kutoka Kwake pekee. Kwa tazamo la mara moja Yeye hujalia matumaini mia moja elfu, kwa mtazamo mmoja

Yeye huponya magonjwa mia moja elfu yasiyotibika, kwa tazamo la mara moja Yeye huweka marhamu kwenye kila kidonda, kwa tikiso la kukubali la kichwa Yeye huiachilia huru mioyo kutoka kwenye pingu za huzuni. Yeye Hufanya kama afanyavyo, je, sisi tunaweza kufanya nini? Yeye hutimiza Nia Yake, huamuru kile akipendacho. Kwa hiyo ni bora zaidi kwako kuinamisha kichwa chako katika utiifu, na kuweka imani yako katika Bwana Mwenye Rehema—Kabisa. (A-59)

Ee jeshi la Mungu! Fanyeni jitihada kubwa: huenda mtaweza kuifunika dunia hii kwa mwangaza, ili kibanda hiki cha udongo, ulimwengu, kiweze kuwa Paradiso ya Abhá'. (A-60)

Maana ya 'malaika' ni mathibitisho ya Mungu na nguvu Zake za mbinguni. Kadhalika malaika ni viumbe waliobarikiwa ambao wamekata mafungamano yote na ulimwengu huu wa chini, wameachiliwa kutoka minyororo ya nafsi na tamaa za mwili, na wamefungia mioyo yao kwenye milki takatifu za Bwana. Hawa ni wa Ufalme, wa mbinguni; hawa ni wa Mungu, wa kiroho; hawa ni wafunuaji wa neema tele ya Mungu; hawa ni nukta za mapambazuko ya baraka Zake za kiroho. (A-61)

Mahitaji ya msingi kwa wale wanaoshaurian pamoja ni usafi wa nia, wangavu wa nafsi, kujitenga na vingine vyote ila Mungu, mvuto kwenye Manukato Yake Matakatifu, unyenyekevu na kujishusha miongoni mwa wapendwa wake, subira na uvumilivu mwingi katika shida na utumishi kwenye Kizingiti Chake kilichotukuka. Ikiwa watasaidiwa kwa neema kupata sifa hizi, watapewa ushindi kutoka ufalme usioonekana wa Bahá. (A-62)

Wakati wowote kikundi cha watu watakapokusanyika mahali pa mkutano, watajishughulisha katika kumtukuza Mungu, na watazungumza mmoja kwa mwingine juu ya siri za Mungu, bila shaka yoyote pumzi za Roho Mtakatifu zitavuma kwa upole juu yao, na kila mmoja atapokea fungu lake la pumzi hiyo. (A-63)

Utoapo habari njema, zungumza wazi na sema: Yule Mwahidiwa wa watu wote wa ulimwengu hivi sasa amedhihirishwa. Kwa kila mmoja na kwa watu wote, na kila dini, humsubiri Yule Mwahidiwa, na

Baha'u'llah ndiye Yule Ambaye hungojewa na wote; na kwa hiyo Hoja ya Baha'u'lláh italeta umoja wa binadamu, na hema la umoja litainuliwa juu kwenye vilele vya ulimwengu, na bendera za muungano wa jamii nzima ya binadamu zitakunjuliwa kwenye vilele vya dunia. (A-64)

Ingawa kujipatia elimu ya sayansi na sanaa ni utukufu mkuu kabisa wa wanadamu, hii ni hivyo tu kwa sharti kwamba mto wa mtu utiririke kuelekea bahari kuu, na kuteka kutoka chanzo cha kale cha Mungu na uvuvio Wake. Jambo hili likitokea, basi kila mwalimu ni kama bahari isiyo na mipaka, kila mwanafunzi kama chemchemi ya ajabu ya ujuzi. Kisha, ikiwa utafutaji wa elimu utaongozea kwenye uzuri wa Yule Ambaye ndiye kusudi la Elimu yote, lengo hilo ni bora kabisa; lakini kama sivyo, tone moja tu huenda likamfungia mbali mtu kutoka neema ifurikayo, kwani pamoja na elimu huja ufidhuli na majivuno, na husababisha kosa na kutomjali Mungu. (A-65)

Imekubidi kujipatia matawi mbalimbali ya ujuzi, na kugeuza uso wako kuelekea uzuri wa ule Uzuri Dhahiri, ili uweze kuwa ishara ya uongozi uokoao miongoni mwa watu wa ulimwengu, na kitovu cha ufahamu katika eneo hili ambalo kutoka kwalo wenye hekima na hekima zao wamefungiwa nje, isipokuwa kwa wale ambao wameweka mguu katika Ufalme wa miangaza na kujulishwa siri iliyofunikwa na iliyofichwa, siri iliyolindwa vyema kabisa. (A-66)

Kuna njia mbili za kuponya ugonjwa, njia ya kimwili na njia ya kiroho. Njia ya kwanza ni kwa matibabu ya matabibu; ya pili hujumuisha sala zitolewazo na watu wa kiroho wa Mungu na katika kumgeukia Yeye. Njia zote mbili sharti zitumiwe na kujaribiwa.

Maradhi ambayo hutokea kwa sababu ya vyanzo vya kimwili lazima yatibiwe na madaktari kwa tiba za kitabibu; yale ambayo hutokana na vyanzo vya kiroho hupotea kupitia njia za kiroho. Hivyo ugonjwa uliosababishwa na mateso, woga, maono ya mishipa ya fahamu, utaponywa vizuri zaidi kwa matibabu ya kiroho kuliko yale ya kimwili. Kwa sababu hiyo aina zote mbili za tiba sharti zifuatwe; hazihitilafiani. (A-67)

Imembidi kila mtu kutafuta matibabu ya kitabibu na kufuata maagizo ya daktari, kwani hii ni kufuatana na amri takatifu, lakini kwa uhalisia, Yule Aponyaye ni Mungu. (A-68)

Wafunzeni watoto wenu tangu siku zao za mwanzoni kabisa kuwa wenye huruma na upendo mno kwa wanyama. Endapo mnyama akiumwa, acha watoto wajaribu kumponya, akiwa na njaa, acha wamlishe, akiwa na kiu, acha watulize kiu chake, akichoka, acha waone kwamba anapumzika.

Idadi kubwa ya wanadamu ni wenye dhambi, lakini wanyama hawana hatia. Kwa kweli wale wasio na dhambi lazima wapokee wema na upendo wa hali ya juu kabisa--wote isipokuwa wanyama wenye madhara, kama vile mbwa mwitu wenye kiu ya damu, kama vile nyoka wenye sumu, na viumbe wengine wenye madhara kama hao, sababu ni kwamba wema kwa hawa ni udhalimu kwa binadamu na kwa wanyama wengine pia.

(A-69)

Mtu lazima aone katika kila mwanadamu kile tu ambacho hustahili sifa. Jambo hili likifanywa, mtu anaweza kuwa rafiki kwa mbari nzima ya wanadamu. Hata hivyo, ikiwa tunawaangalia watu kutokana na makosa yao, hapo kuwa rafiki kwao ni kazi kubwa. (A-70)

Juu ya swali lako, je, kila roho bila kutengwa hupata uzima wa milele? Fahamu kwamba uzima wa milele ni mali ya zile roho ambazo ndani mwao imepuliziwa pumzi ya uzima kutoka kwa Mungu. Wote isipokuwa hawa hawana uzima--wao ni wafu, kama Kristo alivyoeleza katika aya za Injili. Yule ambaye macho yake Bwana ameyafungua ataziona roho za watu katika madaraja watakayokalia baada ya kuachiliwa kwao kutoka mwilini. Atawakuta walio hai wakisitawi ndani ya vitalu vya Bwana wao, na wafu wakiwa wamezama katika shimo la chini kabisa la upotevu.

Fahamu kwamba kila mtu ameumbwa kwa mfano wa asili ya Mungu, kila moja akiwa msafi na mtakatifu wakati wa kuzaliwa kwake. Walakini, baadaye, watu binafsi watatofautiana kulingana na njema au

maovu watakayoyapata hapa duniani. Ingawa viumbe vyote vyenye uhai katika asili yao halisi vimeumbwa vikiwa katika madaraja au viwango, kwa kuwa uwezo hutofautiana, hata hivyo kila mmoja huzaliwa akiwa mtakatifu na msafi, na ni baada ya hapo tu ndipo anaweza kunajisiwa. (A-71)

Sifa iwe kwa Mungu, moyo wako unajishughulisha katika kumbukumbu ya Mungu, roho yako inafurahishwa na habari njema za Mungu na wewe umezama katika sala. Hali ya sala ndiyo bora kabisa kuliko hali zote, kwa kuwa hapo ndipo mtu anaposhirikiana na Mungu. Sala kwa kweli hujalia uzima, hasa wakati itolewapo faraghani na nyakati zingine, wakati wa usiku wa manane baada ya kuwa huru kutokana na shughuli za kila siku. (A-72)

Leo nguvu isukumayo ya ulimwengu wa uhai ni nguvu ya Agano ambayo kama vile mshipa mkubwa hupuma katika mwili wa ulimwengu wa nasibu na hulinda umoja wa Kibaha'i.

Wabahá'í wameamriwa kusimamisha umoja wa jamii ya binadamu; ikiwa hawawezi kuunganika kuzungukia sehemu moja, watawezaje basi kuleta umoja wa jamii ya binadamu?

Kusudi la Uzuri Uliobarikiwa katika kuingia kwenye Agano na Wasia huu lilikuwa ni kukusanya viumbe vyote viishivyo kuzungukia sehemu moja, ili kwamba zile roho zisizo na fikra, ambazo katika kila kipindi na kizazi zimekuwa chanzo cha mafarakano, zisiweze kudhoofisha Hoja. Kwa hiyo, Yeye ameamuru kwamba chochote kile kitokanacho na Kitovu cha Agano ni sahihi na kipo chini ya ulinzi na fadhili Yake, ambapo vingine vyote ni kosa. (A-73)

Ewe mtumishi wa Mungu! Usihuzunike kwa taabu na maafa yaliyokupata. Maafa na taabu zote zimeumbwa kwa ajili ya mwanadamu ili kwamba aweze kuukata ulimwengu huu wa umauti–ulimwengu ambao amejiambatisha nao mno. Anapopatwa na majaribu makali na shida, hapo ndipo asili yake itanywea na atautamani ufalme wa milele–ufalme uliotakasika kutokana na adha na majanga yote. Hivi ndivyo ilivyo kwa mtu mwenye busara. (A-74)

Aina Mpya ya Watu

***Baadhi ya Sifa za
Kibahá'í***

“Madhumuni ya Mungu mmoja wa kweli katika kujidhihirisha Mwenyewe ni kuwaita wanadamu wote kwenye ukweli na unyofu, kwenye uchaji na uaminifu, kwenye kujikana na unyenyekevu kwa Amri ya Mungu, kwenye ustahimilivu na wema, kwenye uadilifu na hekima. Kusudi lake ni kumvika kila mtu vazi la tabia takatifu, na kumpamba kwa pambo la matendo matakatifu na mema“.

(Baha’u’llah, Kutoka kitabu cha Kiingereza “Gleanings from the Writings of Baha’u’llah” pg. 299)

“Sema: Jihadharini, Enyi watu wa Bahà, ili msije mkatembea katika njia za wale ambao maneno yao hutofautiana na matendo yao. Jitahidini ili muwezeshwe kudhihirisha kwa watu wa dunia ishara za Mungu, na kuakisi waziwazi amri Zake. Acheni matendo yenu yawe mwongozo kwa wanadamu wote, kwa kuwa kauli za watu wengi mno, wawe wa hali ya juu au wa hali ya chini, hutofautiana na mwenendo wao. Ni kwa kupitia matendo yenu kwamba mnaweza kujipambanua wenyewe kutoka wengine. Kwa kupitia kwayo wangavu wa mwanga wenu unaweza kutawanywa dunia nzima. Ni mwenye furaha mtu yule ambaye huufuata ushauri Wangu, na kutii amri zilizoagizwa na Yeye Ambaye ni Mjua-Yote, Mwenye Hekima—Kabisa.”

(Baha’u’llah, Kutoka kitabu cha Kiingereza “Gleanings from the Writings of Baha’u’llah” pg.305)

“ Ulimi mwema ni sumaku ya mioyo ya watu. Ni mkate wa roho, huyavika maneno kwa maana, ni chemchemi ya mwangaza wa hekima na ufahamu.... (37)

(Baha’u’llah, Kutoka kitabu cha Kiingereza “Gleanings from the Writings of Baha’u’llah” pg.. 289)

“Enyi jeshi la Mungu! Kupitia ulinzi na msaada utolewao na Uzuri Uliobarikiwa--maisha yangu na yawe dhabihu kwa wapendwa wake---lazima mjiongoze kwa namna ambayo kwayo mtaweza kujipambanua kipekee na kwa wangavu kama jua miongoni mwa roho zingine. Ikiwa yeyote kati yenu ataingia katika mji, lazima awe kitovu cha mvuto kutokana na unyofu wake, uaminifu wake na upendo, uadilifu wake na uthabiti, ukweli wake na wema wake wa upendo kwa watu wote

wa ulimwengu, ili kwamba watu wa mji huo waweze kupaza sauti na kusema: ‘Mtu huyu bila shaka ni Mbahá’í kwa adabu yake, kwa adabu yake, kwa tabia zake, mwenendo wake, maadili yake, asili yake, na hali yake huakisi sifa za Wabaha’i.’ Hadi hapo mtakapofikia daraja hili ndipo mnaweza kusemwa kuwa mmekuwa waaminifu kwa Agano na Wasia wa Mungu.”

(‘Abdu’l-Baha, Mateuzi kutoka Maandiko ya ‘Abdu’l-Baha, uk. 70-71)

“Sifa zingine za ukamilifu ni kicho cha Mungu, kumpenda Mungu kwa kuwapenda watumishi wake, kutenda kwa upole na ustahimilivu na utulivu, kuwa mnyofu, latifu, mwema na mwenye huruma; kuwa na dhamira na ujasiri, uaminifu na nguvu, kujitahidi na kujishughulisha, kuwa mkarimu, mtiifu, bila husuda, kuwa na ari na hisia ya heshima, kuwa mwadilifu na mwenye moyo mkuu, na mwenye kujali haki za wengine. Yeyote ambaye amekosa sifa hizi bora kabisa za kibinadamu ni mpungufu.”

(‘Abdu’l-Baha, Kutoka kitabu cha Kiingereza, “Secret of Divine Civilization” pg. 40)

Kujiepusha na Usengenyaji na Mzungumzo ya Udaku

“Mtafutaji huyo lazima, pia achukulie usengenyaji kama kosa baya kabisa na ajiweke mbali na milki yake, kwa kuwa usengenyaji huzima mwanga wa moyo na hufisha uhai wa roho.”

“Moto wa kimwili huteketeza mwili, lakini moto wa ulimi humaliza vyote viwili moyo na roho”.

(Baha’u’llah, Kutoka kitabu cha Kiingereza “Gleanings from the Writings of Baha’u’llah” pg. 265)

“Ewe Mwenzi wa Kiti Changu cha Ufalme! Usisikie uovu, na usiuone uovu, usijidhalilishe mwenyewe, wala kuhema kwa mashaka na kulia. Usiseme uovu, ili usiweze kuusikia ukisemwa kwako, na usiyakuze makosa ya wengine ili makosa yako mwenyewe yasije yakaonekana makubwa; na usimtakie udhilifu yeyote, ili udhilifu wako mwenyewe usije kufichuliwa.”

(Baha’u’llah, Maneno Yaliyofichwa, Na. 44, uk. 36)

“Kwa kweli nasema, ulimi ni kwa ajili ya kutaja yale yaliyo mema, msiunajisi kwa mazungumzo yasiyostahili.”

(Baha’u’llah, Kutoka “Tablets of Baha’u’llah, pg. 219)

“Enyi Wahamiaji! Ulimi nimeukusudia kwa ajili ya kunitaja Mimi, msiunajisi kwa kashfa. Kama moto wa nafsi ukiwashinda, yakumbukeni makosa yenu wenyewe na si makosa ya viumbe Wangu, kwa kuwa kila mmoja wenu anaijua nafsi yake mwenyewe zaidi kuliko anavyowajua wengine.”

Baha’u’llah, Maneno Yaliyofichwa, Na. 66, uk. 44)

“Ninatumaini kwamba kila mmoja wenu atakuwa mtenda haki, na kuelekeza mawazo yenu kwenye umoja wa jamii ya wanadamu; kwamba kamwe hamtawadhuru jirani zenu wala kusema mabaya dhidi ya yeyote; kwamba mtaheshimu haki za watu wote, na kujishughulika zaidi kwa ajili ya raghba za wengine kuliko zenu wenyewe. Hivyo ndivyo mtakuwa kurunzi za haki Takatifu, mkitenda kufuatana na mafundisho

ya Baha'u'lláh, ambaye, wakati wa maisha yake, alivumilia majaribu na mateso mengi mno ili kuuonesha ulimwengu wa jamii ya wanadamu sifa za Ulimwengu wa Mungu, akifanya iwezekane kwenu kuufahamu ukuu wa roho, na kushangilia katika Haki ya Mungu.”

*(Abdu'l-Baha, Mazungumzo ya Paris (Hekima ya Abdu'l-Baha)
uk. 160)*

“Hakuna jambo ambalo mafundisho ya Kibahá'i yametilia mkazo zaidi kuliko juu ya ulazima wa kuepukana na utafutaji wa makosa na usengenyaji, wakati daima tukiwa wenye shauku kugundua na kung'olea mbali makosa yetu wenyewe na kushinda udhaifu wetu wenyewe.”

*(Shoghi Effendi, Kutoka Kitabu cha Kiingereza “Living the Life”,
Compilation, pg.10)*

Hisani

“Hisani ni nzuri na hustahili sifa mbele ya macho ya Mungu na huchukuliwa kama mwana-mfalme miongoni mwa matendo mema.... Amebarikiwa yule ambaye humpendelea nduguye kabla yake mwenyewe. Kwa kweli, mtu kama huyo huhesabiwa, kwa wema wa Mapenzi ya Mungu ..., pamoja na watu wa Bahá....”

Baha'u'llah, Kutoka "Tablets of Baha'u'llah, pg. 71)

“Ewe Mwana wa Mtu! Wape utajiri Wangu mafukara wangu, ili mbinguni upokee kutoka katika ghala za wangavu usiofifia na hazina za utukufu wa milele.”

(Baha'u'llah, Maneno Yaliyofichwa, Na. 57, uk. 15)

“Wale ambao wana mali, walakini, lazima wawajali kabisa mafukara, kwa kuwa Mungu aliwakusudia heshima kuu wale mafukara ambao ni thabiti katika subira. Kwa uhai wangu! Hakuna heshima, isipokuwa ile ambayo Mungu anapendezewa kujalia, ambayo inaweza kulinganishwa na heshima hii. Ni baraka kuu inayowangojea mafukara wavumiliao kwa subira na kuficha mateso yao, na ni wenye heri matajiri ambao hutoa utajiri wao kwa wahitaji na kuwapendelea kabla yao wenyewe.”

“Mungu akipenda, mafukara wajibidiishe wenyewe na wajitahidi kupata njia za kujipatia riziki. Huu ni wajibu ambao, katika Ufunuo huu mkuu kabisa, umeamriwa kwa kila mmoja, na unahesabika mbele ya Mungu kama kitendo chema kabisa.”

(Baha'u'llah, Kutoka kitabu cha Kiingereza "Gleanings from the Writings of Baha'u'llah" pg. 202)

“Sasa ni wakati wa kuwachangamsha na kuwaburudisha wadhilifu kupitia upepo utiao nguvu wa upendo na usharika, na maji ya uzima ya urafiki na hisani”

(Baha'u'llah, Kutoka kitabu cha Kiingereza "Gleanings from the Writings of Baha'u'llah" pg. 7)

“Jihadharini msije mkaingilia mali ya jirani yenu. Jithibitisheni wenye kustahili kuaminika kwake, na kuwa na imani nanyi, na msiwanyime mafukara baraka ambazo neema ya Mungu imejalia juu yenu. Yeye, kwa kweli, atawafidia wale wenye hisani, na kuwalipa maradufu kwa kile walichokitoa. Hakuna Mungu aliyepo ila Yeye. Muumbo wote na milki ni Vyake.”

(Baha'u'llah, Kutoka kitabu cha Kiingereza "Gleanings from the Writings of Baha'u'llah" pg. 278

“Yeye (mtafutaji wa kweli) lazima awasaidie wale wasio na mali, na kamwe asiwanyime fadhila yake mafukara. Yeye lazima aoneshe huruma kwa wanyama, itakuwaje basi zaidi kwa binadamu mwenzake, kwa yeye ambaye amejaliwa uwezo wa kuzungumza.”

(Baha'u'llah, Kitab-I-Iqan, uk. 194)

Ubikira

“Kwa kweli, Sisi, tumeamuru katika Kitabu Chetu thawabu njema na yenye baraka tele kwa yeyote atakayeugeukia mbali uovu na kuishi maisha ya ubikira na ucha Mungu”

(Baha'u'llah, Kutoka kitabu cha Kiingereza “Gleanings from the Writings of Baha'u'llah” pg. 117

“Maisha ya ubikira na matakatifu lazima yafanywe kuwa kanuni ya kuongoza katika tabia na mwenendo wa Wabahá’í wote, vyote viwili katika uhusiano wao wa kijamii miongoni mwa wana-jamii wa jamii yao wenyewe, na katika kujumuika kwao na ulimwengu mzima kwa jumla.”

(Shoghi Effendi, Kutoka Kitabu cha Kiingereza “Advent of Divine Justice”, pg 25)

“Kuhusu swali ulilouliza kuhusiana na mtazamo wa Kibahá’í juu ya tatizo la ngono na uhusiano wake na ndoa

“Imeelezwa kwa ufupi kwamba dhana ya Kibahá’í juu ya ngono imeegemezwa juu ya imani kwamba ubikira lazima utekelezwe ipasavyo na jinsi zote mbili, si tu kwa sababu jambo lenyewe hustahili sifa kimaadili, bali pia kwa sababu ndiyo njia pekee kwa ajili ya maisha yenye furaha na mafanikio ya ndoa. Kwa hiyo uhusiano wa kingono wa aina yoyote, nje ya ndoa, hauruhusiwi, na yeyote akiukaye kanuni hii si tu atawajibika mbele ya Mungu, bali atapewa adhabu anayostahili kutoka kwa jamii.

“Imani ya Kibahá’í hutambua thamani ya msukumo wa ashiki za ngono, lakini hulaani matumizi yake haramu na yasiyofaa kama vile ufanyaji hovyoyote wa mapenzi, ndoa za mkeka na mengineyo....Matumizi yafaayo ya hisia za ngono ni haki ya kiasili ya kila mmoja, na ni haswa kwa kusudi hili hili kwamba shirika la ndoa limewekwa.”

(Shoghi Effendi, Imenukuliwa katika Ujumbe kutoka Nyumba ya Haki ya Ulimwengu, 1968-1973, uk.107-108)

“Ubikira humaanisha vyote viwili kabla na baada ya ndoa yawepo maisha yasiyo na mawaa, ya ubikra. Kabla ya ndoa ubikra kamili, baada ya ndoa uaminifu kamili kwa mwenzi uliyemchagua. Uaminifu katika vitendo vyote vya ngono, uaminifu katika maneno na matendo.”

(Shoghi Effendi, Imenukuliwa katika Ujumbe kutoka Nyumba ya Haki ya Ulimwengu, 1968-1973, uk.108)

“...ni wazi kutoka mafundisho ya Baha’u’lláh kwamba uhanithi siyo hali ambayo mtu anapaswa kuikubali, kwani ni upotoshaji wa asili yake akiwa wa kiume au wa kike ambao lazima udhibitiwe na kushindwa. Hii inaweza kuhitaji jitihada kubwa, lakini ni sawa na jitihada ya mtu avutiwaye na jinsi tofauti na yake kuzuia tamaa zake. Zoezi la kujizuia nafsi katika jambo hili, kama vile katika mambo mengi sana ya maisha, lina matokeo yenye manufaa juu ya maendeleo ya roho.”

(Nyumba ya Haki ya Ulimwengu, Ujumbe kutoka Nyumba ya Haki ya Ulimwengu, 1968-1973, uk. 110)

Usafi

“Muwe asili ya usafi miongoni mwa binadamu...katika hali zote fuateni tabia iliyo safi... msiache dalili yoyote ya uchafu ionekane kwenye nguo zenu...Jizamisheni wenyewe katika maji safi; maji yaliyokwishatumika hayaruhusiwi...”

(Baha’u’llah, Baha’u’llah na Wakati Mpya, uk. 90)

“Kisafisheni kila kitu kichafu kwa maji ambayo hayajapitia katika mojawapo ya mabadiliko ‘matatu’ (rangi, ladha, harufu); jihadharini msitumie maji ambayo yameathiriwa na hewa (yaliyotuada) au na kitu kingine chochote.”

(Baha’u’llah, Kitab-i-Aqdas, imenukuliwa kutoka katika Mathibitisho ya Kibaha’i na Mirza Abu’I-Fazl. uk. 86)

“Maana yake ni kwamba usafi wa kimwili pia huwa na athari juu ya roho ya binadamu.”

(Abdu’l-Baha, Mateuzi kutoka Maandiko ya ‘Abdu’I-Baha, uk. 147)

“Fanyeni basi jitihada kubwa,...kwamba katika kila aina ya ubora watu wa Mungu watawapita binadamu wengine wote; kwamba kwa nje na kwa ndani watathibitisha kuwa bora kuliko wengine; kwamba kwa usafi, unadhifu, utakaso, na utunzaji wa afya watakuwa viongozi wa mbele wa wale wajuao. Na kwamba kwa uhuru wao kutoka utumwani, elimu yao, kujidhibiti kwao, watakuwa wa kwanza miongoni mwa wasafi, walio huru na wenye hekima.”

(‘Abdu’l-Baha, Mateuzi kutoka Maandiko ya ‘Abdu’I-Baha, uk.150)

“... Katika kila hali ya maisha, usafi na utakatifu, unadhifu na utakaso, hutukuza hali ya binadamu na huendeleza ukuaji wa uhalisi wa ndani wa mtu. Hata katika milki ya kimwili, usafi utasaidia kuleta hali ya kiroho, kama Maandiko Matakatifu yasemavyo wazi. Na ingawa usafi wa kimwili ni jambo la kimaumbile, hata hivyo, una uwezo mkubwa juu ya maisha ya roho.”

(‘Abdu’l-Baha, Mateuzi kutoka Maandiko ya ‘Abdu’I-Baha, uk. 146-147.)

Adabu

“Enyi watu wa Mungu! Nawaasa kuzingatia adabu. Kwa kuwa juu ya mengine yote, ni mwana-mfalme wa njema...Yeyote ambaye amejaliwa adabu kwa hakika amefikia kwenye daraja la juu kabisa.”

(Baha'u'llah, Kutoka "Tablets of Baha'u'llah, uk. 88)

“Sisi, kwa kweli, tumeichagua adabu, na kuifanya alama halisi ya wale walio karibu na Yeye. Adabu, kwa ukweli, ni vazi ambalo huwafaa watu wote, wawe wadogo au wakubwa. Heri ni yake yule ambaye hulipamba hekalu lake kwayo, na ole wake yule ambaye amenyimwa baraka hii kuu.”

(Baha'u'llah, Bustani Mpya, uk. 92)

“Sema: Acheni ukweli na adabu viwe pambo lenu.... Acheni matendo yenu yawe mwongozo kwa wanadamu wote, kwa kuwa kauli za watu wengi mno, wawe wa hali ya juu au wa hali ya chini, hutofautiana na mwenendo wao..”

(Baha'u'llah, Kutoka kitabu cha Kiingereza "Gleanings from the Writings of Baha'u'llah" pg. 88)

“Acha tabia yako iwe ya huruma. Acha ionekane kwamba umejazwa na upendo kwa wote. Unapokutana na mgeni, zungumza naye kana kwamba ni rafiki; akionekana kuwa mpweke jaribu kumsaidia, mpe huduma kwa ridhaa yako....Kwa kufanya hivyo, utadhihirisha kwamba si kwa maneno tu, bali kwa vitendo na kwa ukweli, unawafikiria watu wote kama ndugu zako.”

“Kuna faida gani katika kukubali kwamba urafiki kwa wote ni jambo jema, na kuzungumzia juu ya umoja wa mbari ya wanadamu kama jambo kuu kabisa? Vinginevyo fikra hizi zimewekwa katika ulimwengu wa vitendo, zinakuwa hazina maana yoyote”.

(‘Abdu'l-Baha, Mazungumzo ya Paris (Hekima ya Abdu'l-Baha), uk. 16.)

“... yeye hufikiria mojawapo ya wajibu mkuu kabisa wa kizazi chenu cha waumini ni kuishi maisha ya Kibaha’i; lazima muoneshe, kwa viwango vya hali ya juu vya maadili yenu, adabu yenu, uadiilifu na ubora wenu, kwamba Imani yetu si ya maneno bali kwa kweli hugeuza moyo na mwenendo wa wafuasi wake.”

*(Kutoka barua iliyoandikwa kwa niaba ya Shoghi Effendi,
“Living the Life”, Compilation, pg 25.)*

Usawa wa Wanaume na Wanawake

“Yeye ameanzisha usawa wa mwanaume na mwanamke. Hili ni jambo la kipekee katika mafundisho ya Baha’u’lláh, kwa kuwa dini zingine zote zimemuweka mwanaume juu ya mwanamke.”

(‘Abdu’l-Baha, *Kutoka Kitabu cha Kiingereza “Baha’i World Faith”* pg. 247.)

“Kwa kuwa ulimwengu wa binadamu una sehemu mbili au viungo viwili: kimoja ni mwanamke; kingine mwanaume. Hadi hapo viungo hivi viwili vitakapokuwa sawa katika nguvu, umoja wa binadamu hauwezi kusmamiishwa, na furaha na heri ya mwanadamu haitakuwa halisi. Mungu akijalia, jambo hili litakuwa hivyo.”

(‘Abdu’l-Baha, *Uenezaji wa Amani ya Ulimwengu*, uk. 77.)

“... Lazima kuwepo usawa wa haki kati ya wanaume na wanawake. Wanawake watapata upendeleo sawa wa elimu. Hii itawawezesha kustahili na kuendelea katika madaraja yote ya kazi na matimilizo. Kwa kuwa ulimwengu wa binadamu una mabawa mawili: mwanaume na mwanamke. Ikiwa bawa moja hubakia bila uwezo na lenye kasoro, litazuia uwezo wa lingine, na urukaji kamili hautawezekana. Kwa hiyo, utimilifu na ukamilifu wa ulimwengu wa binadamu hutegemea juu ya maendeleo sawa ya mabawa haya mawili.”

(‘Abdu’l-Baha, *Uenezaji wa Amani ya Ulimwengu*, uk. 318.)

“Ukosefu wa maendeleo ya wanawake na ustadi umetokana na uhitaji wake wa elimu na nafasi sawa. Laiti angeruhusiwa usawa huu, bila shaka angekuwa mwenza wa mwanaume katika uwezo na uhodari. Furaha ya jamii ya binadamu itapatikana pale wanawake na wanaume watakapolingana na kuendelea kwa usawa, kwa kuwa kila mmoja ni ukamilisho na msaidizi wa mwingine.”

(‘Abdu’l-Baha, *Kutoka Kitabu cha Kiingereza “Baha’i World Faith”* pg. 241)

“... Baha’u’lláh ametangaza uhalisi wa umoja wa ulimwengu wa binadamu na kutangaza kwamba mataifa yote, watu na mbari ni moja. Yeye ameonesha kwamba ingawa watu binafsi wanaweza kutofautiana katika maendeleo na uwezo, kimsingi na kiasili ni sawa kama binadamu...”

“Kwa hiyo, jitahidini kuonesha katika ulimwengu wa binadamu kwamba wanawake ni wenye uwezo na ufanisi kabisa, kwamba mioyo yao ni myororo zaidi na myepesi kuguswa kuliko mioyo ya wanaume, kwamba wao...ni waelekevu zaidi kwa wahitaji na watesekao, kwamba ni wapinzani shupavu wa vita na ni wapenda amani. Jitahidini kwamba fikra ya amani ya kimataifa iweze kutambuliwa kupitia jitihada za jamii ya wanawake, kwa kuwa mwanaume ameelekea zaidi kwenye vita kuliko mwanamke, na ushuhuda halisi wa ubora wa mwanamke utakuwa huduma na ufanisi wake katika usimamishaji wa Amani ya Ulimwengu.”

(‘Abdu’l-Baha, Uenezaji wa Amani ya Ulimwengu, uk. 283-284.)

“Yeye (Baha’u’lláh) alitangaza kwamba kwa kuwa wote wameumbwa katika sura na mfano wa Mungu mmoja, hakuna tofauti ya jinsi katika ukadiriaji wa Mungu. Yule ambaye ni msafi kabisa moyoni, ambaye elimu yake huzidi na ambaye huzidi katika wema kwa watumishi wa Mungu, yu karibu kabisa na kipenzi kabisa kwa Bwana, Muumba wetu, bila kujali jinsi.”

(‘Abdu’l-Baha, Uenezaji wa Amani ya Ulimwengu, uk. 394.)

“Walimu wa kwanza wa watoto ni kina mama. Kwa hiyo, ni lazima wafundishwe kwa ustadi ili kuwaelimisha wote wawili; watoto wa kiume na watoto wa kike.”

(‘Abdu’l-Baha, Uenezaji wa Amani ya Ulimwengu, uk. 175.)

Furaha

“Ewe Mwana wa Mtu! Shangilia katika furaha ya moyo wako, ili kwamba uweze kustahili kukutana Nami na kama kioo kuonesha kwa uwazi uzuri Wangu.”

(‘Baha’u’llah, Maneno Yaliyofichwa, Na. 36 uk. 10.)

“Mtu aelekezapo uso wake kwa Mungu huuona mwangaza wa jua kila mahali.”

(‘Abdu’l-Baha, Mazungumzo ya Paris (Hekima ya Abdu’l-Baha), uk. 15.)

“Dini ni nuru ya ulimwengu, na maendeleo, mafaniko, na furaha ya mtu hutokana na utii kwa sheria zilizowekwa katika Vitabu vitakatifu.”

(‘Abdu’l-Baha, Kutoka Kitabu cha Kiingereza, Secret of Divine Civilization” pg. 71.)

“Furaha ya kiroho daima huleta shangwe. Upendo wa Mungu huleta furaha isiyo na kikomo.

“Kuhusu furaha ya kiroho, huu ndiyo msingi halisi wa maisha ya mtu, kwa kuwa maisha yameumbwa kwa ajili ya furaha, siyo kwa ajili ya huzuni; kwa ajili ya raha, siyo kwa ajili ya majonzi. Furaha ni uhai.... Furaha hii si kingine bali ni upendo wa Mungu....”

(‘Abdu’l-Baha, Kutoka Kitabu cha Kiingereza “Divine Art of Living” pg.16, 18)

“Furaha kuu ni ya mtu, na yeye huona ishara za Mungu katika ulimwengu na katika roho ya binadamu, ikiwa atahimiza farasi wa juhudi ya hali ya juu katika uwanja wa ustaarabu na haki.”

(‘Abdu’l-Baha, Kutoka Kitabu cha Kiingereza “Divine Art of Living” pg. 4.)

“Mtu yeyote anaweza kuwa mwenye furaha katika hali ya faraja, raha, siha njema, mafanikio, starehe na shangwe; lakini kama mtu atakuwa mwenye furaha na kuridhika katika wakati wa taabu, shida na maradhi yaeneayo, huo ni uthibitisho wa ubora.”

*(‘Abdu’l-Baha, Kutoka Kitabu cha Kiingereza “Baha’i World Faith”
pg. 363)*

“Waumini lazima waoneshe imani yao katika maisha yao ya kila siku, ili kwamba ulimwengu uweze kuuona mwangaza uking’aa kwenye nyuso zao. Uso mwangavu na wenye furaha huwafurahisha watu njiani mwao. Kama una huzuni na ukampita mtoto ambaye anacheka, mtoto huyo, kwa kuuona uso wako, ataacha kucheka, asijue kwa nini.”

*(‘Abdu’l-Baha, Kutoka Kitabu cha Kiingereza “Pattern of
Baha’i Life” Compilation. 56.)*

“Jambo kuu ni ‘kuishi maisha’ – kuyafanya maisha yetu yawe yaliyojawa na mafundisho Matakatifu na Moyo wa Kibahá’i kwamba watu hawawezi kushindwa kuona furaha, uwezo, upendo, usafi, wangavu, ufanisi katika tabia zetu na kazi ambavyo vitatupambanua kutoka watu wenye mawazo ya kidunia na kuwafanya watu kujiuliza ni nini siri ya maisha haya mapya ndani mwetu.”

*(Kutoka barua iliyoandikwa kwa niaba ya Shoghi Effendi,
“Living the Life”, Compilation, pg. 9.)*

“Ni wakati wa kushangilia. Jua la Baha’u’lláh linapanda mbinguni, likileta katika mwangaza unaozidi kung’aa daima, tofauti baina ya giza, kukata tamaa, wasiwasi na fadhaa ya ulimwengu, na wangavu, imani, furaha na yakini ya wapendwa wake. Inueni mioyo yenu. Siku ya Mungu iko hapa.”

(Nyumba ya Haki ya Ulimwengu, Ujumbe wa Ridvan, 140 B.E. (1983))

Ukarimu

“ Msiache mtindo wa desturi fulani kuwafanya muonekane baridi na msio na huruma mkutanapo na wageni kutoka nchi zingine. Msiwatazame kana kwamba mnawashuku kuwa ni waovu, wezi na watovu wa adabu...,Nawaomba msijifikirie ninyi wenyewetu. Muwe wema kwa wageni, iwapo wamekuja kutoka Uturuki, Japani, Uajemi, Urusi, China au nchi nyingine yoyote ulimwenguni.”

“ Wasaidieni ili wajisikie kama wako nyumbani; waulizeni wanakoishi, waulizeni ikiwa mnaweza kuwapa huduma yoyote; jaribuni kuyafanya maisha yao yawe kidogo yenye furaha zaidi....Acha wale wanaokutana nawe wajue, bila wewe mwenyewe kujitangaza ukweli kwamba wewe hakika ni Mbahá’í.”

(‘Abdu’l-Baha, Mazungumzo ya Paris (Hekima ya ‘Abdu’l-Baha), uk. 15.)

“Mkikutana na wale wa mbari na rangi tofauti na yenu, msiwashuku na kukimbilia katika tundu lenu la mila na desturi, bali wafurahieni na kuwaonesha wema. Wafikirieni kama maua yenye rangi tofauti tofauti ya mawaridi yameayo katika bustani nzuri ya jamii ya wanadamu, na shangilieni kuwa miongoni mwao.”

(‘Abdu’l-Baha, Mazungumzo ya Paris (Hekima ya ‘Abdu’l-Baha), uk. 46)

“ Enyi marafiki! Undugu, undugu! Upendo, upendo! Umoja, umoja! – ili kwamba nguvu ya Hoja ya Kibahá’í uweze kutokeza na kudhihirika katika ulimwengu wa uhai.”

(‘Abdu’l-Baha, Nyaraka za Mpango Mtakatifu, uk. 50)

“Nyumba yangu ni nyumba ya amani. Nyumba yangu ni nyumba ya shangwe na furaha. Nyumba yangu ni nyumba ya cheko na nderemo. Yeyote aingiaye kupitia malango ya nyumba hii, lazima aondoke na moyo wenye furaha. Hii ni nyumba ya nuru; Yeyote aingiaye humu lazima aangaziwe. Hii ni nyumba ya ujuzi; yule aingiaye humu lazima apate ujuzi.

Hii ni nyumba ya upendo; wale waingiao humu lazima wajifunze somo ya upendo; hivyo waweze kujua namna ya kupendana.”

(‘Abdu’l-Baha, Kutoka Kitabu cha Kiingereza, “Star of The West, Vol. IX, No. 4, pg. 40)

“Siyo sote tuna uwezo wa kutoa huduma kwa njia inayolingana, lakini ile njia moja ambayo kila Mbahá’i anaweza kueneza Imani ni kwa kuonesha mfano. Jambo hili hugusa mioyo ya watu kwa kina zaidi kuliko maneno daima yawezavyo kufanya.”

“Upendo tuwaoneshao wengine, ukarimu na uelewa, utayari wa kuwasaidia, haya ndiyo matangazo bora kabisa ya Imani. Watataka kusikia kuhusu Imani wanapoona mambo haya katika maisha yetu.”

(Kutoka barua iliyoandikwa kwa naba ya Shoghi Effendi, “Living the Life”, Compilation, pg. 19)

Haki na Usawa

“Haki na usawa ni Walinzi pacha ambao huwalinda watu.”

(*‘Baha’u’llah, Kutoka Kitabu cha Kiingereza, “Tablet to the Son of the Wolf” pg. 13*)

“Madhumuni ya haki ni utokezaji wa umoja miongoni mwa watu.”

(*‘Baha’u’llah, Kutoka “Tablets of Baha’u’llah”, pg. 67*)

“Muwe wenye haki ninyi kwenu wenyewe na kwa wengine, ili ushahidi wa haki uweze kufunuliwa, kwa kupitia matendo yenu, kati ya watumishi Wetu waaminifu.”

(*‘Baha’u’llah, Kutoka kitabu cha Kiingereza “Gleanings from the Writings of Baha’u’llah” pg. 278*)

“Asili ya hekima ni kicho cha Mungu, hofu ya maafu na adhabu Yake, na woga wa haki Yake na amri.

(*‘Baha’u’llah, Kutoka “Tablets of Baha’u’llah”, pg. 155*)

“Enyi Waonevu wa Duniani! Ondoeni mikono yenu kutoka kwenye udhalimu, kwa maana nimejiahidi Mwenyewe kutosamehe udhalimu wa mtu yeyote.”

(*‘Baha’u’llah, Maneno Yaliyofichwa, Na. 64, uk. 43*)

“Ewe Mwana wa Roho! Kipenzi kabisa kuliko vitu vyote mbele ya macho Yangu ni Haki: usiikwepe ikiwa unanihitaji Mimi, na wala usiipuuze ili Mimi nipate kukufanya kuwa msiri Wangu. Kwa msaada wake utapata kuona kwa macho yako mwenyewe na siyo kwa macho ya wengine, na utapata kujua kwa akili yako mwenyewe na siyo kwa akili ya jirani yako. Waza hili moyoni mwako; jinsi inavyokupasa uwe. Hakika haki ni zawadi Yangu kwako na ishara ya wema Wangu wa upendo. Basi iweke mbele ya macho yako.”

(*‘Baha’u’llah, Maneno Yaliyofichwa, Na. 2, uk. 2*)

“Enyi watu wa Mungu! Kile kiufunzacho ulimwengu ni Haki, kwa kuwa inashikiliwa na nguzo mbili, thawabu na adhabu.”

(*‘Baha’u’llah, Kutoka “Tablets of Baha’u’llah”, pg. 128-129*)

“Yeyote ashikiliaye haki, hawezi, kwa vyovyote vile, kuvuka mipaka ya kiasi.”

(‘Baha’u’llah, Kutoka kitabu cha Kiingereza “Gleanings from the Writings of Baha’u’llah” pg. 342)

“Ufalme wa Mungu umewekwa juu ya msingi wa usawa na haki, na pia juu ya rehema, huruma na wema kwa kila roho iliyo hai. Basi jitahidini kwa moyo wenu wote kuwatendea kwa huruma binadamu wote—isipokuwa kwa wale ambao wana kiasi fulani cha ubinafsi, nia ya siri, au aina fulani ya maradhi ya roho. Wema hauwezi kuoneshwa kwa mdhalimu, mdanganyifu, au mwizi, kwa sababu, mbali na kuwazindua kutambua kosa la mazoea yao, unawafanya waendeleo katika upotovu wao kama awali. Haidhuru utumie wema mwingi namna gani kwa mwongo, atazidi tu kudanganya, kwa kuwa yeye huamini kwamba wewe wadangayika, ambapo unamuelewa vyema kabisa, na unabaki kimya tu kutokana na huruma yako iliyopitiliza.”

(‘Abdu’l-Baha, Mateuzi kutoka Maandiko ya Abdu’l-Baha, uk. 158)

“Sifa ya pili ya ukamilifu ni haki na kutopendelea. Hii humaanisha kutojali manufaa binafsi na faida za kibinafsi, na kutekeleza sheria za Mungu bila kufikiria hata kidogo jambo lingine lolote. Humaanisha kujiona mwenyewe kama mmoja tu wa watumishi wa Mungu, Mmiliki wa Vyote, na isipokuwa kwa kutamani kujipatia heshima ya kiroho, bila kamwe kujaribu kujitofautisha na wengine. Humaanisha kufikiria usitawi wa jamii kama wake yeye mwenyewe. Humaanisha, kwa ufupi, kuwachukulia wanadamu kama mtu mmoja, na mtu mwenyewe kama sehemu ya kiumbe huyo wa kimwili, na kujua kwa hakika kwamba ikiwa maumivu au madhara hukiumiza kiungo chochote cha mwili huo, lazima bila kuepukika yasababishe maumivu kwa viungo vingine vyote.”

(‘Abdu’l-Baha, Kutoka kitabu cha Kiingereza, “Secret of Divine Civilization” pg. 40)

“Watu wote ni sawa mbele ya sheria, ambayo lazima itawale kikamilifu.”

“...Mwana-mfalme, lodi na mkulima wote wana haki ya kutendewa sawa sawa, lazima usioneshwe upendeleo kwa mtu mmoja mmoja. Hakimu lazima asiwe ‘mheshimu watu,’ bali asimamie sheria pasipo upendeleo kabisa katika kila shauri liletwalo mbele yake.”

(‘Abdu’l-Baha, *Mazungumzo ya Paris (Hekima ya Abdu’l-Baha)*, uk. 154)

“Haki haina mipaka, ni sifa ya ulimwengu. Utendaji wake lazima utekelezwe katika matabaka yote, kutoka tabaka la juu kabisa hadi la chini kabisa. Haki lazima iwe takatifu, na haki za watu wote lazima zizingatiwe....

“Kila mtu amewekwa katika mahali pa heshima, ambapo hapaswi kupaacha. Mfanyakazi mnyenyekevu ambaye hutenda udhalumu lazima alaumiwe sawa sawa na dhalimu maarufu. Hivyo, sote tuna chaguo letu kati ya haki na dhuluma.

“Natumaini kwamba kila mmoja wenu atakuwa mtenda haki, na kuelekeza fikra zenu kwenye umoja wa wanadamu; kwamba hamtawadhuru jirani zenu wala kusema mabaya dhidi ya yeyote; kwamba mtaheshimu haki za watu wote, na kujishughulisha zaidi na maslahi ya wengine kuliko yenu ninyi wenyewe.”

(‘Abdu’l-Baha, *Mazungumzo ya Paris (Hekima Ya ‘Abdu’l-Baha)*, uk. 159-160)

“Unyofu huu wa mwenendo, pamoja na matokeo yake ya haki, usawa, ukweli, uwazi, kutopendelea, utumainifu na uaminifu lazima vitofautishe kila sura ya maisha ya jamii ya Kibahá’i.”

(Shoghi Effendi, *Kutoka Kitabu cha Kiingereza, “The Advent of Divine Justice”*, pg. 19)

“Kama vile msamaha ulivyo mojawapo ya sifa za Yule Mwenye Rehema, vivyo hivo pia haki ni mojawao ya sifa za Bwana. Hema la uhai limeshikiliwa na nguzo ya haki, na si juu ya msamaha. Kuendelea kwa jamii ya binadamu hutegemea juu ya haki na siyo juu ya msamaha.

“...Hivyo kile Kristo alichomaanisha kwa msamaha na radhi si kwamba, wakati mataifa yawashambuliapo, kuchoma nyumba zenu, kupora mali zenu, kushambulia wake, watoto, na ndugu zenu, na kuvunja heshima yenu, lazima muwe watiifu mbele ya maadui hawa wadhalimu, na kuwaruhsu kufanya ukatili wao wote na ukandamizaji. La, maneno ya Kristo yanahusu mwenendo wa watu wawili mmoja kwa mwingine: ikiwa mtu mmoja humshambulia mwingine, yule aliyedhuriwa sharti amsamehe. Lakini jumuiya sharti zilinde haki za mtu.”

(‘Abdu’l-Baha, imenukuliwa katika Kitabu cha Kiingereza, “Principles of Baha’i Administration”, pg. 37-38)

Elimu

“Elimu ni mojawapo ya zawadi za ajabu za Mungu. Imempasa kila mtu kuipata.”

(Baha’u’llah, Kutoka “Tablets of Baha’u’llah”, pg. 39)

“Katika ukadiriaji wa watu wa Bahá utukufu wa mtu umo katika elimu yake, unyofu wa mwenendo wake, sifa yake njema, hekima yake . . . “

(Baha’u’llah, Kutoka “Tablets of Baha’u’llah”, pg. 68)

“Kalamu ya Utukufu humshauri kila mmoja kuhusu mafunzo na elimu ya watoto.”

(Baha’u’llah, Kutoka “Tablets of Baha’u’llah”, pg. 128)

“Fahamu kwa ukweli kwamba elimu ni ya aina mbili: Ya Mbinguni na ya Kishetani. Moja hububujika kutoka chemchemi ya uvuvio mtakatifu, nyingine ni uakisi tu wa mawazo tupu na hafifu. Asili ya ile ya kwanza ni Mungu Mwenyewe; nia isukumayo ile ya pili ni mning’ono wa tamaa za ubinafsi. Moja huongozwa na kanuni: ‘Mwogopeni Mungu; Mungu atawafundisha; nyingine ni uthibitisho tu wa ule ukweli usemao: ‘Elimu ni pazia zito mno kati ya mtu na Muumba wake.’ Ya kwanza huleta tunda la subira, la shauku ya kutamani, la ufahamu wa kweli, na upendo; ambapo ya pili haiwezi kuleta chochote bali kiburi, majivuno na makuu.”

(Baha’u’llah, Kitab-i-Iqan, uk. 44)

“Yule Aliye Mkuu husema: Mfikirie mtu kama mgodi uliojaa vito vyenye thamani isiyokadirika. Elimu pekee, yaweza, kusababisha ufichue hazina zake, na kumwezesha mwanadamu kunufaika kutoka humo.”

(Baha’u’llah, Kutoka kitabu cha Kiingereza “Gleanings from the Writings of Baha’u’llah” pg. 260)

“Baha’u’lláh hutamka kwamba binadamu wote lazima wapate ujuzi na wajipatie elimu. Hii ni kanuni ya lazima ya imani ya dini na ushikiliaji wake ni jambo jipya linalotofautisha kipindi hiki kipya kitakatifu.”

(‘Abdu’l-Baha, Kutoka Kitabu cha Kiingereza “Baha’i World Faith” pg. 247)

“Wale walioelimika kiroho ni taa za uongozi miongoni mwa mataifa, na nyota za bahati njema zing’azo kutoka peo za jamii ya binadamu....

“Wale walioelimika kiroho ni lazima wapambanuliwe kwa vyote viwili, kwa ukamilifu wa ndani na wa nje; lazima wawe na tabia njema, asili ongofo, nia safi, hali kadhalika uwezo wa kiakili, wangavu na ufahamivu, wepesi wa kung’amua, busara na uwezo wa kuona mbele, ukadirifu, staha, na uchaji Mungu wa kweli. Kwa kuwa mshumaa ambao haujawashwa, ingawa ni mkubwa kwa kipenyo na urefu, si bora zaidi kuliko mnazi tasa au fungu la kuni kavu.

(‘Abdu’l-Baha, Kutoka kitabu cha Kiingereza, “Secret of Divine Civilization” pg. 33-34)

“Hitaji la msingi, na la haraka ni uendelezaji wa elimu. Haiyumkiniki kwamba taifa lolote laweza kupata usitawi na mafanikio vinginevyo jambo hili kuu, jambo hili la kimsingi limetangulizwa. Sababu kubwa ya kuporomoka na kuanguka kwa watu ni ujinga.”

(‘Abdu’l-Baha, Kutoka kitabu cha Kiingereza, “Secret of Divine Civilization” pg. 109)

Utovu wa Chuki

“Andamaneni na wafuasi wa dini zote kwa moyo wa urafiki na upatano. Chochote kilichosababisha wana wa watu kutengana mmoja kwa mwingine, na kimesababisha mafarakano na migawanyiko miongoni mwao, kimefutwa na kukomeshwa, kupitia ufunuo wa maneno haya.”

(Baha'u'llah, Kutoka kitabu cha Kiingereza “Gleanings from the Writings of Baha'u'llah” pg. 95)

“Acha mtu asijitukuze katika hili kwamba anaipenda nchi yake, bali ajitukuze katika hili kwamba anaipenda aina yake.”

(Baha'u'llah, Kutoka “Tablets of Baha'u'llah”, pg. 127-128)

“Uwe mwenye haki katika maamuzi yako, na mwangalifu katika kauli yako. Usiwe mwenye dhuluma kwa mtu yeyote, na oneshwa upole wote kwa watu wote..”

(Baha'u'llah, Kutoka kitabu cha Kiingereza “Gleanings from the Writings of Baha'u'llah” pg. 285)

“Fumbeni macho yenu kwenye tofauti za mbari na wakaribisheni wote kwa nuru ya umoja.”

(Baha'u'llah, Kutoka Kitabu cha Kiingereza “Advent of Divine Justice”, pg. 31)

“Hadi hapo mataifa na watu wote watakapounganishwa kwa mafundo ya Roho Mtakatifu katika undugu huu halisi, hadi hapo ubaguzi wa kitaifa na wa kimataifa utakapofutwa katika uhalisi wa undugu huu wa kiroho, maendeleo ya kweli, usitawi na furaha ya kudumu havitafikiwa na mwanadamu.”

(Abdu'l-Baha, Kutoka Kitabu cha Kiingereza “Baha'i World Faith” pg. 227)

“Na miongoni mwa mafundisho ya Baha'u'lláh ni, kwamba chuki za kidini, kimbari, kisiasa, kiuchumi na kitaifa, huteketeza jengo la jamii ya binadamu. Kadiri chuki hii inavyoendelea kuwepo, ndivyo ulimwengu wa jamii ya binadamu utakavyokosa utulivu.”

(Abdu'l-Baha, Kutoka Kitabu cha Kiingereza “Baha'i World Faith” pg. 286)

“Baha’u’lláh pia amefundisha kwamba chuki, iwe ya kidini, kimbari, kitaifa au ya kisiasa ni mharabu kwa misingi ya maendeleo ya binadamu. Chuki ya aina yoyote ni mharabu kwa furaha na usitawi wa binadamu.”

(Abdu’l-Baha, Kutoka Kitabu cha Kiingereza “Baha’i World Faith” pg. 240)

“Mungu hatofautishi kati ya watu weupe na weusi. Ikiwa mioyo ni safi wote wanakubalika Kwake.... Hakuna tofauti au upendeleo kwa roho yoyote katika milki ya haki na usawa Wake. Mungu hakufanya utengano huu; utengano huu una chanzo chake katika mwanadamu mwenyewe....Baha’u’lláh amesema kwamba watu wa mbari mbalimbali za jamii ya binadamu husaidia kuleta upatano na uzuri wa rangi kwa jamii nzima. Kwa hiyo, acha wote washirikiane, katika bustani hii kuu ya binadamu kama vile maua yameavyo na kuchangamana bega kwa bega bila kugombana au kutopatana kati yao.”

(Abdu’l-Baha, Kutoka Kitabu cha Kiingereza “Advent of Divine Justice”,.31)

“Anuwai katika familia ya binadamu yapaswa kuwa chanzo cha upendo na upatano, kama ilivyo katika muziki ambamo sauti nyingi mbali mbali huchangamana pamoja katika kufanya sauti iliyo kamili.... Mkikutana na wale wa mbari na rangi tofauti na yenu, msiwashuku na kukimbilia katika tundu lenu la mila na desturi, bali wafurahieni na kuwaonesha wema.”

(Abdu’l-Baha, Kutoka Kitabu cha Kiingereza “Advent of Divine Justice”,. 32)

“Uhuru utokanao na chuki ya kimbari, katika hali zake zozote, lazima....ichukuliwe kama neno la shime kwa kundi lote la...waumini.... sharti daima uoneshwe katika kila aina ya shughuli na maisha yao, iwe ndani ya jamii ya Kibahá’i au nje yake.... “

(Shoghi Effendi, Kutoka Kitabu cha Kiingereza “Advent of Divine Justice”pg.30)

Uhuru Kutokana na Ukabila

“Jambo la pili” (kumbuka: siasa ni jambo la kwanza) “ambalo husababisha matatizo kwa marafiki wa Kiafrika katika siku hizi ni suala la ukabila. Kama Wabahá’í wamejiridhisha kwamba wanadamu ni wamoja na lazima watazamwe kama kitu kimoja, lakini, kama watu wa makabila tofauti, wanajikuta wakitegemewa na ndugu zao wasio Wabahá’í, kuwa waaminifu kwanza kwa, na hata kuyashikilia kwa shari mambo hayo kwa raghba ya kabila lao. Aidha, huishi katika mazingira ambayo mara nyingi mno ni ya kutoaminiana, woga na hata chuki dhidi ya watu wa makabila mengine.

“Msimamo wa Kibahá’í katika hali kama hiyo umeelezwa wazi katika Maandiko. Kama Wabahá’í tumefungamana na makabila na koo zetu, kama vile tulivyo kwa familia zetu na, kwa kiasi kikubwa zaidi, kwa mataifa yetu, lakini haturuhusu mfungamano huu uhitilafiane na uaminifu wetu mpana zaidi kwa binadamu. Wafuasi wa Imani, Mlinzi ameeleza wazi, ‘hawatasita kuweka chini kila maslahi mahsusi, yawe ya mtu binafsi, ya kanda au ya kitaifa, kwa ajili ya raghba kuu ya jamii nzima ya binadamu, wakijua fika kabisa kwamba katika ulimwengu wa watu na mataifa yanayotegemeana, manufaa ya sehemu moja hufikiwa vyema zaidi na manufaa ya kitu kizima, na kwamba hakuna matokeo ya kudumu yawezayo kupatikana kwa sehemu yoyote mojawapo ikiwa maslahi ya pamoja ya kitu chenyewe yamepuuzwa’.”

(Nyumba ya Haki ya Ulimwengu, Ujumbe kutoka Nyumba ya Haki ya Ulimwengu, 1968-1973, uk.48)

“Katika siku hizi wakati wasiwasi wa makabila unaongezeka barani Afrika, marafiki lazima wawe waangalifu kutoruhusu alama yoyote ya chuki au kinyongo, Mungu aepushie mbali, kuweza kuingia katikati yao. Kinyume chake, wangejitahidi kuingiza katika Imani uwakilishaji mkubwa zaidi wa makabila mbali mbali katika kila nchi, na kupitia utovu kabisa wa chuki, hali kadhalika kupitia upendo ambao Wabahá’í wanao mmoja kwa mwingine na kwa majirani zao wasio Wabahá’í, wathibitishe kwa wananchi wenzao kile Neno la Mungu liwezacho kufanya. Hivyo watatoa, kwa ajili ya uchunguzi wa viongozi na watawala wa nchi

zao, mfano ung’ao wa jamii iliyounganika, ikifanya kazi pamoja kwa maelewano na mapatano kamili, ikionesha tumaini ambalo laweza kupatikana, na mfano ustahilio kuigwa.

“Kubagua makabila yoyote kwa sababu ya uchache wao ni uvunjaji wa roho ihuishayo Imani ya Baha’u’lláh.”

(Nyumba ya Haki ya Ulimwengu, Ujumbe kutoka Nyumba ya Haki ya Ulimwengu, 1968-1973, uk. 49)

Upendo na Umoja

“Katika hali zote, ikiwa katika dhiki au faraja, ikiwa ameheshimiwa au kuteswa, Mdhulumiwa Huyu amewaamuru watu wote kuonesha wazi upendo, huba, huruma na upatano.”

(Baha'u'llah, Kutoka “Tablets of Baha'u'llah”, pg.72-73)

“Ewe Mwana wa Mtu! Nilipendezwa kuumbwa kwako, ndipo nikakuumba. Kwa hiyo, unipende, ili niweze kulitaja jina lako na kuijaza roho yako kwa pumzi ya uzima.”

(Baha'u'llah, Maneno Yaliyofichwa, Na. 4, uk.3)

“Muwe katika umoja kamili. Kamwe msikasirikiane....Pendeni viumbe kwa ajili ya Mungu na si kwa ajili yao wenyewe....Kuna kasoro katika kila mwanadamu na daima hautakuwa na furaha kama ukiwaangalia watu wenyewe. Lakini kama ukiwaangalia kumuelekea Mungu utawapenda, na kuwa mwema kwao, kwa kuwa ulimwengu wa Mungu ni ulimwengu wa ukamilifu na wenye rehema kamili.”

(Abdu'l-Baha, Kutoka Kitabu cha Kiingereza “Divine Art of Living” pg.115 -116)

“Upendo halisi hauwezekani vinginevyo mtu ageuzie uso wake kumuelekea Mungu na kuvutiwa kwenye uzuri Wake.”

(Abdu'l-Baha, Kutoka Kitabu cha Kiingereza “Divine Art of Living” pg.115- 116)

“Kila mmoja huona kwa mwingine Uzuri wa Mungu umeakisiwa ndani ya roho yake, na aonapo hali hii ya mfanano, huvutiwa mmoja kwa mwingine katika upendo. Upendo huu utawafanya watu wote kuwa mawimbi ya bahari moja, upendo huu utawafanya wote kuwa nyota za anga moja, na matunda ya mti mmoja. Upendo huu utaleta utambuzi wa upatano wa kweli, msingi wa umoja halisi.”

(Abdu'l-Baha, Mazungumzo ya Paeis (Hekima ya 'Abdu'l-Baha), uk. 180-181)

“Mawazo ya upendo ni mjenzi wa undugu, amani, urafiki na furaha....

“Kama ukitamani kwa moyo wako wote urafiki na watu wa kila mbari duniani, fikra yako, ya kiroho na chanya, itaenea; itakuwa shauku ya wengine, ikiimarika zaidi na zaidi, hadi ifikie akili za watu wote.”

(Abdu'l-Baha, Kutoka Kitabu cha Kiingereza “Divine Art of Living” pg. 111)

“Kama roho mbili zikigombana na kubishana kuhusu suala moja kati ya masuala Matakatiifu, wakitofautiana na kushindana, wote wamekosea. Hekima ya sheria hii isiyokanushika ya Mungu ni hii: Kwamba kati ya roho mbili kutoka miongoni mwa waumini wa Mungu, pasiwepo na mabishano na mashindano yawezayo kuibuka; kwamba waweze kuzungumza pamoja kwa urafiki na upendo usio na kikomo. Kama pakitokea dalili ndogo ya mabishano, lazima wanyamaze, na wote wawili lazima wasiendele zaidi na majadiliano yao, lakini waulize ukweli wa suala hilo kutoka kwa Mfasiri.”

(Abdu'l-Baha, Nyaraka za Mpango Mtakatifu, uk. 53)

“Ni wajibu wetu na heshima kutafsiri upendo na moyo wa ibada tulio nao kwa Imani yetu pendwa, katika matendo na vitendo ambavyo vitasaidia kuleta wema wa hali ya juu kabisa wa wanadamu.”

(Shoghi Effendi, katika kitabu cha Kiingereza “Living the Life”, Compilation pg.9)

“Jambo muhimu kabisa kati ya yote ni kwamba upendo na umoja lazima uenee katika jumuiya ya Kibahá’í, kwa kuwa hiki ndicho hasa ambacho watu wanakitamani katika hali ya hivi sasa ya giza ya ulimwengu.”

(Kutoka barua iliyoandikiwa kwa niaba ya Shoghi Effendi, “Living the Life”, Compilation pg. 23-24)

“Ili kupata umoja huu mkunjufu, jambo mojawapo muhimu lililosisitizwa na Baha’u’lláh na ‘Abdu’l-Bahá ni kwamba tupinge mwelekeo wa kiasili wa kuangalia na kufuatilia makosa na udhaifu wa

wengine kuliko yetu sisi wenyewe. Kila mmoja wetu ana wajibu kwa uhai mmoja tu, nao ni ule wetu sisi wenyewe.”

(Kutoka barua iliyoandikwa kwa niaba ya Shoghi Effendi, “Living the Life”, Compilation pg. 10)

“Maneno yarudiwayo mara kwa mara ya Bwana kuhusiana na umoja na ushirikiano wenye usawa miongoni mwa marafiki lazima yakumbukwe kwa uangalifu na kwa umakini zaidi hivi sasa kuliko wakati wowote mwingine. Hakuna kilicho kinyume zaidi na roho ya Imani kuliko ugomvi na mafarakano, ambavyo ni matokeo yasiyoepukika ya ubinafsi na tamaa. Kujitenga kabisa na huduma isiyo na ubinafsi, haya ndiyo sharti yawe madhumuni pekee ya kila muumini wa kweli.”

(Kutoka barua iliyoandikwa kwa niaba ya Shoghi Effendi, “Living the Life”, Compilation pg. 13)

“Kutokuelewana kwingi huibuka kutokana na marafiki kujiambatanisha na hisia kali kwa Imani na pia uchanga wao. Kwa hiyo, lazima tuwe wavumilivu na wenye upendo sana mmoja kwa mwingine na kujaribu kusimamisha umoja katika familia ya Kibahá’í.”

(Kutoka barua iliyoandikiwa kwa niaba ya Shoghi Effendi, “Living the Life”, Compilation pg.21)

“Kuhusiana na swali lako juu ya haja ya umoja mkubwa zaidi miongoni mwa marafiki, hakuna shaka kwamba hivi ndivyo ilivyo, na Mlinzi huona kwamba mojawapo kati ya vyombo vikuu vya kuuendeleza ni kuwafundisha Wabahá’í wenyewe, katika madarasa, na kwa kupitia mafundisho, kwamba upendo wa Mungu, na hatimaye wa watu, ni msingi muhimu wa kila dini, ikiwemo yetu wenyewe. Kiwango kikubwa zaidi cha upendo kitaleta umoja mkubwa zaidi, kwa sababu huwawezesha watu kuvumiliana, kuwa wenye subira na wasamehevu.”

(Kutoka barua iyoandikwa kwa niaba ya Shoghi Effendi, “Living the Life”, Compilation pg 21)

“Popote jumuiya ya Kibahá’í ilipo, iwe kubwa au ndogo, acha ipambanuliwe kwa hisia zake za kudumu za usalama na imani, kiwango chake cha juu cha uadilifu, uhuru wake kamili kutokana na aina zote za

chuki, moyo wa upendo miongoni mwa washiriki wake, na kwa maisha yake ya kijamii yaliyosukwa pamoja kwa ukaribu mkubwa.”

(Nyumba ya Haki ya Ulimwengu, Kutoka “Wellspring of Guidance”, pg. 147)

Kiasi

“Ustaarabu, unaotukuzwa mara nyingi sana na wafasiri walioelimika wa sanaa na sayansi, kama ukiruhusiwa kuvuka mipaka ya kiasi, utaleta uovu mkubwa kwa watu. Hivyo ndivyo awaonyavyo Yeye Ambaye ni Mjuzi wa yote. Kama ukizidi kiasi, ustaarabu utathibitisha kuwa chanzo kikubwa cha uovu kama ulivyokuwa chanzo cha mema wakati ulipokuwa umewekwa kwenye mipaka ya kiasi....”

”Mambo mengine yote yapo chini ya kanuni hii hii ya kiasi.”

(Baha’u’llah, Kutoka kitabu cha Kiingereza “Gleanings from the Writings of Baha’u’llah” pg. 342-343)

“Imewapasa wale ambao wamo katika mamlaka kutumia kiasi katika mambo yote. Chochote kipitacho mipaka ya kiasi kitaacha kutoa mvuto wenye manufaa.”

(Baha’u’llah, Kutoka kitabu cha Kiingereza “Gleanings from the Writings of Baha’u’llah” pg 216)

“Usiruke mipaka ya kiasi, na watendee kwa haki wale ambao wanakutumikia. Wape kulingana na mahitaji yao....Watendee kwa haki isiyopotoka, ili kwamba hakuna yeyote miongoni mwao ambaye ama atapatwa na dhiki, au kukinaishwa na anasa. Hiki si kingine bali haki dhahiri.

(Baha’u’llah, Kutoka Kitabu cha Kiingereza “Baha’i World Faith” pg, 45)

“Chaguo la mavazi na unyoaji wa ndevu na uchanaji wake vimeachwa kwa hiari ya watu. Lakini jihadharini, Enyi watu, msije mkajifanya wenyewe kuwa vitu vya kuchezeza na wajinga.”

(Baha’u’llah, Kutoka “Tablets of Baha’u’llah, pg.23)

“Zaidi ya hayo, jambo lolote liwalo, japokuwa liwe liletalo mambo mema kabisa kwa jamii ya binadamu, lina uwezekano wa kutumiwa vibaya. Matumizi yake yafaayo au mabaya hutegemea juu ya

viwango mbalimbali vya elimu, uwezo, imani, uaminifu, moyo wa ibada na uadilifu wa hali ya juu wa viongozi wa maoni ya umma.”

(‘Abdu’l-Baha, *Kutoka kitabu cha Kiingereza, “Secret of Divine Civilization”* pg.16)

“Kiasi ni lazima katika mambo yote. Mtu lazima ajifunze kutoka amali na matendo Matakatiifu ya Mungu kwa kuwa Mungu huuacha mti kukua kwa muda mrefu kabla haujakomaa. Yeye anaweza kuufanya mti kukua kufikia utoaji matunda papo hapo, lakini hekima huhitaji ukuaji unaoendelea taratibu.”

(‘Abdu’l-Baha, *Kutoka Kitabu cha Kiingereza “Divine Art of Living”* pg. 69)

“Maisha ya ubikira na matakatiifu kama hayo, pamoja na maana zake za staha, usafi, kadiri, adabu na nia safi, hayahusishi kingine zaidi ya utumiaji wa kiasi katika mambo yote yahusuyo mavazi, lugha, burudani, na shughuli zote za usanii na fasihi. Yanahitaji uangalifu wa kila siku katika kujizuia tamaa za kimwili za mtu na mielekeo ya uovu. Yanataka kuacha mwenendo wa kipuuzi, pamoja na upendo wa kupita kiasi na mara nyingi starehe zilizopotoka.”

(Shoghi Effendi, *Kutoka Kitabu cha Kiingereza “Advent of Divine Justice”,* pg.25)

“Kuhusu wanawake wa Kibahá’í kutumia vipodozi vya uso: watu binafsi wapo huru kabisa kufanya kama wapendavyo katika mambo binafsi kabisa kama hayo. Kwa kuwa Wabahá’í wameamriwa kutumia kiasi katika mambo yote, na kutafuta wastani Bora zaidi, Baraza la Kitaifa likiona ni lazima au inafaa, linaweza kuwashauri waumini kutumia kiasi katika jambo hili pia.”

(Shoghi Effendi, *“The Dawn of a New Day”—Messages to India,* pg. 193)

Huduma

“Huyo kwa kweli ni mtu ambaye, leo, hujitoa mwenyewe kwa ajili ya huduma ya mbari nzima ya binadamu. Yule Aliye Mkuu husema: Amebarikiwa na ni mwenye furaha yule ambaye huinuka kuendeleza raghba bora kabisa za watu na koo za dunia..”

(Baha'u'llah, Kutoka kitabu cha Kiingereza “Gleanings from the Writings of Baha'u'llah” pg. 250)

“Siku yako ya huduma sasa imefika...Inuka kwa ajili ya ushindi wa Hoja Yangu, na kwa kupitia nguvu ya matamshi yako, ishinda mioyo ya watu. Ni lazima uoneshe wazi kile ambacho kitahakikisha amani na usitawi wa wenye dhiki na wadhulumiwao. Jifunge kibwebwe, ili kwamba huenda utaweza kumfungulia mfungwa kutoka minyororo yake, na kumwezesha kufikia kwenye uhuru wa kweli.”

(Baha'u'llah, Kutoka kitabu cha Kiingereza “Gleanings from the Writings of Baha'u'llah” pg.92)

“Tena, kuna kitendo chochote ulimwenguni ambacho kingekuwa bora zaidi kuliko huduma kwa ajili ya manufaa ya wote? Je, kuna baraka yoyote kubwa zaidi inayoweza kufikiriwa kwa mtu, kuliko kwamba yeye angekuwa chanzo cha elimu, maendeleo, usitawi na heshima ya viumbe wenzake? Hapana, kwa Bwana Mungu! Unyofu wa hali ya juu kabisa wa wote, ni kwa roho zilizobarikiwa kushika mikono ya wanyonge na kuwaokoa kutoka ujinga wao na fedheha na ufukara, na kwa nia safi, na kwa ajili ya Mungu tu, kuinuka na kwa nguvu kujifunga wenyewe kabisa kwa ajili ya huduma ya wengi, wakisahau manufaaa yao wenyewe ya kidunia na kufanya kazi tu kutumikia manufaa ya wote.”

(Abdu'l-Baha, Kutoka kitabu cha Kiingereza, “Secret of Divine Civilization” pg. 103)

“Kwa ufupi, juhudi na bidii zote zitolewazo na mwanadamu kutoka dhati ya moyo wake ni ibada, ikiwa hufanywa kwa nia kuu na upendo wa kuitumikia jamii ya binadamu. Hii ni ibada: kuwatumikia wanadamu na kusimamia mahitaji ya watu. Huduma ni sala. Tabibu anayewatibu wagonjwa kwa upole, kwa huruma, pasipo na chuki na kuamini mshikamano wa mbari ya binadamu, huwa anamsifu Mungu.”

(Abdu'l-Baha, *Mazungumzo ya Paris (Hekima ya Abdu'l-Baha)* uk.
176-177)

“Hakuna kitu kinacholeta mafanikio katika Imani kama huduma. Huduma ni sumaku ambayo huvutia mathibitisho matakatifu. Hivyo, wakati mtu ni amilifu amebarikiwa na Roho Mtakatifu. Wakati si amilifu Roho Mtakatifu hawezi kupata ghala katika nafsi yao, na hivyo wananyimwa mionzi yake iponyayo na ihuishayo.”

(Kutoka barua iliyoandikwa kwa niaba ya Shoghi Effendi, kutoka Kiingereza, “*Living the Life*”, *Compilation*, pg.34

“Uwanja wowote wa huduma utakaoweza kuchagua, uwe wa ufundishaji au wa kiutawala, jambo la lazima kwako ni kustahimili, na si kuruhusu hisi yoyote ya mapungufu yako kupunguza juhudi yako, achilia mbali kukuzuia kutumikia kwa furaha na kwa uamilifu.”

(Kutoka barua iliyoandikwa kwa niaba ya Shoghi Effendi, kutoka Kiingereza, “*Living the Life*”, *Compilation*, pg.15

Unyenyekevu Kwa Amri ya Mungu

“Chanzo cha mema yote ni kumtumaini Mungu, kujinyenyekeza mbele ya amri Yake, na kuridhika na mapenzi Yake matakatifu na ridhaa.”

(Baha'u'llah, Kutoka "Tablets of Baha'u'llah, pg.155)

“Ewe Mwana wa Mtu! Hata kama ungekwenda kwa kasi katika eneo kuu la anga na kupita mapana ya mbingu, bado usingepata utulivu isipokuwa katika utiifu kwa amri Yetu na unyenyekevu mbele ya Uso Wetu.”

(Baha'u'llah, Maneno Yaliyofichwa, Na. 40 uk. 11)

“Chochote ambacho Muumba huwaamuru viumbe wake kufuata, hicho lazima kwa bidii, na kwa furaha kubwa kabisa na shauku, wainuke na kutimiza”

(Baha'u'llah, Kutoka Kitabu cha Kiingereza "Baha'i World Faith", pg.134)

“Sema: Uhuru wa kweli umo katika unyenyekevu wa mtu kwa amri Zangu, kidogo mjuavyo.”

(Baha'u'llah, Kutoka kitabu cha Kiingereza "Gleanings from the Writings of Baha'u'llah" pg.336)

“Sema: Enyi watu! Msiache maisha haya na hila zake ziwadanganye, kwa kuwa ulimwengu na vyote vilivyomo ndani mwake vimeshikiliwa kwa uthabiti katika mkono wa Mapenzi Yake.”

(Baha'u'llah, Kutoka kitabu cha Kiingereza "Gleanings from the Writings of Baha'u'llah", pg.209)

“Uwe na hakika, aidha, kwamba kazi na matendo ya kila mmoja wa Wadhihirishaji hawa wa Mungu, na chochote kihusianacho nao, na chochote watakachoweza kudhihirisha siku zijazo, vyote vimeamriwa na Mungu, na ni sura za Mapenzi na Kusudi Lake.”

(Baha'u'llah, Kutoka kitabu cha Kiingereza "Gleanings from the Writings of Baha'u'llah", pg.59)

“ Enyi watumishi Wangu! Msihuzunike kama, katika siku hizi na katika maisha haya ya kidunia, mambo yaliyo kinyume na matakwa yenu yameamriwa na kudhihirishwa na Mungu, kwa kuwa siku za kipeo cha furaha, za nderemo za mbinguni, bila shaka zimewekwa akiba kwa ajili yenu.”

(Baha’u’llah, Kutoka kitabu cha Kiingereza “Gleanings from the Writings of Baha’u’llah”, pg.329)

“Kama ikiwa kwa ridhaa Yako, unifanye nikue kama mmea mchanga katika mashamba ya neema Yako, ili pepo nyanana za amri Yako ziniamshe na kunielekeza kulingana na ridhaa Yako, kwa jinsi ambavyo kutembea kwangu na kusimama kwangu kuongozwe kabisa Nawe.”

(Baha’u’llah, Kutoka kitabu cha Kiingereza, “Prayers and Meditation” pg.240)

“Nguvu ya dunia haiwezi kuzuia mapendeleo na majaliwa ambayo Mungu ameamuru kwa ajili ya karne hii kuu na tukufu. Ni haja na hitaji la wakati huu. Mwanadamu anaweza kuzuia chochote isipokuwa kile ambacho kimekusudiwa na Mungu na kwa ajili ya wakati huu na mahitaji yake.”

(‘Abdu’l-Baha, Kutoka Kitabu cha Kiingereza “Baha’i World Faith”, pg.234)

Uaminifu

“Taraz ya nne huhusu uaminifu. Kwa kweli ni mlango wa usalama kwa wale wote waishio duniani na dalili ya utukufu kwa Yule Mwenye Rehema—Kabisa....Uaminifu ni mlango mkuu kabisa uongozao kwenye utulivu na usalama wa watu. Kwa ukweli utengamano wa kila jambo umetegemea na utategemea juu yake. Milki zote za uwezo, za ukuu na za utajiri huangaziwa kwa mwanga wake.”

(Baha'u'llah, Kutoka "Tablets of Baha'u'llah", pg.37)

“Uwe mwenye kustahili kuaminika na jirani yako, na umwangelie kwa uso mwangavu na wa kirafiki....Acha ukamilifu na unyofu vitofautishe vitendo vyako vyote.”

(Baha'u'llah, Kutoka kitabu cha Kiingereza "Gleanings from the Writings of Baha'u'llah", pg.285)

“Jihadharini msije mkaingilia mali ya jirani yenu. Jithibitisheni wenye kustahili kuaminika kwake, na kuwa na imani nanyi,....”

(Baha'u'llah, Kutoka kitabu cha Kiingereza "Gleanings from the Writings of Baha'u'llah", pg.278)

“Sifa zingine za ukamilifu ni kicho cha Mungu, kumpenda Mungu kwa kuwapenda watumishi wake, kutenda kwa upole na ustahimilivu na utulivu, kuwa mnyofu, latifu, mwema na mwenye huruma; kuwa na dhamira na ujasiri, uaminifu na nguvu, kujitahidi na kujishughulisha, kuwa mkarimu, mtiifu, bila husuda, kuwa na ari na hisia ya heshima, kuwa mwadilifu na mwenye moyo mkuu, na mwenye kujali haki za wengine. Yeyote ambaye amekosa sifa hizi bora kabisa za kibinadamu ni mpungufu.”

(Abdu'-Baha, Kutoka kitabu cha Kiingereza, "Secret of Divine Civilization" pg. 40)

(Abdu'l-Baha, Siri ya Ustaarabu Mtakatifu, uk. 40)

“Unyofu huu wa mwenendo, pamoja na matokeo yake ya haki, usawa, ukweli, uwazi, kutopendelea, utumainifu na uaminifu lazima vitofautishe kila sura ya maisha ya jamii ya Kibahá'i.” ‘Wenzi wa Mungu’

Baha'u'lláh Mwenyewe ametangaza, 'katika siku hii. ni fumba ambalo lazima liwaumue watu wa ulimwengu. Lazima wadhihirishe uaminifu kama ule, ukweli na ustahimilivu kama ule, vitendo na tabia kama zile ambazo kwamba binadamu wote watanufaika kwa mfano wao."

(Shoghi Effendi, Kutoka Kitabu cha Kiingereza "Advent of Divine Justice", pg. 19)

"Kadiri Wabahá'í walivyo wanyofu na bora katika tabia yao, ndivyo watakavyovutia zaidi watu kwa nguvu ya kiroho ya Imani waiaminiyo."

(Kutoka barua iliyoandikwa kwa niaba ya Shoghi Effendi, katika kitabu cha Kiingereza "Living the Life", Compilation pg. 34)

Ukweli

“Njema na sifa zinazomhusu Mungu zote zipo wazi na dhahiri, na zimetajwa na kuelezwa katika Vitabu vyote vya mbinguni. Miongoni mwazo ni uaminifu, ukweli, usafi wa moyo wakati wa kuzungumza na Mungu, ustahimilivu, kujikana kwa jambo lolote ambalo Mwenyezi Mungu ameliamuru, kukubali jambo lolote ambalo Mwenyezi Mungu ameliamuru, kuridhika na mambo ambayo Mapenzi Yake yamejalia, subira, la, kuwa wenye shukrani katikati ya shida, na kumtumaini kabisa Yeye katika hali zote. Haya hushika daraja bora, kulingana na ukadiriaji wa Mungu, miongoni mwa matendo yote bora na yastahiliyo sifa ya hali ya juu kabisa.”

(Baha'u'llah, Kutoka kitabu cha Kiingereza "Gleanings from the Writings of Baha'u'llah", pg. 290)

“Pambeni ndimi zenu, Enyi watu, kwa ukweli, na rembesheni roho zenu kwa pambo la uaminifu.”

(Baha'u'llah, Kutoka kitabu cha Kiingereza "Gleanings from the Writings of Baha'u'llah", pg.297)

“Wale ambao ni watu wa Mungu hawana matamania yoyote isipokuwa kuufufua ulimwengu, kuboresha maisha yake, na kuhuisha watu wake. Ukweli na nia-njema, nyakati zote, vimeainisha uhusiano wao na watu wote.”

(Baha'u'llah, Kutoka kitabu cha Kiingereza "Gleanings from the Writings of Baha'u'llah", pg.270-271)

“Ikiwa yeyote kati yenu ataingia katika mji, lazima awe kitovu cha mvuto kutokana na unyofu wake, uaminifu wake na upendo, uadilifu wake na uthabiti, ukweli wake na wema wake wa upendo kwa watu wote wa ulimwengu, ili kwamba watu wa mji huo waweze kupaza sauti na kusema: ‘Mtu huyu bila shaka ni Mbahá’í kwa adabu yake, kwa tabia zake, mwenendo wake, maadili yake, asili yake, na hali yake huakisi sifa za Wabaha’í.’ Hadi hapo mtakapofikia daraja hili, mtakuwa hamjatimiza Agano na Wasia wa Mungu.”

(‘Abdu'l-Baha, Kutoka Kitabu cha Kiingereza "Baha'i World Faith", pg. 401)

“Haidhuru utumie wema mwingi namna gani kwa mwongo, atazidi tu kudanganya, kwa kuwa yeye huamini kwamba wewe wadangayika, ambapo unamuelewa vyema kabisa, na unabaki kimya tu kutokana na huruma yako iliyoipitiliza.”

(‘Abdu’l-Baha, Mateuzi kutoka Maandiko ya ‘Abdu’l-Baha, uk. 158)

“Ukweli ndiyo msingi wa njema zote za ulimwengu wa binadamu. Bila ukweli, maendeleo na mafanikio katika malimwengu yote ya Mungu hayawezekani kwa roho yoyote. Wakati sifa hii takatifu ikisitawishwa ndani mwa mtu, sifa zote takatifu pia zitapatikana.”

(‘Abdu’l-Baha, Kutoka Kitabu cha Kiingereza “Baha’i World Faith” pg. 384)

“Kuhusu swali kwamba ni sawa kusema uwongo ili kumuokoa mwingine, yeye huona kwamba katika hali yoyote ile tuiseme uwongo lakini wakati huo huo tujaribu kumsaidia mtu huyo katika njia iliyo halali zaidi. Bila shaka hatulazimiki kusemasema ovyo hadi swali hilo tuulizwe sisi moja kwa moja.”

(Kutoka barua iliyoandikwa kwa niaba ya Shoghi Effendi, kutoka Kiingereza, “Living the Life”, Compilation, pg.10-11)

Kazi ni Ibada

“Ewe Mtumishi Wangu! Watu bora kabisa kuliko wote ni wale ambao hupata riziki kwa kazi zao na kutumia kwa ajili yao wenyewe na kwa ajili ya ndugu zao kwa upendo wa Mungu, Bwana wa malimwengu yote.”

(Baha’u’llah, Maneno Yaliyofichwa, Na. 82 uk. 50)

“Imeamriwa kwa kila mmoja wenu kujishughulisha katika aina fulani ya kazi, kama vile ufundi, biashara na zinginezo kama hizo. Tumetukuza kwa neema shughuli yenu kwa kazi kama hizo hadi kufikia daraja la ibada kwa Mungu, Mmoja wa Kweli. Fikirini sana mioyoni mwenu neema na baraka za Mungu na toeni shukrani Kwake jioni na alfajiri. Msipoteze wakati wenu katika uvivu na uzembe. Jishughulisheni na kile kiwanufaishacho ninyi wenyewe na wengine....

“Watu wadharauliwao kabisa machoni pa Mungu ni wale ambao hukaa bure na kuombaomba. Shikilieni imara kwenye ugwe wa nyenzo za kimwili, mkiweka imani yenu yote kwa Mungu, Mjalia wa nyenzo zote.”

(Baha’u’llah, Kutoka “Tablets of Baha’u’llah”, pg. 26)

“...mali kama ile aipatayo kupitia kazi ya ufundi au weledi hukubaliwa na hustahili sifa kwa ukadiriaji wa watu wenye hekima, na hasa katika macho ya watumishi ambao wamejifunga wenyewe kwa ajili ya uelimishaji wa ulimwengu na kwa ajili ya uadilishaji wa watu wake.”

(Baha’u’llah, Kutoka “Tablets of Baha’u’llah”, pg. 35)

“Utajiri hustahili sifa katika kiwango cha juu kabisa, ikiwa unapatikana kwa jitihada za mtu mwenyewe na kwa rehema za Mungu, katika biashara, kilimo, sanaa na kiwanda, na kama ukitumiwa kwa madhumuni ya hisani. Juu ya yote, ikiwa mtu mwenye busara na mbunifu angeanzisha hatua ambazo zingewanufaisha watu wengi, pasingekuwepo na shughuli kuu zaidi kuliko hii, na ingeonekana mbele ya macho ya Mungu kama mafanikio makubwa kabisa, kwa kuwa mfadhili kama huyo angekidhi mahitaji na kuhakikisha faraja na ustawi wa kaumu kubwa.”

(‘Abdu’l-Baha, Kutoka kitabu cha Kiingereza, “Secret of Divine Civilization” pg. 24)

“Kuhusiana na amri ya Baha’u’lláh inayohusu waumini kujishughulisha katika aina yoyote ya kazi: Mafundisho hutilia mkazo kabisa juu ya jambo hili, hususan maelezo yaliyomo katika Aqdas kuhusu suala hili ambayo huweka wazi kabisa kwamba watu wavivu ambao hukosa shauku ya kufanya kazi hawawezi kuwa na mahali katika Utaratibu mpya wa Ulimwengu.... Ni wajibu wa wale ambao ni wasimamizi wa mfumo wa kijamii kumpa kila mtu fursa ya kujipatia taaluma ya lazima katika aina fulani ya kazi, na pia njia za kutumia taaluma hiyo, kwa ajili yake mwenyewe na kwa ajili ya kujipatia njia za riziki . . . urithi wa mali siyo kigezo kwa mtu yeyote kutofanya kazi ya kila siku.”

(Shoghi Effendi, Kitabu cha Kiingereza, “Principles of Baha’i Administration”, pg. 12-13)

Mtazamo dhidi ya Wezi na Uingiaji katika Nyumba Bila Ruhusa

“Enyi Rafiki Zangu! Tembeeni katika njia za ridhaa njema ya Rafiki, na mjue kwamba ridhaa Yake imo katika ridhaa ya viumbe Wake. Yaani: hakuna mtu anayepaswa kuingia katika nyumba ya rafiki yake isipokuwa kwa ridhaa ya rafiki yake, wala kuchukua mali zake wala kupendelea mapenzi yake mwenyewe zaidi kuliko ya rafiki yake, na kwa namna yoyote ile asijaribu kujitafutia manufaa juu yake. Lifikirini hili, enyi wenye umaizi!”

(Baha’u’llah, Maneno Yaliyofichwa, Na. 43 uk. 35-36)

“Wale ambao hueneza machafuko katika nchi, na kuchukua mali za wengine, na kuingia ndani ya nyumba bila ruhusa ya mwenyewe, Sisi, kwa kweli, tuko mbali nao, vinginevyo watubu na kumrudia Mungu, Msamehevu—Daima, Mwenye Rehema—Kabisa.”

(Baha’u’llah, Kutoka Kitabu cha Kiingereza, “Tablet to the Son of the Wolf” pg. 23)

“Wema hauwezi kuoneshwa kwa mdhalimu, mdanganyifu, au mwizi, kwa sababu, mbali na kuwazindua kutambua kosa la mazoea yao, huwafanya waendeleo katika upotovu wao kama mwanzo. Haidhuru utumie wema mwingi namna gani kwa mwongo, atazidi tu kudanganya, kwa kuwa yeye huamini kwamba wewe wadangayika, ambapo unamuelewa vyema kabisa, na unabaki kimya tu kutokana na huruma yako iliyopitiliza.”

(‘Abdu’l-Baha, Mateuzi kutoka Maandiko ya ‘Abdu’l-Baha uk. 158)

***Kuishi Maisha Ya
Kibahà'i***

Sala

“Imba, Ee mtumishi Wangu, aya za Mungu ambazo umezipokea, kama ziimbwavyo na wale ambao wamemkaribia Yeye, ili utamu wa lahani zako uweze kuiwasha roho yako mwenyewe, na kuvutia mioyo ya watu wote.”

(Baha'u'llah, Kutoka kitabu cha Kiingereza “Gleanings from the Writings of Baha'u'llah”, pg. 295)

“Sema: Okoeni roho zenu, Enyi watu, kutoka utumwa wa nafsi, na mazitakase kutoka mwambatano wote kwa kitu chochote kando Yangu. Kunikumbuka Mimi hutakasa vitu vyote kutokana na unajisi, laiti mngeliweza kulifahamu jambo hili.”

(Baha'u'llah, Kutoka kitabu cha Kiingereza “Gleanings from the Writings of Baha'u'llah”, pg. 294-295)

“Ewe Mwana wa Nuru! Sahau yote ila Mimi, na zungumza na roho yangu. Hiki ndicho kiini cha amri Yangu, kwa hiyo igeukie.”

(Baha'u'llah, Maneno Yaliyofichwa, Na. 16 uk. 6)

“Hadithi zimethibitisha ukweli kwamba katika Vipindi Vyote Vitakatifu sheria ya sala imekuwa jambo la msingi la Ufunuo wa Mitume wote wa Mungu—sheria ambayo umbo na jinsi yake imerekebisha kulingana na mahitaji yatofautianayo ya kila zama.”

(Baha'u'llah, Kitab-i-Iqan, uk. 25-26)

“Ewe rafiki wa kiroho! Umeuliza hekima ya sala. Ujue kwamba sala ni lazima na faradhi, na mtu kwa sababu yoyote ile iwayo hajasamehewa kutotekeleza sala vinginevyo awe hana akili timamu, au ikiwa atazuiwa na kikwazo kisichoshindika. Hekima ya sala ni hii: Kwamba husababisha kiunganishi kati ya mtumishi na Yule wa Kweli, kwa sababu kaitka hali hiyo, mtu kwa moyo na roho yake yote hugeuzia uso wake kumuelekea Mtukufu, Mwenyezi, akitafuta ushirika Wake na akitamani upendo na huruma yake....

“Mbali na haya yote sala na mfungo ni chanzo cha mwamko na ung'amuzi na husaidia kuleta ulinzi na hifadhi kutokana na majaribu....”

(*'Abdu'l-Baha, Kutoka Kitabu cha Kiingereza "Baha'i World Faith" pg. 368*)

“Kwa kweli sababu kubwa kwa maovu yaliyoenea hivi sasa katika jamii ni ukosefu wa hali ya kiroho....

“Ni hali hii, mbaya mno vya kuhuzunisha, ambamo jamii imeangukia, kwamba dini hutaka kuiboresha na kuibadili. Kwa kuwa kiini cha imani ya dini ni ile hisia isiyoelezeka ambayo humuunganisha mtu na Mungu. Hali hii ya mawasiliano ya kiroho inaweza kuletwa na kudumishwa kwa njia ya tafakari na sala. Na hii ndiyo maana Baha'u'lláh amesisitiza sana umuhimu wa ibada. Haitoshi kwa muumini kukubali tu na kufuata mafundisho. Zaidi ya hayo, lazima akuze fahamu ya kiroho ambayo anaweza kuipata hasa kwa njia ya sala.”

(*Shoghi Effendi, Kutoka Kitabu cha Kiingereza, "Directives from the Guradian", pg. 86*)

“Waumini, hususan vijana, kwa hiyo lazima watambue kikamilifu ulazima wa kusali. Kwa kuwa sala ni lazima kabisa kwa maendeleo yao ya ndani ya kiroho, na hii, kama ilivyokwisha elezwa, ndiyo msingi na dhumuni hasa la dini ya Mungu.”

(*Shoghi Effendi, Kutoka Kitabu cha Kiingereza, "Directives from the Guradian", pg 87*)

“ Zaidi ya ufundishaji, kila muumini anaweza kusali. Kila muumini anaweza kujitahidi kufanya ‘maisha yake ya ndani na tabia ya faragha kujidhihirisha katika sura zake nyingi, utukufu wa zile kanuni za milele zilizotangazwa na Baha'u'lláh.’ Kila muumini anaweza kuchangia kwenye Hazina. Siyo waumini wote wanaweza kutoa hotuba kwa umma, siyo wote wanaweza kuombwa kuhudumia kwenye asasi za kiutawala. Lakini wote wanaweza kusali, kupigana vita vyao vya kiroho, na kuchangia kwenye Hazina. Ikiwa kila muumini atatekeleza kazi hizi takatifu, tutashangazwa kwa ongezeko la uwezo ambao utatokea kwa jamii nzima, na ambao kwa wakati wake utasababisha ukuaji zaidi na umwagikaji wa baraka kuu zaidi juu yetu sisi sote.”

(*Nyumba ya Haki ya Ulimwengu, Kutoka "Wellspring of Guidance", pg.38*)

Sala ya Faradhi ya Kila Siku

“Sala za faradhi za kila siku ni tatu kwa idadi. Ile fupi kabisa ina aya moja tu ambayo sharti isemwe mara moja katika muda wa saa ishirini na nne wakati wa adhuhuri. Ile (sala) ya wastani lazima itongolewe mara tatu kwa siku, asubuhi, adhuhuri na jioni. Ile sala ndefu ambayo ina maelezo mengi zaidi kati ya hizo tatu sharti itongolewe mara moja katika muda wa saa ishirini na nne, na ni wakati wowote mtu ajisikiapo kufanya hivyo.”

“Muumini yu huru kabisa kuchagua yoyote kati ya sala hizo tatu, lakini yu chini ya sharti la kutongoa mojawapo kati ya hizo, na kufuata na maelekezo yoyote mahsusi ambayo yanaweza kuambatana nazo.

“Sala hizi za faradhi za kila siku, pamoja na zingine chache maalum, kama vile Sala ya Kuponya, Waraka wa Ahmad, zimejaliwa na Baha’u’lláh nguvu na maana maalum, na kwa hiyo zinapaswa zikubaliwe kama zilizvyo na kutongolewa na waumini kwa imani isiyo na shaka na ujasiri, ili kupitia hizo waweze kuingia katika mazungumzo ya karibu zaidi na Mungu, na kujifahamisha wenyewe kikamilifu zaidi na sheria na maagizo Yake.”

(Shoghi Effendi, Kitabu cha Kiingereza, “Principles of Baha’i Administration”, pg.. 7)

Sala hizi za Faradhi zitongolewe na mtu binafsi bila kumshirikisha mtu mwingine.

“Kwa ‘asubuhi’, ‘adhuhuri’ na ‘jioni’, ilivyotajwa kuhusiana na sala za faradhi humaanishwa vipindi kimoja kimoja kati ya macheo na adhuhuri, kati ya adhuhuri na macheo, na kutoka machweo hadi saa mbili baada ya machweo”

Kutoka Kiingereza (Synopsis and Codification of the Kitab-i-Aqdas”, pg. 141)

Sala Fupi ya Faradhi

*(Itongolewe mara moja ndani ya saa ishirini na nne wakati wa
adhuhuri)*

“Nashuhudia, Ee Mungu wangu, kwamba Wewe umeniumba mimi kukujua Wewe na kukuabudu Wewe. Nathibitisha katika wakati huu juu ya unyonge wangu na uwezo Wako, juu ya umasikini wangu na utajiri Wako.

Hakuna Mungu mwingine ila Wewe, Msaada Hatarini, Ajitoshelezaye Mwenyewe.”

Baha'u'llah

Mfungo

“Tumewaamuru kusali na kufunga kutoka mwanzo wa utu uzima; hii imeamriwa na Mungu, Bwana wenu na Bwana wa babu zenu. Yeye amewasamehe kutoka jambo hili wale ambao ni wadhaifu kutokana na maradhi au umri, kama baraka kutoka mbele Yake na Yeye ni Msamehevu, Mkarimu.”

(Baha’u’llah, Kutoka Kiingereza (Synopsis and Codification of the Kitab-i-Aqdas”, pg.13)

“Hizi, Ee Bwana wangu, ni siku ambazo kwazo Umewaamuru watumishi Wako kuadhimisha mfungo. Amebarikiwa yule ambaye huadhimisha mfungo kabisa kwa ajili Yako na kujitenga kabisa kutoka vitu vyote isipokua Wewe.”

(Baha’u’llah, Sala za Kibahá’i, uk. 247)

“Utukufu uwe kwako, Ee Bwana Mungu wangu! Hizi ni siku ambazo Wewe umewaamuru watu wote kuadhimisha mfungo, ili kupitia huu, waweze kuzitakasa roho zao na kuondokana na mwambatano wote kwa yeyote ila Wewe. . . Itakase kwa njia yake, mioyo ya watumishi Wako ambao maovu ya ulimwengu yameshindwa kuwazuia kugeukia kwenye Jina Lako tukufu—Kabisa....”

(Baha’u’llah, Sala za Kibahá’i uk. 252-253)

“Tumewaamuru kufunga katika kipindi kifupi, na mwisho wake Nimewateulia Naw-Rúz kama Karamu....Msafiri, mgonjwa, wajawazito au wanyonyeshao, hawabanwi na mfungo....Kujinyima chakula na kinywaji tangu macheo hadi machweo, na jihadharini tamaa ya kimwili isiwanyime neema iliyoandikwa katika Kitabu.”

(Bahá’u’lláh, Kutoka Kiingereza (Synopsis and Codification of the Kitab-i-Aqdas”, pg..13)

“Kipindi cha mfungo huanza kwa kumalizika kwa Siku za ziada za Mwaka na huishia kwenye Kipindi cha mfungo huanza kwenye kumalizika kwa Siku za ziada za mwaka (Machi 1 au 2), na huishia kwenye Sikukuu ya Naw-Rúz (Machi 20 au 21).

“Kujinyima chakula na kinywaji tangu mawio hadi machweo, ni faradhi.” “Mfungo huwabana wanaume na wanawake waliofikia umri wa utu uzima, ambao umewekwa kwenye miaka 15.

“Wafuatao wamesamehewa kufunga:

Wasafiri, ilimradi safari izidi saa 9; wale wanaosafiri kwa miguu ilimradi safari izidi saa 2; Wale ambao hukatisha safari yao kwa muda usiozidi siku 19; Wale ambao huvunja safari yao wakati wa Mfungo mahali ambapo watakaa siku 19 wamesamehewa kufunga kwa siku tatu tu za mwanzo tangu kuwasili kwao; wale ambao hufika nyumbani wakati wa mfungo sharti waanze kufunga tangu siku ya kuwasili kwao.

Wale ambao ni wagonjwa.

Wale wenye umri zaidi ya miaka 70.

Wanawake ambao ni wajawazito.*

Wanawake ambao wananyonyesha.+

Wale ambao wanafanya kazi nzito, ambao wanashauriwa kuonesha heshima kwa sheria kwa kutumia busara na kujizuia wanapokuwa wanatumia msamaha huu.

“Kunulia kufunga (katika mwezi tofauti na ule uliowekwa kwa ajili ya kufunga) kunaruhusiwa. Hata hivyo, nuizo zinazowanufaisha wanadamu hupendelewa machoni pa Mungu.”

(Bahá'u'lláh, Kutoka Kiingereza (Synopsis and Codification of the Kitab-i-Aqdas”, pg.38-39)

“Katika mojawapo ya Nyaraka Zake ‘Abdu’l-Bahá, baada ya kueleza kwamba kufunga huhusisha kujinyima chakula na kinywaji, amesema kwa udhahiri kwamba kuvuta ni aina ya ‘kinywaji’. (katika Kiarabu kitendo ‘kunywa’ hutumika sawasawa na kuvuta.)”

(Bahá'u'lláh, Kutoka Kiingereza (Synopsis and Codification of the Kitab-i-Aqdas”,pg.59)

“Kipindi cha mfungo, ambacho hudumu kwa siku kumi na tisa huanza kama sheria kuanzia tarehe moja au mbili ya mwezi Machi kila mwaka na kumalizika mnamo tarehe ishirini au ishirini na moja ya mwezi

huo huo, huhusisha kujinyima kabisa chakula na kinywaji kutoka mawio hadi machweo. Kimsingi ni kipindi cha taamuli na sala, cha kuponywa kiroho, wakati ambao muumini lazima ajitahidi kufanya maboresho ya lazima katika maisha yake ya ndani, na kuburudisha na kurudisha nguvu za kiroho zilizofichwa ndani ya roho yake. Maana na madhumuni yake, kwa hivyo, kimsingi ni ya kiroho kwa tabia. Mfungo ni mfano, na ukumbusho wa kuepukana na ubinafsi na tamaa za kimwili.”

(Kutoka barua iliyoandikwa kwa niaba ya Shoghi Effendi, katika “Lights of Guidance”, No. 487, pg. 181)

Ndoa

“Fungeni ndoa, Enyi watu, ili muweze kumzaa yule ambaye atanitaja Mimi.”

(Bahá'u'lláh, Kutoka Kiingereza (Synopsis and Codification of the Kitab-i-Aqdas”, pg.17)

“Ujue kwamba amri ya ndoa ni ya milele. Haitabadilishwa kamwe wala kugeuzwa. Huu ni muumbo mtakatifu na hakuna uwezekano hata kidogo kwamba mabadiliko au mageuzi yaathiri muumbo huu mtakatifu.”

(‘Abdu’l-Baha, Kutoka “Tablets of ‘Abdu’l-Baha, Vol. II pg.474)

“Kwa mintarafu ya suala kuhusiana na ndoa chini ya sheria ya Mungu: kwanza lazima umchague yule akupendezaye, na halafu suala hili hutegemea juu ya idhini ya baba na mama. Kabla hujafanya uchaguzi wako hawana haki ya kuingilia.”

(‘Abdu’l-Baha, Mateuzi kutoka Maandiko ya ‘Abdu’l-Baha, uk.118)

“Kila mmoja, walakini, lazima afanye uangalifu mkubwa kabisa kuifahamu vyema tabia ya mwingine, ili ahadi ifungayo kati yao iweze kuwa fundo litakalodumu milele. Kusudi lao lazima liwe hili: kuwa wenzi na marafiki wapendanao na kupatana kwa wakati na milele. . . “

(‘Abdu’l-Baha, Mateuzi kutoka Maandiko ya ‘Abdu’l-Baha, uk.118)

“Ndoa, miongoni mwa watu wengi, ni fundo la kimwili, na muungano huu unaweza kuwa wa muda tu, kwa kuwa mwishowe utengano wa kimwili umekusudiwa.

“Miongoni mwa watu wa Bahá, walakini, ndoa lazima iwe muungano wa mwili na wa roho vile vile...hivyo ni fundo litakalodumu milele.”

(‘Abdu’l-Baha, Mateuzi kutoka Maandiko ya ‘Abdu’l-Baha, uk.117)

“Kuhusiana na ndoa ya Kibahá’i; Kwa kufuatana na Waraka wa Bwana akifafanua sharti katika Aqdas...inakuwa dhahiri kwamba kuwa na mke mmoja pekee ndiko kunaruhusiwa....”

(Shoghi Effendi, Kutoka Kiingereza (Synopsis and Codification of the Kitab-i-Aqdas”, pg. 59)

“Baha’u’lláh amekwishaeleza wazi kwamba idhini ya wazazi wote walio hai huhitajika kwa ndoa ya Kibahá’í. Hii hutumika ikiwa wazazi ni Wabahá’í au sio Wabahá’í, walioachana miaka mingi ama la. Sheria hii kuu Amelweka ili kuimarisha mfumo wa kijamii, kufuma kwa ukaribu zaidi mafundo ya nyumbani, kuweka aina fulani ya shukrani na heshima katika mioyo ya watoto kwa wale ambao wamewapa uhai na kuzileta roho zao katika safari ya milele kuelekea kwa Muumba wao.”

(Kutoka barua iliyoandikwa kwa niaba ya Shoghi Effendi, imenukuliwa kutoka “Family Life”, Compilation, pg. 17)

“Kama mtu ana zaidi ya mke mmoja na anakuwa Mbahá’í, anaruhusiwa kuwatunza wake zake. Walakini, kama mmoja wa wake zake akifariki hawezi kuoa mwingine.”

(Shoghi Effendi, kwa Baraza la Kiroho la Kitaifa la Afrika ya Kati na Mashariki.)

“Kwa kawaida, mara mtu awapo Mbahá’í, haiwezikani kabisa kwake kuoa mke wa pili. Yale aliyofanya kabla ya kuwa Mbahá’í, ndo kusema, siyo makosa yake. Yale afanyayo baadaye ni jukumu lake mwenyewe kabisa na lazima ajaribu na kuishi kufuatana na sheria za Baha’u’lláh.”*(Kutoka barua iliyoandikwa kwa niaba ya Shoghi Effendi, kutoka (Synopsis and Codification of the Kitab-i-Aqdas”, pg. 13)*

“Sherehe ya ndoa ya Kibahá’í lazima itimizwe kwa sababu sisi ni Wabahá’í, bila kujali kama ni halali (ya nchi) au la.”

(Kutoka barua iliyoandikwa kwa niaba ya Shoghi Effendi, kutoka “Fortress for Wellbeing”, pg. 47)

“Kama Mbahá’í akimuoa mtu asiye Mbahá’í ambaye anapenda kufanya sherehe ya dini ya madhehebu yake mwenyewe, ni lazima ifahamike wazi kwamba, kwanza, yule mwenzi wa Kibahá’í anaeleweka kuwa ni Mbahá’í kwa dini, na hatalazimishwa kukubali dini ya upande mwingine katika ndoa kupitia sherehe ya dini ya mwenzake; na pili, sherehe lazima iwe ya jinsi ambayo haitamfanya Mbahá’í ajifunge kuipokea imani nyingine kuliko yake mwenyewe.

“Katika hali hizi, Mbahá’í anaweza kushiriki katika sherehe ya dini ya mwenzi wake asiye Mbahá’í. Mbahá’í lazima asisitize juu ya kufanyika kwa sherehe ya Kibahá’í kabla au baada ya ile isiyo ya Kibahá’í, katika siku hiyo hiyo.”

(Kutoka barua iliyoandikwa kwa niaba ya Shoghi Effendi, kutoka Kiingereza (Synopsis and Codification of the Kitab-i-Aqdas’), pg.13)

“... hakuna kaida ya dini, (kuhusiana na ndoa ya Kibahá’í) kulingana na Aqdas, na Mlinzi ana wasiwasi sana kwamba isiingizwe kaida yoyote... na pasiwepo na aina yoyote ya kimila. Yeye huamini sherehe iwe rahisi iwezekanavyo, pande zote mbili zikitumia maneno yaliyoamriwa na Baha’u’lláh, na dondoo kutoka Maandiko na sala kusomwa, kama ikihitajika. Pasiwepo na uchanganyaji wa mtindo wa zamani na ule mpya na rahisi wa Baha’u’lláh, na Wabahá’í wasiozwe Kanisani au mahali pengine popote pakubaliwapo pa ibada ya wafuasi wa imani nyingine.”

(Kutoka barua iliyoandikwa kwa niaba ya Shoghi Effendi, katika “Lights of Guidance”, No. 286)

“... bibi na bwana harusi, mbele ya mashahidi wawili, lazima waseme ‘Sisi sote, kwa kweli, tutaishi kwa Mapenzi ya Mungu.’ Mashahidi hawa wawili wanaweza kuchaguliwa na wenzi au na Baraza la Kiroho, lakini kwa hali yoyote wawe wanakubalika na Baraza; wanaweza kuwa mwenyekiti na katibu wake, au wajumbe wengine wawili wa Baraza, au watu wengine wawili, Wabahá’í au wasio Wabahá’í, au mchanganyiko wowote wa hawa. Baraza laweza kuamua kwamba hati zote za ndoa zitolewazo zitiwe sahihi na mwenyekiti na katibu, lakini hili ni jambo tofauti na halihusiani na sherehe yenyewe au mashahidi... Mashahidi wanaweza kuwa watu wowote wawili waaminifu ambao ushahidi wao unakubalika kwa Baraza la Kiroho ambalo chini ya mamlaka yake ndoa hiyo inafugwa. Jambo hili kwa hakika hufanya iwezekane kwa mtangulizi aishiye pekee katika mahali ambapo ni mbali kufunga ndoa ya Kibahá’í.”

(Nyumba ya Haki ya Ulimwengu, katika “Lights of Guidance”, No 286-287)

“Ubikira humaanisha vyote viwili kabla na baada ya ndoa yawepo maisha yasiyo na mawaa, ya ubikra. Kabla ya ndoa ubikra kamili, baada ya ndoa uaminifu kamili kwa mwenzi uliyemchagua. Uaminifu katika vitendo vyote vya ngono, uaminifu katika maneno na matendo.”

(Shoghi Effendi, imenukuliwa katika Ujumbe kutoka Nyumba ya Haki ya Ulimwengu, 1968 – 1973 uk. 108)

Maisha ya Familia ya Kibahá'í.

Upendo na Umoja

“Katika Hoja hii tukufu maisha ya wanandoa lazima yafanane na maisha ya malaika mbinguni- maisha yaliyojaa shangwe na furaha ya kiroho, maisha ya umoja na upatano, urafiki wa vyote kiakili na kimwili. Nyumba lazima iwe yenye utaratibu na mpangilio mzuri. Nia na fikra zao lazima ziwe kama mionzi ya jua la ukweli....”

*(‘Abdu’l-Baha, imenukuliwa kutoka “Family Life”,
Compilation, pg. 10)*

“Angalia ni kwa urahisi ulioje, pale umoja ukiwepo katika familia fulani, shughuli za familia hiyo zinavyoendeshwa; ni maendeleo yaliyoje wana-familia wa familia hiyo hufanya, jinsi gani wanavyositawi duniani. Shughuli zao zimepangiliwa, wanafurahia faraja na utulivu, wapo salama, hali yao imehakikishwa, hufikia kuhusudiwa na wote. Familia kama hiyo huongeza tu kwenye msimamo na heshima yake ya kudumu, siku hadi siku.”

(‘Abdu’l-Baha, Mateuzi kutoka Maandiko ya ‘Abdu’l-Baha, uk. 279)

“Kama upendo na mapatano hudhihirika katika familia moja, familia hiyo itaendelea, itakuwa inaangaziwa na ya kiroho; lakini kama uadui na chuki vitakuwamo ndani yake, maangamizi na mtawanyiko haviepukiki.”

(‘Abdu’l-Baha, Uenezaji wa Amani ya Ulimwengu, uk. 144-145)

“Fikiri madhara hatari ya kutopatana na mafarakano katika familia; halafu tafakari juu ya fadhili na baraka zishukazo juu ya familia hiyo wakati umoja upo miongoni mwa wana-familia wake mbali mbali.”

(‘Abdu’l-Baha, imenukuliwa kutoka “Family Life”, Compilation, pg. 9)

“... Hoja haikuja kuvunja mafundo ya familia bali kuyaimarisha; haikuja kuondoa upendo bali kuuimarisha; haikuumbwa kudhoofisha asasi za kijamii bali kuziimarisha.”

*(Kutoka barua iliyoandikwa kwa niaba ya Shoghi Effendi,
imenukuliwa kutoka “Family Life”, Compilation, pg. 11)*

Mume na Mke

“Bwana, Yeye asiye kifani, amemuumba mwanamke na mwanaume kuishi pamoja katika urafiki wa karibu kabisa, na kuwa kama vile roho moja. Ni wenzi wawili, marafiki wawili wa moyoni, ambao wanapaswa wajishughulishe na usitawi wa mmoja kwa mwingine.”

(‘Abdu’l-Baha, Mateuzi kutoka Maandiko ya ‘Abdu’l-Baha, uk. 122)

“Kwa ufupi, msingi wa Ufalme wa Mungu umewekwa juu ya upatano na upendo, umoja, uhusiano na muungano, siyo juu ya tofauti, hasa kati ya mume na mke.”

(Abdu’l-Baha, imenukuliwa kutoka “Family Life”, Compilation, pg. 6)

“Ama kuhusu mheshimiwa mume wako: inakubidi kumtendea kwa wema mkuu, kuzingatia matakwa yake na kuwa msuluhifu naye wakati wote, hadi aone kwamba kwa kuwa umejielekeza mwenyewe kwenye Ufalme wa Mungu, huruma yako kwake na upendo wako kwa Mungu vimeongezeka, hali kadhalika kujali kwako kwa matakwa yake katika hali zote.”

(Abdu’l-Baha, Mateuzi kutoka Maandiko ya Abdu’l-Baha uk 122)

“Wakati tofauti za maoni na imani kama hizo hutokea kati ya mume na mke ni bahati mbaya sana kwa kuwa bila shaka hupunguza thamani kutoka lile fundo la kiroho ambalo ndiyo ngome imara ya fundo la familia, hasa katika nyakati za shida. Walakini, njia ya kurekebisha jambo hilo si kwa kuutenga upande mmoja au mwingine. Kusudi mojawapo la Hoja kwa kweli ni kuleta mapatano ya karibu zaidi nyumbani. Katika hali zote kama hizo, kwa hiyo, Bwana alikuwa akishauri uti kwa matakwa ya upande mwingine na sala.”

(Kutoka barua iliyoandikwa kwa niaba ya Shoghi Effendi, imenukuliwa kutoka “Family Life”, Compilation, pg. 11)

“Ndoa ni asasi takatifu sana. Baha’u’lláh alisema kusudi lake ni kuendeleza umoja. Ikiwa marafiki huipuuza asasi hii, kwa ajili ya Hoja, wanaiweka Imani katika mwanga hafifu mbele ya watu.”

(Kutoka barua iliyoandikwa kwa niaba ya Shoghi Effendi, imenukuliwa kutoka “Family Life”, Compilation, pg. 19)

“Uhusiano kati ya mume na mke lazima uangaliwe katika maana halisi ya wazo la Kibahá’í la maisha ya familia. Baha’u’lláh alikuja kuleta umoja ulimwenguni, na umoja wa kimsingi ni ule wa familia. Kwa hiyo, mtu lazima aamini kwamba Imani imekusudiwa kuimarisha familia, siyo kuidhoofisha, na mojawapo ya funguo kwa ajili ya uimarishaji wa umoja ni ushauriano wenye upendo. Hali ndani ya familia ya Kibahá’í kama vile ndani ya jamii kwa jumla lazima ioneshe ‘jambo kuu la Hoja ya Mungu’ ambalo, mpendwa Mlinzi amesema, ‘siyo mamlaka ya uamrishaji bali upatano wa unyenyekevu, siyo nguvu ya kujiamulia, bali moyo wa ushauriano wa wazi na wa upendo.”

(Nyumba ya Haki ya Ulimwengu, imenukuliwa kutoka “Family Life”, Compilation, pg.23)

“Pia wanawake, katika mambo fulani fulani, wana tabia ya kuwakandamiza waume zao kwa kiwango kisicho cha haki, jambo ambalo, bila shaka, si sawa, kama vile isivyo haki kwa mume kumtawala mke wake bila haki,”

(Nyumba ya Haki ya Ulimwengu, imenukuliwa kutoka “Family Life”, Compilation, pg.23)

“Katika kikundi chochote, hata ushauriano uwe wenye upendo jinsi gani, walakini kuna mambo hata hivyo, ambayo juu yake, mara kwa mara, makubaliano hayawezi kufikiwa. Katika Baraza la Kiroho mtanziko huu huondolewa kwa kura ya wengi, Walakini, hapawezi kuwepo wengi pale tu pande mbili zinapohusika, kama katika shauri la mume na mke. Hivyo, kuna nyakati ambapo mke anapaswa amnyenyekee mumewe, na nyakati ambapo mume amnyenyekee mkewe, lakini hata kidogo mmojawapo asimkandamize mwingine bila haki.”

(Nyumba ya Haki ya Ulimwengu, imenukuliwa kutoka “Family Life”, Compilation, pg.23-24)

Watoto

“Ni wajibu unaowapasa wazazi kuwalea watoto wao kuwa imara katika imani, sababu ikiwa kwamba mtoto ajiondoaye mwenyewe kutoka dini ya Mungu, hatatenda kwa jinsi ambayo atajipatia radhi ya wazazi wake na Bwana wake. Kwa kuwa kila kitendo kistahilicho sifa hutokana na mwangaza wa dini, na akosapo baraka hii kuu mtoto huyo hatageukia mbali na uovu wowote, wala hatakaribia wema wowote.”

(Baha'u'llah, kutoka “Baha'i Education”, Compilation, pg. 6)

“Kwa kila baba imeamriwa wajibu wa ufundishaji wa mtoto wake wa kiume na wa kike katika ustadi wa kusoma na kuandika na katika yale yote yaliyoamriwa katika Waraka Mtakatifu.”

(Baha'u'llah, kutoka Kiingereza (Synopsis and Codification of the Kitab-i-Aqdas”), pg.15-16)

“Imewapasa watoto kujibidiisha wenyewe kwa hali ya juu kabisa katika upataji wa ustadi wa kusoma na kuandika. Ustadi wa kuandika ambao utanza kwa mahitaji ya lazima utatosha kwa kiasi; na halafu ni bora na inafaa zaidi kwamba watumie muda wao katika kujifunza yale matawi ya elimu ambayo ni yenye manufaa.”

(Baha'u'llah, kutoka “Baha'i Education”, Compilation, pg 7)

“Inastahili kwamba mtumishi, baada ya kila sala, amsihi Mungu kujalia rehema na msamaha juu ya wazazi wake. Hapo ndipo mwito wa Mungu utatapazwa: ‘Maelfu kwa maelfu ya kile ulichomba kwa ajili ya wazazi wako itakuwa thawabu yako!’ Amebarikiwa yule ambaye huwakumbuka wazazi wake azungumzapo na Mungu. Kwa kweli, hakuna Mungu ila Yeye, Mwenye nguvu, Mpendwa-Kabisa.”

(Bab, Kutoka Kiingereza (Selections from the Writings of The Bab, pg. 94)

“Naomba masamaha Wako, Ee Mungu wangu, na kukusihi radhi kwa jinsi ulivyowataka watumishi Wako kujielekeza wenyewe Kwako. Nakuomba Wewe kufutulia mbali dhambi zetu kama istahilivyo Ubwana Wako, na kunisamehe mimi, wazazi wangu, na wale ambao katika kuona

Kwako wameingia katika makao ya upendo Wako kwa jinsi istahiliyo enzi Yako iliyo bora kabisa na istahiliyo kabisa utukufu wa nguvu Yako ya mbinguni.”

(Bab, Kutoka Kiingereza (Selections from the Writings of The Bab, pg. pg.210)

“Kama ungeonesha wema na kuwajali wazazi wako ili kwa ujumla wajihisi wamefurahishwa, hili pia litanifurahisha Mimi, kwa kuwa wazazi lazima waheshimiwe sana na ni muhimu kwamba wajihisi wameridhika, ilimradi hawakuzui kukaribia Kizingiti cha Mwenyezi, wala kukuzuia kutembea katika njia ya Ufalme.”

*(‘Abdu’l-Baha, imenukuliwa kutoka “Family Life”,
Compilation, pg.. 6)*

“Acha kina-mama wafikirie kwamba chochote kihusucho elimu ya watoto ni cha umuhimu wa kwanza. Acha wafanye kila jitihada katika jambo hili, kwa kuwa wakati tawi ni la kijani na changa litakua kwa namna yoyote ile unavyolifunza. Kwa hiyo. inawapasa kina-mama kuwalea watoto wao wadogo kama vile mtunza bustani atunzavyo miche yake michanga. Acha wajibidiishe mchana na usiku kuimarisha ndani mwa watoto wao wadogo imani na yakini, kicho cha Mungu, upendo wa Mpendwa wa malimwengu, na sifa na tabia zote njema. Wakati wowote mama aonapo kwamba mtoto wake amefanya vyema, acha amsifu na kumshangilia na kuchangamsha moyo wake; na ikiwa tabia mbaya ndogo kabisa ikijidhihirisha yenyewe, acha amshauri mtoto huyo na kumuadhibu, na kutumia njia zitegemeazo akili, hata ikiwa adhabu ndogo ya manenoi kama hii ikiwa ni lazima. Hairuhusiwi, walakini, kumchapa mtoto, au kumtukana, kwa kuwa tabia ya mtoto itapotoshwa kabisa kama akiwekwa chini ya vipigo na matusi.”

(‘Abdu’l-Baha, Mateuzi kutoka Maandiko ya ‘Abdu’l-Baha, uk. 125)

“Wafunzeni watoto wenu tangu siku zao za mwanzoni kabisa kuwa wenye huruma na upendo mno kwa wanyama. Endapo mnyama akiumwa, acha watoto wajaribu kumponya, akiwa na njaa, acha wamlishe, akiwa na kiu, acha watulize kiu chake, akichoka, acha waone kwamba anapumzika.”

(‘Abdu’l-Baha, Mateuzi kutoka Maandiko ya ‘Abdu’l-Baha, uk. 159)

“Sanaa ya muziki ni jambo takatifu na lenye matokeo. Ni chakula cha roho na nafsi. Kupitia nguvu na haiba ya muziki roho ya mtu huinuliwa. Una mvuto wa ajabu na matokeo kwenye mioyo ya watoto.... Kwa hivyo, lazima mjidhatiti kuwafanya hodari; wafundisheni kuimba kwa ubora na umahiri. Ni wajibu kwa kila mtoto kujua kitu fulani kuhusiana na muziki, kwa kuwa bila ujuzi wa sanaa hii, ala za lahani na sauti haviwezi kufurahiwa barabara.”

(‘Abdu’l-Baha, Uenezaji wa Amani ya Ulimwengu, uk. 52)

Ndani ya Familia

“Ewe Mtumishi Wangu! Watu bora kabisa kuliko wote ni wale ambao hupata riziki kwa kazi zao na kutumia kwa ajili yao wenyewe na kwa ajili ya ndugu zao kwa upendo wa Mungu, Bwana wa malimwengu yote.”

(‘Abdu’l-Baha, Maneno Yaliyofichwa, Na.82, uk. 74)

“Kulingana na mafundisho ya Baha’u’llah familia, kama msingi wa mwanadamu, lazima ielemishwe kulingana na kanuni za utakatifu. Lazima njema zote zifundishwe kwa familia. Ukamilifu wa fundo la familia lazima wakati wote kufikiriwa, na haki za wanafamilia mmoja mmoja lazima zisivunjwe. Haki za mtoto wa kiume, baba, mama – hata ya mmoja wao haipaswi kuvunjwa, hata ya mmoja wao haipaswi kulazimishwa. Kama vile mtoto wa kiume alivyo na wajibu fulani kwa baba yake, baba, hali kadhalika, anao wajibu fulani kwa mwanawe wa kiume. Mama, dada na wana-kaya wengine wanazo haki zao maalum. Haki zote hizi na heshima lazima zihifadhiwe, na bado umoja wa familia lazima udumishwe. Madhara ya mmoja yatachukuliwa kama madhara ya wote; faraja ya kila mmoja, faraja ya wote; heshima ya mmoja, heshima ya wote.”

(‘Abdu’l-Baha, Uenezaji wa Amani ya Ulimwengu, uk. 168)

“Baba wakati wote lazima ajitahidi kumuelimisha mtoto wake wa kiume na kumfahamisha mafundisho ya mbinguni. Lazima ampe ushauri na kumuusia wakati wote, amfundishe mwenendo na tabia zisifikazo, amwezeshe kupata mafunzo shuleni na kufundishwa katika sanaa na sayansi kama zifikirivavyo kuwa zenye manufaa na za lazima. Kwa ufupi, acha aingize akilini mwake njema na ukamilifu wa ulimwengu wa binadamu. Zaidi ya yote lazima aendelee kumkumbusha juu ya kumbukumbu ya Mungu ili kwamba mishipa yake midogo na mikubwa iweze kupuma kwa upendo wa Mungu.”

“Mtoto wa kiume, kwa upande mwingine, lazima aonesha utiifu mkuu kabisa kwa baba yake, na lazima ajiweke mwenyewe kama mtumishi mnyenyekevu na dhalili. Mchana na usiku lazima atafute kwa

juhuri kuhakikisha faraja na usitawi wa baba yake mpendwa na kupata ridhaa yake njema. Lazima aachane na raha na starehe yake mwenyewe na daima ajitahidi kuleta furaha katika mioyo ya baba na mama yake, ili kwa jinsi hiyo aweze kupata ridhaa njema ya Mwenyezi Mungu na kusaidiwa kwa rehema na majeshi yasiyoonekana.”

(‘Abdu’l-Baha, imenukuliwa kutoka “Family Life”,
Compilation, pg. 7)

“Familia, walakini, ni aina ya ‘jamii’ maalum sana.... Wana-familia wote wana majukumu na wajibu mmoja kwa mwingine na kwa familia kwa ujumla, na majukumu haya na wajibu hutofautiana kutoka mwana-familia hadi mwana-familia kwa sababu ya uhusiano wao wa kiasili. Wazazi wana wajibu usioepukika kuwaelimisha watoto wao— lakini siyo kinyume chake; watoto wana wajibu kuwatii wazazi wao—wazazi hawawatii watoto; mama—siyo baba—huzaa watoto, huwalea katika umri wa uchanga, na hivyo ndio mwelimishaji wao wa kwanza

“Kazi ya kulea mtoto wa Kibahá’í, kama ilivyosisitizwa mara kwa mara katika Maandiko ya Kibahá’í, ni jukumu kuu la mama, ambaye upendeleo wake wa kipekee kwa kweli ni kufanya nyumbani mwake hali zile ambazo zitasaidia kabisa kuleta usitawi wake wa kimwili na wa kiroho na maendelo....Kama sehemu ya majukumu haya ya mama, ni haki yake kusaidiwa na mumewe—mume hana haki dhahiri ya kusaidiwa na mkewe. “

*Nyumba ya haki ya Ulimwengu, imenukuliwa kutoka “Family Life”,
Compilation, pg..23*

“Baha’u’lláh pia amesisitiza umuhimu wa ushauriano. Tusidhani njia hii ifaayo ya kutafuta ufumbuzi imewekwa kwa ajili ya asasi za kiutawala tu za Imani. Ushauriano wa kifamilia ukitumia mahojiano kamili na ya uwazi, na yakihuishwa kwa utambuzi wa haja ya kiasi na ulinganifu unaweza kuwa suluhisho kwa ugomvi wa nyumbani.”

(*Nyumba ya Haki ya Ulimwengu, imenukuliwa kutoka “Family Life”,
Compilation, pg. 22*)

“Himizeni ndani ya familia, kujenga mazoea ya kusali kila siku na usomaji wa Maandiko Matakatiifu.”

(Nyumba ya Haki ya Ulimwengu, “Baha’i Marriage and na Family Life”, pg. 76)

Nyumbani

“Namsihi Mungu kwa rehema kuifanya nyumba yako kuwa kitovu cha utawanyaji wa mwangaza wa uongozi mtakatifu, kwa ajili ya uenezaji wa Maneno ya Mungu na kwa ajili ya uwashaji moto wa upendo wakati wote katika mioyo ya watumishi na vijakazi Wake waaminifu. Ujue kwa uhakika kwamba kila nyumba ambamo wimbo wa sifa unapazwa hadi kufikia Milki ya Utukufu katika utukuzaji wa Jina la Mungu kwa kweli ni nyumba ya mbinguni, na mojawapo ya bustani za furaha katika Paradiso ya Mungu.”

(‘Abdu’l-Baha, imenukuliwa kutoka “Family Life”, Compilation, pg.6)

“ “Nyumba yangu ni nyumba ya amani. Nyumba yangu ni nyumba ya shangwe na furaha. Nyumba yangu ni nyumba ya cheko na nderemo. Yeyote aingiaye kupitia malango ya nyumba hii, lazima aondoke na moyo wenye furaha. Hii ni nyumba ya nuru; Yeyote aingiaye humu lazima aangaziwe..”

(‘Abdu’l-Baha, imenukuliwa kutoka “Family Life”, Compilation, pg..10)

“... nyumba ni asasi ambayo Baha’u’llah amekuja kuiimarisha na siyo kuidhoofisha. ... Itumikie Hoja lakini pia kumbuka wajibu wako kwa nyumba yako. Ni juu yako kupata ulinganifu na kuona kwamba moja haikufanyi uache nyingine.”

(Kutoka barua iliyoandikwa kwa niaba ya Shoghi Effendi, imenukuliwa kutoka “Family Life”, Compilation, pg.. 11)

“Ni mojawapo ya mafundisho ya lazima ya Imani kwamba umoja lazima udumishwe nyumbani. Bila shaka hii haimaanishi kwamba mwana-familia yeyote wa familia ana haki ya kushawishi imani ya mwana-familia mwingine yeyote; na ikiwa hii ikifahamika na wana-familia wote, basi inaonekana hakika kwamba umoja unawezekana.”

(Kutoka barua iliyoandikwa kwa niaba ya Shoghi Effendi, imenukuliwa kutoka “Family Life”, Compilation, pg.. 18)

Uandikaji wa Wasia

“Kufuatana na Mafundisho ya Baha’u’lláh, uandikaji wa Wasia kimsingi ni wajibu wa Mbahá’í binafsi. Kila muumini ana hiari kuacha mali yake kwa namna yoyote achaguayo, ndani ya mipaka iliyowekwa na sheria ya serikali na baada ya malipo ya gharama za mazishi na madeni mengine na mambo ya lazima. Kuna njia kadhaa ambazo muumini anaweza kuacha maagizo kuhusu maziko yake; siyo vibaya kwa maagizo kama hayo kujumuishwa katika Wasia, kama sheria huruhusu, na muumini mwenyewe akipenda iwe hivyo.”

(Nyumba ya Haki ya Ulimwengu, katika barua kwa Baraza la Kiroho la Kitaifa la Bolivia, 1 Oktoba, 1980)

Mazishi ya Kibahá'í

“Kwa ufupi sheria ya mazishi kwa marehemu husema kwamba imekatazwa kuusafirisha mwili kwa zaidi ya safari ya saa moja kutoka mahali pa kifo; kwamba mwili lazima uzungushiwe sanda ya hariri au pamba...na kwamba jeneza sharti liwe la fuwele, jiwe angavu, au mbao ngumu. ‘Sala maalum kwa ajili ya marehemu’ imeamriwa, isemwe kabla ya maziko...kwa wale waliofikia umri wa utu uzima.¹

“Imeelezwa na ‘Abdu’l-Bahá na Mlinzi kwamba sheria hii hukataza uchomaji maiti moto.”²

(kutoka Kiingereza (Synopsis and Codification of the Kitab-i-Aqdas”), pg..62-63)

“‘Sala kwa ajili ya marehemu’” imechapishwa katika ‘Sala na Taamuli za Baha’u’lláh,’ Na. CLXVII. Ndiyo sala pekee ya faradhi ya Kibahá’í ambayo hutongolewa katika usharika; inapaswa itongolewe na muumini mmoja wakati wote waliopo wakiwa wamesimama. Hakuna haja ya kuelekea Qiblih¹ wakati wa kutongoa sala hii.”

(kutoka Kiingereza (Synopsis and Codification of the Kitab-i-Aqdas”), pg.58)

1 umri wa miaka 15

2 hukataza uchomaji mwili moto

1 Qiblih ya Wabahá’i ni Bahji, ‘Akká, Israel

“Kuhusiana na ibada ya mazishi ya Kibahá’í: ni rahisi kabisa, kwani huwa na sala ya usharika tu ambayo husomwa kabla ya maziko!...Urahisi na unyumbulikaji lazima uzingatiwe, na mateuzi kutoka Maandiko Matakatifu ya Kibahá’í yatatimiza kusudi hili...ilimradi mateuzi haya hayatatumiwa kwa ung’ang’anifu na kwa usawa katika nyakati kama hizo zote.”

(Kutoka barua iliyoandikwa kwa niaba ya Shoghi Effendi, imenukuliwa kutoka “Principles of Baha’i Administration. pg.14

Kujiepusha na Pombe na Dawa za Kulevya

Pombe

“Muogopeni Mungu, Enyi watu wa dunia, na msifikiri kwamba divai tuliyoitaja katika Nyaraka zetu ni divai ambayo watu hunywa, na ambayo husababisha akili yao kutoweka, asili yao ya kibinadamu kupotoshwa, mwangaza wao kubadilishwa, na utakatifu wao kuchafuliwa....

Jihadharini msije mkabadilisha Mvinyo wa Mungu kwa mvinyo wenu wenyewe, kwani utapumbaza akili zenu, na kuzigeuzia sura zenu mbali na Wajihi wa Mungu.... Msiusogele, kwani imekatazwa kwenu kwa amri ya Mungu, Aliyetukuka, Mwenyezi.

(Baha'u'llah, Makatazo ya Vinywaji Vileweshavyo, uk.1-2)

“Ile Divai Isiyoelezeka ya Mungu Mmoja wa Kweli ina ulevi tofauti na hutoa uchangamfu mwingine. Moja hupunguza akili ya mtu, nyingine huiongeza. Moja huongozea kwenye kuangamia milele, nyingine hujalia uzima.”

(Baha'u'llah, kutoka Makatazo ya Vinywaji Vileweshavyo, uk.2)

“Unywaji wa divai, kulingana na maandiko ya Kitabu Kitakatifu Kabisa, umekatazwa; kwa kuwa ni chanzo cha maradhi ya kukubuhu, hudhoofisha mishipa ya fahamu, na huteketeza akili.”

(‘Abdu’l-Baha, imenukuliwa katika “Advent of Divine Justice”, pg 27)

“Kuhusiana na matumizi ya kilevi: Kulingana na maandiko ya Kitabu-i-Aqdas, hukataza “vyote viwili vinywaji vyepesi na vikali,” na Yeye hueleza kwamba sababu ya kukataza utumiaji wa vinywaji vinavyoleweshwa ni kwa sababu “kilevi hupotosha akili na husababisha mwili kudhoofika.”. Kama pombe ingekuwa ya manufaa, ingelikuwa imeletwa duniani kwa muumbo mtakatifu na siyo kwa jitihada ya mtu. Chochote ambacho kina manufaa kwa mtu kimo katika muumbo. Hivi sasa imehakikishwa na kuthibitishwa kitabibu na kisayansi kwamba pombe ina madhara.

“...Hata hivyo, kinywaji kileweshacho, kama ikiamriwa na tabibu kwa mgonjwa na kama matumizi yake ni lazima kabisa, basi kinaruhusiwa.

“Kwa ufupi, natumaini kwamba wewe utaweza kuleweshwa kwa divai ya upendo wa Mungu, utapata furaha ya milele na kupata shangwe na furaha isiychosha. Divai zote zina unyong’onyevu kama matokeo, isipokuwa divai ya Upendo wa Mungu.”

(‘Abdu’l-Baha, Makatazo ya Vinywaji Vileweshavyo , uk.5-6)

“Akili na viungo vya ufahamu ni vipawa vya Mungu ambavyo kwavyo mtu hutofautishwa na wanyama wengine. Je, mtu mwenye busara angependa kupoteza Mwangaza huu katika giza la ulevi? La, kwa Mungu! Hili halitamridhisha! Bali atafanya kile ambacho kitakuza nguvu zake za akili na uelewa, na siyo kuzidisha uzembe, kutojali na anguko lake. Hili ndilo andiko dhahiri katika Kitabu Kilicho Wazi, ambamo Mungu ameeleza kila sifa njema, na kuweka wazi kila kitendo kistahilicho lawama.”

(‘Abdu’l-Baha, Makatazo ya Vinywaji Vileweshavyo , uk. 6)

“Kuhusiana na swali lako la kwanza juu ya pombe na unywaji, Baha’u’llāh, akitambua kabisa huzuni kuu inayotokea humo, huikataza kama asemavyo kwa wazi kwamba kila kitu ambacho huiondolea mbali akili, au kwa maneno mengine humfanya mtu kulewa, kimekatazwa.”

(Kutoka barua ilyoandikwa kwa niaba ya Shoghi Effendi, Makatazo ya Vinywaji Vileweshavyo, Makusanyo, uk.7)

“Kutokana na barua yako ingedhaniwa kwamba baadhi ya waumini wenu huona kwamba sheria ya Aqdas kuhusu utumiaji wa vinywaji vileweshavyo ni ya mtu binafsi, na yaweza kufuatwa au kutofuatwa, kama mtu mwenyewe atakavyo. Hii siyo sahihi. Sheria ya Aqdas kuhusu kutotumia vinywaji vinavyoleweshwa huwabana Wabahā’i wote.”

(‘Shoghi Effendi, Makatazo ya Vinywaji Vileweshavyo, uk. 11)

“Katika suala la muumini ambaye huendelea kutumia vinywaji vya pombe Baraza lazima liamue kama kosa limebainika, na, kama ndivyo,

lazima lijaribu kumsaidia kuelewa umuhimu wa kutii sheria ya Kibahá'í. Kama haitikii lazima aonywe mara kwa mara na, kama hii haifanikiwi, anapaswa kupoteza haki zake za kupiga kura. Katika suala la mnywaji ambaye anajaribu kuushinda udhaifu wake Baraza lazima lioneshe subira maalumu, na linaweza kutoa ushauri na msaada wa kitaalam. ”

(Kutoka barua iliyoandikwa kwa niaba ya Nyumba ya Haki ya Ulimwengu, Makatazo ya Vinywaji Vileweshavyo, Makusanyo, uk. 18-19)

“ . . . hakuna asasi ya Kibahá'í ambayo inapaswa kutoa vinywaji vya pombe katika hali yoyote ile, na pia tunaona kwamba Mbahá'í vile vile hapaswi kutoa vinywaji kama hivyo katika maadhimisho anayoyafanya yeye mwenyewe.”

(Nyumba ya Haki ya Ulimwengu, Makatazo ya Vinywaji Vileweshavyo, Makusanyo, uk. 14)

Dawa za Kulevya

“Juu ya kasumba, ni mbaya sana na imelaaniwa....Kwa kuwa kasumba huisakama roho, hivyo fahamu ya mtumiaji hufa, akili yake hufutiliwa mbali, maono yake humomonyoka. Hukigeuza kilicho hai kuwa kifu. Huzimisha joto la asili. Hakuna madhara makubwa zaidi yawezayo kuwazika kuliko yale yaletwayo na kasumba.”

(‘Abdu’l-Baha, Mateuzi kutoka Maandiko ya ‘Abdu’l-Baha, uk. 148-149)

“Enyi wapendwa wa Mungu! Katika duru hili la Mungu Mwenye nguvu, ghasia na ubabe, uzuiaji na udhalimu, kimoja na vyote vimelaaniwa. Walakini, ni lazima kwamba utumiaji wa kasumba uzuiwe kwa njia yoyote ile, ili huenda jamii ya binadamu iweze kuokolewa kutoka baa hili lenye nguvu sana.”

(‘Abdu’l-Baha, Mateuzi kutoka Maandiko ya ‘Abdu’l-Baha, uk. 149)

“Maisha ya ubikira na matakatifu kama hayo, yakiwa pamoja na matumizi yake ya stara, usafi, ukadirifu, ustahifu, na nia safi. . . huhitaji uepukanaji kamili na vinywaji vyote vya kulevya, kutoka kasumba na madawa kama hayo yanayoleta mazoea.”

(Shoghi Effendi, “Advent of Divine Justice”, pg 25)

Kujiepusha na Kuombaomba

“Watu wadharauliwao kabisa machoni pa Mungu ni wale ambao hukaa bure na kuombaomba.”

(Baha’u’llah, Kutoka “Tablets of Baha’u’llah”, pg. 26)

“Yeye ambaye... huaangalia mkono wa watu kupewa chochote, mjue kwamba Nimeachana na mtu kama huyo.”

(Abdu’l-Baha, “Star of The West, Vol. IV, No. 15 pg.255)

“... kama ana uwezo wa kufanya kazi hairuhusiwi kumsaidia. Watu wavivu hawapaswi kusaidiwa....”

(Abdu’l-Baha, “Star of The West, Vol. III, No. 11, pg.5)

“Binadamu wote lazima wajipatie riziki kwa kazi ngumu ya jasho na juhudi ya kimwili....”

(Abdu’l-Baha Uenezaji wa Amani ya Ulimwengu, uk. 187)

“Baha’u’llah husema kwamba uombaji* siyo tu haupaswi kuhamasishwa bali ufutwe kabisa kutoka uso wa jamii.”

(Shoghi Effendi, kutoka Kiingereza (American Bahai News), No. 108, pg.01)

“Baha’u’llah hukataza vyote viwili uombaji na kutoa kwa ombaomba....”

Kutoka Kiingereza (Synopsis and Codification of the Kitab-i-Aqdas”), pg. 64)

“Ikiwa mtu hana uwezo kujipatia riziki yake mwenyewe ni wajibu wa Nyumba ya Haki na wenye mali kumruzuku.”

Kutoka Kiingereza (Synopsis and Codification of the Kitab-i-Aqdas”), pg.63)

Kujizuia na Uchezaji Kamari

“Alipoulizwa ikiwa makatazo dhidi ya uchezaji kamari huhusu michezo ya aina zote, ‘Abdu’l-Bahā alijibu:

“La, baadhi ya michezo haina madhara, na ikiwa itafanywa kama burudani hakuna madhara, lakini kuna hatari kwamba burudani hiyo inaweza kugeuka kuwa upotezaji wa muda.”

The Dynamic Force of Example, (The Bahai Comprehensive Deepening Program), pg. 149)

Kujiepusha na Siasa

“Chama chetu ni chama cha Mungu; sisi hatumo katika chama chochote.”

(*‘Abdu’l-Baha, imenukuliwa katika Ujumbe wa Nyumba ya Haki ya Ulimwengu, 1968-1973, uk. 46*)

“Kutopendelea kamili katika jambo la vyama vya kisiasa lazima kuoneshwe kwa maneno na kwa vitendo, na upendo wa jamii nzima ya binadamu, iwe Serikali au taifa, ambao ndio fundisho la kimsingi la Baha’u’lláh, lazima pia uoneshwe kwa maneno na kwa vitendo. . . “

(*Shoghi Effendi, Kutoka “Directives from the Guardian”. 57*)

“Sisi Wabahá’í ni wamoja duniani pote; tunatafuta kujenga Utaratibu mpya wa Ulimwengu, mtakatifu kwa asili. Tunawezaje kufanya hivi ikiwa kila Mbahá’í ni mwanachama wa chama tofauti cha siasa—baadhi ya hivyo vikiwa tofauti kabisa kimoja kwa kingine? U wapi basi umoja wetu? Tungegawanyika, kwa sababu ya siasa, dhidi yetu sisi wenyewe, na hili ni kinyume cha kusudi letu. Ni dhahiri kwamba ikiwa Mbahá’í mmoja huko Austria anapewa uhuru kuchagua chama cha siasa na kujiunga nacho, haidhuru shabaha zake ziwe nzuri namna gani, Mbahá’í mwingine huko Japani au Amerika, au India, ana haki ya kufanya vile vile na anaweza kuwa katika chama ambacho ni tofauti kabisa kwa kanuni na kile ambacho Mbahá’í wa Austria yumo. Ungekuwa wapi basi umoja wa Imani? Hawa ndugu wawili wa kiroho wangekuwa wakitenda mmoja dhidi ya mwingine kwa sababu ya uanachama wao wa kisiasa (kama ambavyo Wakristo wa Ulaya wamekuwa wakifanya katika vita vingi vya kindugu). Njia nzuri kabisa kwa Mbahá’í kuitumikia nchi yake na dunia ni kufanya kazi kwa ajili ya usimamishaji wa Utaratibu wa Ulimwengu wa Baha’u’lláh, ambao pole pole utaunganisha watu wote na kuondolea mbali taratibu za mgawanyiko wa kisiasa na kanuni za kidini.”

(*Kutoka barua iliyoandikwa kwa niaba ya Shoghi Effendi, Principles of Bahá’í Administration, pg.31*)

“Marafiki wanaweza kupiga kura, ikiwa wanaweza kufanya hivyo bila kujitambulisha wenyewe na chama kimoja au kingine. Kuingia katika uwanja wa siasa za chama kwa hakika ni jambo la madhara kwa raghba za Imani na kutaidhuru Hoja. Inabakia kwa mtu binafsi kutumia haki yake kupiga kura kwa jinsi ambayo atajiweka mbali na siasa za chama, na wakati wote akikumbuka kwamba anapiga kura juu ya sifa za mtu, kuliko kwa sababu kwamba yeye ni wa chama kimoja au kingine. Suala hili lazima liwekwe wazi kabisa kwa watu binafsi, ambao wataachwa huru kutumia busara na uamuzi wao. Lakini kama mtu fulani ataingia katika siasa za chama na kushughulika kwa ajili ya ushindi wa chama kimoja dhidi ya kingine, na kuendelea kufanya hivyo kinyume na maombi yaliyoelezwa wazi na maonyo ya Baraza, basi Baraza lina haki ya kumnyima haki ya kupiga kura katika uchaguzi wa Kibahá’í.”

(Shoghi Effendi, Principles of Bahá’í Administration, pg.29-30)

“Mlinzi anapenda niwaelekeze marafiki kupitia ninyi kwamba wawe waangalifu sana katika mazungumzo yao ya hadhara wasitaje majina yoyote ya wanasiasa—ama kuwaunga mkono au kuwakana. Hili ni jambo la kwanza la kukumbuka. Vinginevyo watawashirikisha marafiki katika masuala ya kisiasa, ambayo ni hatari mno kwa Hoja.”

(Kutoka barua iliyoandikwa kwa niaba ya Shoghi Effendi, Principles of Bahá’í Administration, pg. 32)

“Uelewa na msimamo wenu kuhusiana na ushiriki katika siasa ni sahihi, yaani, mnatoa onyo mara moja na kwa haraka mnaondoa haki za kupiga kura, kwa kuwa kitendo cha haraka kama hicho ni cha lazima kwa ajili ya kulinda raghba za Imani.”

(Nyumba ya Haki ya Ulimwengu, Kutoka “Guidelines for Local Spiritual Assemblies”, pg. 81)

“Wabahá’í wanaweza, kwa kweli wanatiwa moyo, kuchangamana na tabaka zote za jamii, na watu wenye mamlaka wa ngazi za juu kabisa na viongozi mashuhuri vile vile pamoja na umma wa watu, na wanapaswa wapeleke habari za Imani kwao, lakini katika kufanya hivyo sharti waepukane kabisa na kujishirikisha, au kuishirikisha Imani, na shughuli za kisiasa na mipango ya vyama.”

(Nyumba ya Haki ya Ulimwengu, Ujumbe kutoka Nyumba ya Haki ya Ulimwengu, 1968-1973, uk. 47)

“Imani ya Mungu ndiyo chanzo pekee cha wokovu kwa binadamu hivi leo. Chanzo halisi cha magonjwa ya binadamu ni utangano wake. Haidhuru mbinu ya aina yoyote ile, hata iwe kamili jinsi gani itakayotumiwa na viongozi wa watu kwa ajili ya umoja wa kisiasa wa ulimwengu, bado haitatoa dawa kwa sumu inayodhoofisha nguvu ya jamii ya wakati huu. Magonjwa haya yanaweza kuponywa tu kupitia chombo cha Imani ya Mungu. Kuna watakia-mema wengi wa binadamu ambao hutoa juhudi zao kwa ajili ya kazi za msaada na hisani na kwa ajili ya usitawi wa kimwili wa binadamu, lakini ni Wabahá’í tu ndiyo wawezao kufanya ile kazi ambayo Mungu anataka hasa ifanyike. Tunapojifunga wenyewe kwa ajili ya kazi ya Imani tunafanya kazi ambayo ndio msaada mkubwa kabisa na kimbilio pekee kwa ulimwengu unaohitaji na uliogawanyika.”

(Nyumba ya Haki ya Ulimwengu, Ujumbe kutoka Nyumba ya Haki ya Ulimwengu, 1968-1973, uk 46)

“Imani haipingi raghba halisi za taifa lolote, wala haipo kinyume na chama au kikundi chochote. Inajiweka mbali na mabishano yoyote na huyapita yote mbali, wakati huo huo huwaamuru wafuasi wake kuwa watiifu kwa serikali na busara ya uzalendo wa mtu kwa nchi yake. Wabahá’í huuonesha upendo huu kwa nchi yao kwa kuhudumia usitawi wake katika shughuli zao za kila siku, au kwa kufanya kazi katika maeneo ya kiutawala serikalini badala ya kupitia siasa za chama au katika kazi za kibalozi au za kisiasa.”

(Nyumba ya Haki ya Ulimwengu, Ujumbe kutoka Nyumba ya Haki ya Ulimwengu, 1968-1973, uk 47)

Utiifu kwa Serikali

“Katika kila nchi au serikali ambapo yeyote wa jumuiya hii huishi, lazima waiheshimu serikali hiyo kwa uaminifu, utumainifu, na ukweli.”

(Baha’u’llah, Kutoka “Example of Bahá’í Life”, Compilation, pg.34)

“Hakuna yeyote aliyepewa haki kutenda kwa namna yoyote ambayo itakuwa kinyume na maoni yaliyoamriwa ya wale waliomo katika mamlaka.”

(Baha’u’llah, Kutoka kitabu cha Kiingereza “Gleanings from the Writings of Baha’u’llah” pg. 241)

“Lazima tutii na tuwe watakia-mema wa serikali za nchi, na kuuchukulia utovu wa uaminifu kwa mfalme mwenye haki kama utovu wa uaminifu kwa Mungu Mwenyewe na kuitakia mabaya serikali ni ukosefu kwa Hoja ya Mungu.”

(‘Abdu’l-Baha, Agano na Wasia wa ‘Abdu’l-Baha, uk.8)

“Na kuhusu kanuni ya Kibahá’í ya utii kwa serikali za haki, kwa haki, kinachomaanishwa hapa ni mamlaka yanayotambulika na yaliyosimamishwa vyema.... “

(Shoghi Effendi, Kutoka Kiingereza, “Bahá’í Laws”, pg. 64)

“Kile ambacho maneno ya Bwana hasa hukimaanisha ni utiifu kwa serikali iliyowekwa kikatiba, vyovyote vile serikali hiyo ilivyo kimuundo. Sisi kama Wabahá’í mmoja mmoja, hatupaswi kuihukumu serikali yetu kama ni ya haki au siyo ya haki—kwa kuwa kila muumini angekuwa na uhakika wa kuwa na maoni tofauti, na ndani ya kundi letu wenyewe la Kibahá’í fitina za mafarakano zingezuka na kuteketeza umoja wetu. Lazima tujenge utaratibu wetu wa Kibahá’í, na kuziacha taratibu zenye makosa za ulimwengu kwenda zake. Hatuwezi kuzibadilisha kwa kujihusisha nazo; kinyume chake zitatuangamiza..”

(Shoghi Effendi, Mwongozo kutoka kwa Mlinzi, uk. 56)

“Lazima tutii katika hali zote isipokuwa pale ambapo kanuni ya kiroho inahusika, kama vile kuikana Imani yetu. Kwa kanuni hizi za kiroho lazima tuwe tayari kufa.

(Shoghi Effendi, Kutoka Kiingereza, “Bahá’í Laws”, pg. 57)

“Kile ambacho sisi Wabahá’í lazima tukikabili ni ukweli kwamba jamii inachanguka kwa haraka sana kiasi kwamba mambo ya maadili ambayo yalikuwa wazi nusu karne iliyopita hivi sasa yamekanganyika pasipo na matumaini, na kilicho zaidi, yamekanganywa kabisa na raghba zinazoshindana za kisiasa. Ndiyo maana Wabahá’í lazima waelekeze nguvu zao zote katika njia ya ujenzi wa Hoja ya Kibahá’í na utawala wake. Hawawezi kubadilisha wala kuusaidia ulimwengu kwa njia nyingine yoyote ile katika wakati huu.”

(Shoghi Effendi, Principles of Bahá’í Administration, pg. 31)

“Katika Waraka mwingine Yeye (Baha’u’lláh) ameweka wajibu kwa wafuasi wake ‘kuiheshimu serikali ya nchi ambamo wanaishi kwa uaminifu, unyofu na ukweli.... ‘Abdu’l-Bahá alieleza: ‘Kiini cha moyo wa Kibahá’í ni kwamba, ili kusimamisha utaratbu bora zaidi wa kijamii na hali ya kiuchumi, lazima pawepo na utii kwa sheria na kanuni za serikali.”

(Nyumba ya Haki ya Ulimwengu, Kutojiingiza katika Siasa na Utii kwa Serikali, Makusanyo, uk. 24)

Kutokuwa Mshiriki Katika Makanisa na Mashirika Mengine ya Kidini

“...Sisi, kama Wabahá’í, hatupaswi kuwa na ushirika wowote na makanisa au vyama vya kisiasa...yeye ana uhakika kwamba mtakapotaamuli juu ya suala hili ninyi wenyewe mtaona hekima yake. Sisi kama Wabahá’í hatuwezi kujulikana kamwe kama wanafiki au kama watu wasio wakweli katika imani yao, na kwa sababu hiyo hatuwezi kukubali yote mawili, Imani ya Baha’u’lláh na mfumo unaofundishwa na makanisa. Makanisa yanangojea kuja kwa Yesu Kristo; sisi tunaamini Yeye amekwishakuja tena katika utukufu wa Baba. Makanisa hufundisha kanuni za imani–tofauti tofauti katika katika madhehebu mbalimbali–ambazo sisi kama Wabahá’í hatuzikubali, kama vile ufufuko wa kimwili, maungamo, au katika baadhi ya madhehebu, ukanushaji wa imani juu ya utungo wa mimba bila kumhusisha mwanaume. Kwa maneno mengine, hakuna kanisa la Kikristo hii leo ambalo kanuni zake za imani sisi Wabahá’í tunaweza kusema kwa ukweli kwamba tunazikubali zote kwa ujumla wao. Kwa hiyo, kubakia kuwa mshiriki wa kanisa siyo sawa kwetu, kwa kuwa tunafanya hivyo kwa kisingizio cha uwongo. Kwa hiyo, lazima tujitoe kutoka katika makanisa yetu lakini tuendelee kushirikiana, kama tukipenda kufanya hivyo, na washiriki wa makanisa na Makasisi.

Imani yetu katika Kristo, kama Wabahá’í, ni thabiti mno, isiyotingishika na iliyotukuka mno kwa asili kiasi kwamba ni Wakristo wachache sana wanaoweza kuonekana hii leo ambao humpenda na humcha Yeye na wana imani katika Yeye kama ambayo sisi tunayo. Ni kutoka kanuni na imani ya makanisa tu ndiyo tunajitenga wenyewe; siyo kutoka Moyo wa Ukristo.”

Kutoka barua iliyoandikwa kwa niaba ya Shoghi Effendi, Principles of Bahá’í Administration, pg. 30)

Wajibu Wetu Katika Jumuiya ya Kibahá'í

Mabaraza

Baraza la Kiroho la Kitaifa

“Baraza hili la Kiroho la Kitaifa...bila shaka hujitwalia majukumu makubwa, kwa kuwa inabidi litumie mamlaka kamili juu ya Mabaraza yote ya mahali katika nchi yake, na itabidi liongoze shughuli za Marafiki, kuilinda kwa hadhari Hoja ya Mungu, na kusimamia na kuongoza mambo ya Mjongeo kwa jumla.”

(Shoghi Effendi, Principles of Bahá'í Administration, pg.74)

“Hapawezi kuwepo mgongano wa kimamlaka, hakuna uwili katika jinsi au hali yoyote ya mambo katika eneo lolote la mamlaka ya Kibahá'í, liwe la mahali, la kitaifa au kimataifa. Baraza la Kitaifa, walakini, ingawa ndiyo mfafanuzi pekee wa Tangazo la Udhamini na Sheria zake ndogo ndogo, moja kwa moja na kimaadili ndiyo lenye kuwajibika kama likiruhusu mtu au asasi yoyote ndani ya mipaka ya mamlaka yake kutumia vibaya nafasi yake au kukataa kutumia haki na mamlaka yake.”

(Shoghi Effendi, Principles of Bahá'í Administration, pg.76)

Baraza la Kiroho la Mahali

“Katika ulimwengu mzima Mlinzi daima anawahamasisha na kuwaamuru waumini kujifunza kufanya kazi kulingana na sheria na kanuni za Kibahá’i; wajumbe wa Mabaraza ya Kiroho lazima wajifunze kuyakabili madaraka yao; watu binafsi lazima wajifunze kugeukia kwayo na kufuata maamuzi yao.”

(Katika barua iliyoandikwa kwa niaba ya Shoghi Effendi, Kutoka Kiingereza, “Baha’i Laws”, pg. 16)

“Kama Wabahá’i wangepuata sheria za Kibahá’i katika kupiga kura, katika uchaguzi, katika kutumikia, na katika kufuata maamuzi ya Baraza, upotezaji wote huu wa nguvu katika kuwakosoa wengine ungeweza kugeuzwa kuwa ushirikiano na utimizaji wa mpango.”

(Shoghi Effendi, Kutoka Kiingereza, “Baha’i Laws”, pg. 16)

“Kwake masuala yote ya mahali yahasuyo Hoja lazima yarejeshwe moja kwa moja na mara moja kwa ajili ya ushauriano kamili na uamuzi.”

(Shoghi Effendi, Principles of Bahá’i Administration, pg. 38)

“... Wabahá’i wote lazima wahamasishwe kugeukia kwenye Baraza lao kwa ajili ya utatuzi wa matatizo yao mbali mbali, hivyo kuliwezesha Baraza la Kiroho kutimiza mojawapo ya kazi zake muhimu kabisa.”

(Shoghi Effendi, Kutoka Kiingereza, “Baha’i Laws”, pg. 55)

“Mlinzi daima anawahimiza marafiki na Mabaraza kutimiza kazi zao binafsi; marafiki lazima wajifunze kukimbilia kwenye, na kutegemea, Mabaraza yao, na Mabaraza yajitwalie madaraka ya kufanya maamuzi na kuyatekeleza.”

(Kutoka barua iliyoandikwa kwa niaba ya Shoghi Effendi, Kutoka Kiingereza, “Baha’i Laws”, pg. 56-57)

“...ni lazima ifahamike kwamba kuna tofauti katika Imani kati ya mitazamo ambayo ungewaainisha watu binafsi katika uhusiano wao na watu wengine, yaani, msamaha wa upendo, ustahimilivu, na uhusikaji na dhambi za mtu mwenyewe, siyo dhambi za wengine, na mtazamo ule

ambao unapaswa kuoneshwa na Mabaraza ya Kiroho, ambayo wajibu wao ni kusimamia sheria ya Mungu kwa haki.”

(Nyumba ya Haki ya Ulimwengu, Ujumbe kutoka Nyumba ya Haki ya Ulimwengu, 1968-1973, uk. 110)

Ushauriano

“Kwa urafiki mkuu kabisa na katika moyo wa upatano kamili shaurianeni pamoja, na jitoleeni siku zenu za thamani za maisha yenu kwa ajili ya uboreshaji wa ulimwengu na uendelezaji wa Hoja ya Yeye Ambaye ndiye Bwana wa Kale na wa Enzi wa wote”.

(Baha 'u'llah, Kutoka kitabu cha Kiingereza “Gleanings from the Writings of Baha 'u'llah” pg. 184)

“Mbingu ya hekima takatifu huangaziwa kwa nyota mbili za ushauriano na huruma na kipaa cha utaratibu wa ulimwengu limeinuliwa juu ya nguzo mbili ya thawabu na adhabu.”

(Baha 'u'llah, Kutoka “Tablets of Baha 'u'llah, pg. 126)

“Ikiwa idadi ndogo ya watu itakusanyika pamoja kwa upendo, kwa usafi na utakatifu kabisa, na mioyo yao ikiwa huru kutokana na ulimwengu, wakipatwa na maono ya Ufalme na nguvu Takatifu za uwezo wa sumaku, na kuwa kitu kimoja katika ushirika wao wa furaha, mkusanyiko huo utakuwa na nguvu juu ya dunia nzima.”

(‘Abdu'l-Baha, Mateuzi kutoka Maandiko ya ‘Abdu'l-Baha, uk. 81)

“Jitahidini kadiri iwezekanavyo ili tofati zisiweze kutokea katika shughuli; msiache kila jambo dogo likawa chanzo cha kutopatana. Ikiwa hali kama hizo zitakuwepo mwisho utakuwa mtawanyiko mtupu. Waumini na vijakazi wa Mwenye rehema lazima wote wafikirie jinsi ya kuleta upatano, ili kwamba umoja wa ulimwengu wa binadamu uweze kupatikana, siyo kwamba kila jambo lisilo na maana kabisa lilete tofauti za maoni.”

(‘Abdu'l-Baha, Kutoka Kitabu cha Kiingereza “Baha'i World Faith” pg. 411)

“Yeye ameuweka ushauriano kama mojawapo ya kanuni za kimsingi za Imani Yake; huuelezea kama ‘taa ya uongozi,’ kama ‘mjalila fahamu,’ na kama mojawapo ya ‘nyota’ mbili za ‘mbingu ya hekima Takatifu.”

(Shoghi Effendi, Kutoka Kitabu cha Kiingereza, “God Passes By”. 218)

“Kanuni ya ushauriano, ambayo hufanya mojawapo ya sheria za kimsingi za Utawala, sharti itumiwe katika shughuli zote za Kibahá’í ambazo huathiri raghba za pamoja za Imani, kwa kuwa ni kwa kupitia ushirikiano na mwendelezo wa mabadilishano ya mawazo na mitazamo tu kwamba Hoja yaweza kulinda na kukuza raghba zake kwa ubora kabisa.”

(Kutoka barua iliyoandikwa kwa niaba ya Shoghi Effendi, Kutoka Kiingereza, “Consultation”, Compilation, pg. 8)

“... mara nyingi, mtu dhalili kabisa, asiye funzwa na asiye na tajiriba miongoni mwa marafiki, kwa nguvu ya uvuvio tu ya juhudi isiyo na ubinafsi na ya ibada yenye shauku, atachangia sehemu dhahiri na ya kukumbukwa katika majadiliano magumu kabisa katika Baraza lolote lile.”

(Shoghi Effendi, Kutoka Kiingereza, “Consultation”, Compilation, pg. uk. 7)

“... Baha’u’lláh ameamuru mahsusi sheria ya ushauriano na kamwe hakuonesha kwamba kitu kingine chochote kichukue nafasi yake.”

(Shoghi Effendi, Kutoka Kiingereza, “Consultation”, Compilation, pg. 10)

“Hebu pia tukumbuke kwamba jambo la msingi la Hoja ya Mungu siyo mamlaka ya uamrishaji bali ushirika wa unyenyekevu, siyo nguvu ya kuamuru, bali moyo wa ushauriano wa wazi na wenye upendo.”

(Shoghi Effendi, Principles of Bahá’í Administration, pg. 44)

“Hebu pia tukumbuke kwamba kwenye msingi hasa wa Hoja imewekwa kanuni ya haki isiyo na shaka ya mtu binafsi kujieleza mwenyewe, uhuru wake kutangaza dhamiri yake na kueleza wazi maoni yake.”

(Shoghi Effendi, Principles of Bahá’í Administration, pg. 44)

“Wabahá’í lazima wajifunze kusahau nafsi na kuishinda tamaa—ambayo ni ya kawaida sana katika watu—kuunga mkono upande mmoja

na kuupigania. Lazima pia wajifunze kutumia hasa kanuni kuu ya ushauriano.”

(Kutoka barua iliyoandikwa kwa niaba ya Shoghi Effendi, kutoka Bahá’í Meetings, – The Nineteen Day Feast, Compilation. pg.30)

“Marafiki wenyeji lazima waelewe umuhimu wa sheria ya ushauriano na kutambua kwamba ni kwenye Baraza la mahali ambako lazima wageukie ... na kuomba ushauri na mwongozo wake katika utatuzi wa matatizo ya mtu binafsi na uamuzi wa ugomvi, ikiwa utatokia miongoni mwa wana-jumuiya.”

(Nyumba ya Haki ya Ulimwengu, Kutoka Kiingereza, “Baha’i Laws”, pg. 57)

“Ni muhimu kutambua kwamba ari ya ushauriano wa Kibahá’í ni tofauti kabisa na ule uliopo sasa katika michakato ya ufanyaji maamuzi ya mashirika yasiyo ya Kibahá’í.

“Wazo bora kabisa la ushauriano wa Kibahá’í ni kufikia kwenye maamuzi ya pamoja. Ikiwa jambo hili haliwezekani kura lazima ipigwe. Katika maneno ya mpendwa Mlinzi: ‘...wanapotakiwa kufikia uamuzi fulani, wanapaswa, baada ya ushauriano wa uadilifu, dukuduku na mkunjufu, wamgeukie Mungu kwa sala, na kwa moyo wenye ari na ujasiri waandike kumbukumbu za kura yao na wafuate sauti ya walio wengi, ambayo tunaambiwa na Bwana kuwa ni sauti ya ukweli, kamwe isiyopingwa, na daima kutilia nguvu kwa moyo wote.

“Mara tu uamuzi unapofikiwa unakuwa ni uamuzi wa Baraza zima, siyo tu wa wale wajumbe waliokuwa miongoni mwa wengi.

“Inapopendekezwa kulipigia kura jambo fulani, mjumbe wa Baraza anaweza kuona kwamba kuna kweli au maoni ya ziada ambayo lazima yafafanuliwe kabla hajaweza kuamua kupiga kura kwa umaizi juu ya shauri hilo. Lazima aelezee nia hii kwa Baraza, na ni juu ya Baraza kuamua ikiwa ushauriano zaidi unahitajika kabla ya kupiga kura ama la.”

(Nyumba ya Haki ya Ulimwengu, Kutoka Kiingereza, “Consultation”, Compilation, pg. 12)

Karamu Ya Siku Kumi na Tisa*

“Karamu imeamriwa juu yenu mara moja kila mwezi, japo iwe kwa maji tu. Mungu kwa kweli amekusudia kuleta mioyo ya watu pamoja, japo huhitaji kila namna duniani na mbinguni.”

(Baha'u'llah, kutoka Bahá'í Meetings, – The Nineteen Day Feast, Compilation. pg. 17)

“Karamu ya Siku Kumi na Tisa ilianzishwa na Báb na kuidhinishwa na Baha'u'lláh, katika Kitabu Chake Kitakatifu, Aqdas, ili kwamba watu waweze kukusanyika pamoja na kuoneshana upatano na upendo. . . ”

(‘Abdu’l-Baha, kutoka Bahá'í Meetings, – The Nineteen Day Feast, Compilation. pg. 21)

“Fanyeni karamu za Siku Kumi na Tisa kwa heshima kuu kabisa.”

(‘Abdu’l-Baha, kutoka Bahá'í Meetings, – The Nineteen Day Feast, Compilation. pg. 9)

“Lazima muendeleo kuiadhimisha Karamu ya Siku Kumi na Tisa. Ni muhimu sana; ni nzuri sana. Lakini mnapoenda kwenye mikutano hii, kabla hamjaingia kwenye mikutano hiyo, jiwekeni huru wenyewe kutokana na vyote vile mlivyo navyo moyoni mwenu, wekeni huru mawazo yenu na akili zenu kutokana na vingine vyote isipokuwa Mungu, na zungumza na moyo wako. Ili wote waweze kuufanya huu kuwa mkusanyiko wa upendo, waufanye chanzo cha mwangaza, waufanye mkusanyiko wa mvuto wa mioyo, uzungukeni mkusanyiko huu kwa Miangaza ya Jeshi Kuu la mbinguni ili kwamba muweze kukusanywa pamoja kwa upendo mkuu kabisa....

“Kila mmoja wenu lazima afikirie jinsi ya kuwafanya wenye furaha na kuridhika wajumbe wengine wa Mkusanyiko wenu, na kila mmoja lazima awaone wale wote waliopo kama bora na wakuu zaidi kuliko yeye mwenyewe, na kila mmoja lazima ajione yeye mwenyewe kuwa mdogo kuliko wengine wote.

Ujue daraja lao kama la juu, na kufikiria daraja lako mwenyewe kama la chini. Kama mkitenda na kuishi kulingana na maagizo haya, mjue kwa kweli, kwa yakini, kwamba Karamu hiyo ni Chakula cha Mbinguni. Chakula hicho cha jioni ni ‘Chakula cha Jioni cha Bwana!’ Mimi ni mtumishi wa mkusanyiko huo.”

(‘Abdu’l-Baha, kutoka Bahá’í Meetings, – The Nineteen Day Feast, Compilation. pg. 20-21)

“Asasi ya Karamu ya Siku Kumi na Tisa hutoa wakati unaojulikana na wa mara kwa mara kwa ajili ya ushauriano wa wote kwa jumuiya, na kwa ajili ya ushauriano kati ya Baraza la Kiroho na wana-jumuiya.”

(Principles of Bahá’í Administration, pg. 51- 52)

**ni kwa Wabahá’í tu*

“Katika kipindi cha ibada ya Karamu ya Siku 19 sehemu yoyote ya Maandiko ya Báb, Baha’u’lláh na Bwana (‘Abdu’l-Bahá) inaweza kusomwa, pia kutoka Biblia na Qur’an, kwa kuwa yote haya ni maandiko matakatifu. Sehemu hii ya mkutano haipaswi kuwekewa mipaka kwa ajili ya sala tu, ingawa sala zaweza na lazima zisomwe katika wakati huu.”

(Kutoka barua iliyoandikwa kwa niaba ya Shoghi Effendi, kutoka Bahá’í Meetings, – The Nineteen Day Feast, Compilation. pg. 29)

“... kuhusiana na Karamu za Siku Kumi na Tisa; hizi siyo za lazima hasa kuhudhuria, lakini waumini sharti wajitahidi kuzihudhuria mara kwa mara, hasa kwa sababu kuu mbili zifuatazo: kwanza, kwa sababu zinakuza moyo wa huduma na ushirika katika jumuiya, na pili, kwa mtazamo wa ukweli kwamba huwapa waumini fursa nzuri kujadiliana kwa kina mambo ya Hoja na kutafuta njia na mbinu kwa ajili ya kuendeleza uboreshaji katika uendeshaji wa shughuli za Kibahá’í.

(Kutoka barua iliyoandikiwa kwa niaba ya Shoghi Effendi, kutoka Bahá’í Meetings, – The Nineteen Day Feast, Compilation. pg. 26)

“Kuhusiana na swali lako juu ya matumizi ya muziki katika Karamu za Siku Kumi na Tisa, yeye angependa ninyi muwahakikishie marafiki wote kwamba siyo tu anaidhinisha kitendo kama hicho, bali anakifikiria hata inafaa kwamba waumini sharti watumie, katika mikutano

yao, nyimbo za kumsifu Mungu zilizotungwa na Wabahá'í wenyewe, na pia zile nyimbo, mashairi na tenzi za kumsifu Mungu zilizotegemezwa katika Maneno Matakatifu.”

(Kutoka barua iliyoandikiwa kwa niaba ya Shoghi Effendi, kutoka Bahá'í Meetings, – The Nineteen Day Feast, Compilation. pg. 25)

“Inafaa zaidi Karamu ya Siku Kumi na Tisa iadhimishwe siku ya kwanza ya kila mwezi wa Kibahá'í, hivyo ndiyo kusema, siku ya Kibahá'í huanzia machweo. Ikiwa hili haliwezekani kwa sababu fulani za msingi,...basi inaweza kufanywa baadaye lakini lazima iangukie katika mwezi huo huo wa Kibahá'í na lazima iwe katika tarehe ya karibu kabisa iwezekanavyo.”

(Nyumba ya Haki ya Ulimwengu, kutoka Guidelines for Local Spiritual Assemblies, pg. 131)

“Kuhusu wageni kwenye Karamu ya Siku Kumi na Tisa, Wabahá'í kutoka popote duniani bila shaka inabidi wakaribishwe kwa moyo mkunjufu, na wanaweza kushiriki katika ushauriano.”

(Nyumba ya Haki ya Ulimwengu, kutoka Guidelines for Local Spiritual Assemblies, pg. 131)

“Karamu ya Siku Kumi na Tisa imeelezwa na Mlinzi kama msingi wa Utaratibu wa Ulimwengu wa Baha'u'lláh. Inapaswa iendeshwe kufuatana na utaratibu ufuatao:

- sehemu ya kwanza, ya ibada peke yake, imejikita kwenye usomaji wa sala za Kibahá'í na mateuzi kutoka Maandiko Matakatifu ya Kibahá'í;
- sehemu ya pili huhusu ushauriano wa wote juu ya Mambo ya Hoja;
- sehemu ya tatu ni karamu ya kimwili na mkutano wa kijamii wa waumini wote na inapaswa idumishe hali ya kiroho ya Karamu.”

(Nyumba ya Haki ya Ulimwengu, kutoka Guidelines for Local Spiritual Assemblies, pg. 129)

“Amri kwamba Wabahá’í peke yao ndio washiriki katika Karamu za Siku Kumi na Tisa siyo mpya, kwa kweli imerudiwa mara nyingi na mpendwa Mlinzi. Walakini, mtu asiye Mbahá’í akitokea kwenye Karamu, asiombwe kuondoka; bali Baraza liache ile sehemu ya ushauriano ya Karamu, na yule mtu asiye Mbahá’í akaribishwe. Bila shaka kama yule mtu asiye Mbahá’í anafahamika vyema na Wabahá’í na hakuna madhara yatakayotokea, anaweza kuombwa kujitenga wakati wa sehemu ya ushauriano. Kwa jumla, walakini, ni bora zaidi kuepukana na matatizo kama hayo pale inapowezekana. . . .”

(Nyumba ya Haki ya Ulimwengu, kutoka Guidelines for Local Spiritual Assemblies, pg. 132)

Mfuko wa Kibahá’í

“Kwa kuwa maendeleo na upanuzi wa shughuli za kiroho hutegemea na hufuatana na mali za kimwili, ni jambo la lazima kabisa kwamba mara tu baada ya uanzishwaji wa Mabaraza ya Kiroho ya Mahali vile vile ya Mabaraza ya Kiroho ya Kitaifa, Mfuko wa Kibahá’í uanzishwe, ukiwekwa chini ya usimamizi wa pekee wa Baraza la Kiroho. Misaada na michango yote lazima itolewe kwa Mhazini wa Baraza, kwa kusudi halisi la uendelezaji wa raghba za Hoja, katika eneo au nchi hiyo yote. Ni wajibu mtakatifu wa kila mtumishi mwangalifu kabisa na mwaminifu wa Baha’u’lláh ambaye hutamani kuona Hoja yake ikisonga mbele, kuchangia kwa hiari na kwa ukarimu kwa ajili ya ongezeko la Mfuko huo.”

(Shoghí Effendi, Principles of Bahá’í Administration, pg. uk.93)

“Heshima ya kuchangia kwenye Mfuko wa Kibahá’í, ‘damu ya uhai’ ya Utaratibu wa Kiutawala, inaweza kupatikana tu kwa kujitangaza wazi katika Imani. Baha’u’lláh husema, kwa uhalisi, kwamba Yeye atapokea vitu vya ulimwengu huu kutoka kwa wale tu ambao humtambua Yeye kama ‘Mmiliki wa vitu vyote’, ‘Mpaji’, ‘Ajitegemeaye’. Hoja Yake itajengwa kwa imani tu, na hali ya Mfuko, msingi imara ambao juu yake asasi zingine zote lazima kwa vyovyote zijengwe na kusimikwa’ ndiyo kipimo cha imani hii.”

(Principles of Bahá’í Administration, pg. 92)

“Ili kutoa mchango wako kwenye Mfuko lazima umjue Mhazini wa eneo lako. Kama wewe ni muumini pekee katika eneo lako unapaswa upeleke moja kwa moja kwa Mhazini wa Kitaifa. Kiasi utoacho ni jambo linalokuhusu wewe mwenyewe tu, na ni siri.”

(Principles of Bahá’í Administration, pg.. 93)

“Hakuna mtu yeyote anayeweza kudai kuwa mshiriki kamili wa Utaratibu wa Ulimwengu wa Baha’u’lláh kama hasaidii Mfuko, hata kama kidogo tu. Kitendo cha pamoja huhakikishwa kwa kila mmoja kuchangia: uhalisia wa kiroho wa ‘moyo mmoja katika miili mingi’ hudhihirishwa kupitia Mfuko pale inaposaidiwa na kila muumini.

“Mbahá’í binafsi hushiriki katika maisha ya jumuiya yake kwa kuchangia kwenye mfuko, na jumuiya hushiriki katika maisha ya jumuiya ya kitaifa kwa kupeleka michango ya mara kwa mara kwenye Mfuko wa Kitaifa. Vivyo hivyo, Mabaraza ya Kiroho ya Kitaifa huchangia kwenye Mfuko wa Kimataifa, na hivyo kila muumini asaidiaye Mfuko hushiriki katika shughuli za Imani za ulimwengu mzima.

“Tunaombwa kuwa wapevu na watambuzi wa majukumu yetu katika Siku hii, hivyo hakuna muumini atakayesumbuliwa kwa kuombwa fedha. Lakini lazima wote tujue kwamba ni sehemu ya maisha yetu ya Kibahá’í kuchangia kwenye Mfuko.”

“Tunajua kwamba maisha ya jumuiya ni ruwaza na msingi wa Ufalme, na kwa hiyo kila mtu binafsi lazima ashiriki katika maisha hayo, la sivyo msingi huo hautakuwa umechangiwa na wote....”

(Principles of Bahá’í Administration, pg. 94 – 95)

“Katika kujibu barua yenu...tumeombwa na Nyumba ya Haki ya Ulimwengu kueleza kwamba haifai kwa mifuko ya Imani kukusanywa na Asasi za Kibahá’í kupitia michezo ya kamari na bahati nasibu.”

(Kutoka barua iliyoandikwa kwa niaba ya Nyumba ya Haki ya Ulimwengu, kwa Baraza la Kiroho la Kitaifa la Mauritius iliyonukuliwa kutoka barua yao ya 24.8.1976, kwa Mabaraza yote ya Kiroho ya Mahali)

Kufundisha—Baadhi ya Mbinu na Ushauri

“Sema: Fundisheni Hoja ya Mungu, Enyi watu wa Bahá, kwa kuwa Mungu ameamuru kwa kila mmoja wajibu wa kutangaza Ujumbe Wake, na hukiona kama kitendo kistahilicho sifa kabisa kati ya vyote. Kitendo kama hicho hukubalika tu wakati yule afundishaye Hoja tayari ni muumini thabiti katika Mungu, Mhifadhi Mkuu, Mwenye neema, Mwenyezi. Yeye ameamuru, zaidi ya hayo, kwamba Hoja Yake ifundishwe kwa njia ya uwezo wa maneno ya watu, na siyo kwa njia ya kutumia nguvu. Hivyo ndivyo amri Yake ilivyotelemshwa kutoka Ufalme wa Yeye Ambaye ni Mtukufu—Kabisa, Mwenye Hekima—Kabisa.

“Jihadharini msije mkashindana na yeyote, la, jitahidini kumfahamisha ukweli kwa njia ya wema na mawaidha ya kusadikisha kabisa. Kama msikilizaji wenu ataitika, atakuwa ameitika kwa ajili yake mwenyewe, na kama hapana, geukieni mbali kutoka kwake, na elekezeni nyuso zenu kuelekea Kitala Kitakatifu cha Mungu, kiti cha utakatifu ung’aao.

“...Toka ulimwengu mzima Yeye amechagua kwa ajili yake Mwenyewe mioyo ya watu—mioyo ambayo majeshi ya ufunuo na maneno yaweza kuishinda.”

(Baha’u’llah, Kutoka kitabu cha Kiingereza “Gleanings from the Writings of Baha’u’llah” pg. 278-279)

“Msikae kitako na kimya! Tawanyeni habari njema za Ufalme kwa marefu na mapana hadi kuyafikia masikio, tangazeni Neno la Mungu, na wekeni katika vitendo ushauri na maagano ya Mungu; yaani, inukeni kwa zile tabia na sifa ili muweze kuendelea kujalia uzima kwa mwili wa ulimwengu, na kulea wakembe wa ulimwengu hadi kufikia daraja la upevu na ukamilifu.”

(‘Abdu’l-Baha, Kutoka Kitabu cha Kiingereza “Baha’i World Faith” pg. 353)

“Ufundishaji Hoja ni wa umuhimu wa hali ya juu kabisa kwa kuwa ndio jiwe la msingi—la msingi wenyewe.”

(*‘Abdu’l-Baha, Kutoka Kitabu cha Kiingereza “Baha’i World Faith” pg. 442*)

“Tunapoandikisha waumini wapya, lazima tuwe wenye hekima na wapole, na tusiweke vizuizi vingi mno njiani mwao kwamba waone haiwezekani kuikubali Imani. Kwa upande mwingine, mara tu wakipewa ushirika katika Jumuiya ya wafuasi wa Baha’u’lláh, lazima waeleweshwe vyema kabisa kwamba wanatazamiwa kuishi kufuatana na Mafundisho Yake, na kuonesha wazi ishara za tabia njema zinazokubaliana na Sheria Zake. Hii mara nyingi inaweza kufanywa pole pole, baada ya muumini mpya kuandikishwa.”

(*Shoghi Effendi, Kutoka “A Special Measure of Love”, Compilation, pg. 10*)

Ni bora zaidi kuwa na Mbahá’í mmoja ambaye anaelewa Mafundisho na kuamini kwa moyo wote juu ya ukweli wake, kuliko kuwa na idadi ya Wabahá’í ambao hawaifahamu vyema Hoja, na ambao hawajajikita kwa kina katika Agano.”

(*Kutoka barua iliyoandikwa kwa niaba ya Shoghi Effendi, “The Importance of Deepening our Knowledge and Understanding of the Faith”. Compilation, pg. 34*)

- “ Mwache, wakati miadi kama hiyo ikifanywa, akumbuke madai ambayo Imani yake daima huyaweka juu yake kuhifadhi hadhi ya Imani na daraja lake, kulinda kwa ukamilifu sheria na kanuni zake, kuonesha ufahamivu wake wa mambo yote na ushirikishaji wa wote, na kutetea bila woga raghba zake nyingi na za lazima.”
- Mwache afikirie kiwango cha upokevu cha wasikilizaji wake, na kujiamulia yeye mwenyewe ufaaji wa ufundishaji, ama wa moja kwa moja au usio wa moja kwa moja, ambao kwao ataweza kuweka mvuto kwa mtafutaji juu ya umuhimu mkuu mno wa Ujumbe Mtakatifu, na kumshawishi kujumuika moja kwa moja na wale waliokwisha ikumbatia.

- Mwache akumbuke mfano uliowekwa na ‘Abdu’l-Bahá, na onyo Lake la siku zote la kunyunyizia wema kama huo juu ya mtafutaji huyo, na kuonesha kwa kiwango kikubwa sana kusudi la mafundisho analotumaini kulingiza ndani mwake, kwamba mpokeaji atalazimika kwa hiari yake kujitambulisha mwenyewe kwenye Hoja inayojumuisha mafundisho kama hayo.
- Mwache ajizuie, tangu mwanzoni kabisa, kusesitiza juu ya zile sheria na kanuni ambazo zaweza kuweka mkazo mkali mno juu ya imani iliyoamshwa hivi karibuni ya mtafutaji, na kujitahidi kumlea, kwa uvumilivu, kwa busara, ingawa kwa kudhamiria, hadi kufikia upevu kamili, na kumsaidia kukiri dhahiri bila masharti yoyote chochote kilichoamriwa na Baha’u’lláh.
- Mwache, mara tu hatua kama hiyo ifikiwapo, amtambulishe kwa waumini wenzake, na kutafuta, kwa kupitia undugu wa daima na ushiriki amilifu katika shughuli za eneo za jumuiya yake, kumwezesha kuchangia sehemu yake kwenye usitawi wa maisha ya eneo, uendelezaji wa kazi zake, uimarishaji wa raghba zake, na uratibu wa shughuli zake na zile za jumuiya ndugu.
- Mwache asiridhike mpaka ameingiza ndani ya mtoto wake wa kiroho shauku kubwa mno kiasi kwamba iweze kumchochea kuinuka kwa kujitegemea, kwa wakati wake, na kujitoa nguvu zake kwenye uhuishaji wa roho zingine, na uteteaji wa sheria na kanuni zilizowekwa na Imani yake aliyoikubali hivi karibuni.”

(Shoghi Effendi, Kutoka Kitabu cha Kiingereza “Advent of Divine Justice”, pg. 43-44)

“Baada ya kujitangaza, waumini hao wapya lazima wasiachwe kufanya watakavyo. Kwa kupitia barua na kutuma wageni, kupitia mikutano na kozi za mafunzo, marafiki hawa lazima waimarishwe kwa subira na kusaidiwa kwa upendo kukua hadi kufikia upevu kamili wa Kibahá’í. Mpendwa Mlinzi, akirejelea kwenye majukumu ya mabaraza ya Kibahá’í katika kumsaidia muumini aliyejitangaza karibuni, ameandika hivi: ‘... wajumbe wa kila baraza lazima wajitahidi, kwa uvumilivu wao, upendo

wao, busara na hekima yao, kumlea, baada ya kukubaliwa kwake, mgeni hadi kufikia upevu wa Kibahá'í, na kumuongoza taratibu kukubali bila masharti, chochote kile kilichoamriwa katika mafundisho.'

Upanuzi na uimarishaji ni michakato pacha ambayo lazima iende sambamba. Marafiki wasisimamishe upanuzi kwa kisingizio cha uimarishaji. Kuwaelimisha kwa kina waumini wapya hufanyiza kichocheo kikubwa mno ambacho huleta upanuzi zaidi. Uandikishaji waumini wapya, kwa upande mwingine, huleta ari mpya katika jamii na huleta nguvu kazi za ziada ambazo zitaongeza nguvu ya uimarishaji."

(Nyumba ya Haki ya Ulimwengu, Kutoka "Wellspring of Guidance", pg. 32-33)

"Marafiki lazima wafahamishwe kwamba katika ufundishaji Imani kwa wengine wasikusudie tu katika kuisaidia ile roho inayotafuta kujiunga na Imani, bali pia katika kumfanya yeye kuwa mwalimu wa Imani na mfuasi wake amilifu."

Nyumba ya Haki ya Ulimwengu, Kutoka "A Special Measure of Love", Compilation, pg.32)

"Wanapofundisha miongoni mwa watu wengi, marafiki lazima wawe waangalifu kutosisitiza mambo ya hisani na misaada ya kibinadamu ya Imani kama njia ya kujipatia waumini wapya. Tajiriba imeonesha kwamba, misaada kama vile shule, zahanati, hospitali, au hata nguo na chakula vikitolewa kwa watu wafundishwao, matatizo mengi huibuka. Motisha kuu wakati wote lazima iwe uitikaji wa mtu kwa Ujumbe wa Mungu, na utambuzi wa Mjumbe Wake. Wale wanaojitangaza wenyewe kama Wabahá'í sharti wavutiwe na uzuri wa mafundisho, na kuguswa na upendo wa Baha'u'lláh."

(Nyumba ya Haki ya Ulimwengu, Kutoka "Wellspring of Guidance", pg. 32)

"Kwa muhtasari:

“1. Ufundishaji wa watu wengi ni ukweli unaolikabili kila Baraza la Kitaifa.

“2. Marafiki lazima wafundishe kwa imani, dhamira, upendo halisi, utovu wa chuki, na lugha rahisi igusayo moyo.

“3. Ufundishaji lazima ufuatiwe na kozi za mafunzo, mikutano, na ziara za mara kwa mara kuwaelimu kwa kina waumini katika uelewa wao wa mafundisho.

“4. Uhusiano wa karibu wa ofisi ya kitaifa au kamati za ufundishaji na kazi za ufundishaji ni wa muhimu kabisa, ili kwamba kwa kupitia taarifa na barua si tu kwamba taarifa hupatikana na kuthibitishwa, bali pia kichocheo na hamasa hutolewa.

“5. Upanuzi na uimarishaji huenda sambamba.”

*(Nyumba ya Haki ya Ulimwengu, Kutoka “Wellspring of Guidance”,
pg. 36)*

“Lengo kuu muhimu la kazi ya ufundishaji katika wakati huu ni kuchukua Ujumbe wa Baha’u’llah kwa kila tabaka la jamii ya binadamu na kila nyanja ya maisha.”

*(Nyumba ya Haki ya Ulimwengu, Kutoka “Wellspring of
Guidance”, pg. 124)*

“Kusudi la ufundishaji halikamiliki pale mtu ajitangazapo kwamba amemkubali Baha’u’llah kama Mdhihirishaji wa Mungu kwa zama hizi; kusudi la ufundishaji ni kuwavutia wanadamu kwenye Ujumbe mtakatifu na hivyo kuwajaza kwa roho Yake ili wajitoe wenyewe kwa huduma yake, na ulimwengu huu utakuwa ulimwengu mwingine na watu wake watu wengine. Ikiangaliwa kwa muktadha huu kujitangaza kwa imani ni hatua moja tu ndogo katika safari hii ndefu—ingawa ni muhimu sana. Ufundishaji pia unaweza kufananishwa na uwashaji moto, moto wa imani, katika mioyo ya watu. Ikiwa moto utawaka tu maadam kijiti cha kiberiti kimeshikiliwa kwake, haiwezekani kusemwa kwa kweli kuwa

umewashwa; ili uwe umewashwa, lazima uendeleo kuwaka kwa hiari yake wenyewe. Baada ya hapo mafuta zaidi yanaweza kuongezwa na mwali wa moto unaweza kupepewa, na hata kama ukiachwa pekee kwa muda, moto uliowashwa vyema hautazimika ukipata pumzi ya kwanza ya upepo.

“Kwa hiyo, shabaha ya asasi zote za Kibahá’í na walimu wa Kibahá’í ni kusonga mbele daima hadi kwenye maeneo mapya na matabaka ya kijamii, kwa ule ukamilifu kiasi kwamba, kadiri cheche ya imani iwashavyo mioyo ya wasikilizaji, ufundishaji wa waumini huendelea mpaka, na hata baadaye, watakapochukua majukumu yao kama Wabahá’í na kushiriki katika kazi zote mbili za ufundishaji na kiutawala za Imani.”

(Nyumba ya Haki ya Ulimwengu, kutoka barua iliyoandikwa kwa Mabaraza ya Kiroho ya Kitaifa yote, tarehe 25 Mei, 1975)

“Kila Mbahá’í, hata awe mpole au asiyeweza kujieleza, lazima adhamirie kutimiza kazi yake kama mchukuzi wa Ujumbe Mtakatifu. Kwa kweli, itawezekanaje kwa muumini wa kweli abakie kimya wakati watu wanaotuzunguka hupaza sauti kwa uchungu kwa ajili ya ukweli, upendo na umoja ushukie kwenye ulimwengu huu?”

(Nyumba ya Haki ya Ulimwengu, Ujumbe kutoka barua Nyumba ya Haki ya Ulimwengu 1968-973, uk.34)

Kujielimisha kwa Kina

“Jizamisheni wenyewe katika bahari ya maneno Yangu, ili muweze kufumbua siri zake, na kugundua lulu zote za hekima ambazo zimefichwa katika vina vyake.”

(Baha'u'llah, Kutoka kitabu cha Kiingereza “Gleanings from the Writings of Baha'u'llah” pg. 136)

“Durusu kila siku aya zilizofunuliwa na Mungu. Amebarikiwa mtu yule ambaye huzitongoa na kutafakari juu yake. Yeye kwa kweli ni kati ya wale ambao kwao itakuwa heri.”

*(Baha'u'llah, Kutoka kitabu cha Kiingereza “The Importance of Deepening our Knowledge and Understanding of the Faith”.
Compilation, pg.2)*

“Tafakari juu ya kile ambacho kimetiririka kutoka mbingu ya Mapenzi ya Bwana wako, Yeye Ambaye ndiye Chanzo cha neema yote, ili uweze kupata maana iliyokusudiwa ambayo imehifadhiwa katika vina vitakatifu vya Maandiko Matakatifu.”

(Baha'u'llah, Kutoka “Tablets of Baha'u'llah”, pg. 143)

“Katika siku hii hakuna jambo muhimu zaidi kuliko mafunzo na usomaji wa mathibitisho yaliyo dhahiri na ya kuridhisha, majadiliano ya mbinguni, kwani humo ndimo imo asili ya uhai na njia ya wokovu.”

*(‘Abdu’l-Baha, Kutoka kitabu cha Kiingereza “The Importance of Deepening our Knowledge and Understanding of the Faith”.
Compilation, pg. 7)*

“Kujielimisha kwa kina katika Hoja humaanisha kusoma maandiko ya Baha'u'llah na ya Bwana (‘Abdu’l-Baha) kwa ukamilifu hata kuweza kuyatoa kwa wengine katika hali yake safi kabisa.... Hakuna ukomo katika ujifunzaji wa Hoja. Kadiri tusomavyo zaidi Maandiko, ndivyo tutakavyopata ukweli zaidi ndani yake na ndivyo tutakavyoona zaidi kwamba mawazo yetu ya awali yalikuwa na makosa.”

(Shoghi Effendi, Kitabu cha Kiingereza, “Principles of Baha’i, Administration”, pg. 11)

“Sisi... sharti tujifunze daima Neno lihuishalo, na kwa huduma ya kujitolea kujielimisha kwa kina katika uelewa wa kiroho...”

(Nyumba ya Haki ya Ulimwengu, Kutoka kitabu cha Kiingereza “Wellspring of Guidance”, pg. 18)

“Marafiki wapendwa sana, hii ndiyo mada ambayo lazima tuifuatilie katika juhudi zetu kujielimisha kwa kina katika Hoja. Ni nini kusudi la Baha’u’llah kwa mbari za binadamu? Kwa makusudi gani Yeye alikubali ukatili wa kutisha na udhalilishaji ambao ulilundikwa juu yake? Anamaanisha nini anaposema ‘mbari mpya ya watu’? Ni mabadiliko gani makuu ambayo atayaleta? Majibu yatapatikana katika maandiko matakatifu ya Imani yetu na fasiri zake zilizofanywa na ‘Abdu’l-Bahá na mpendwa wetu Mlinzi (Shoghi Effendi). Acha marafiki wajizamishe wenyewe katika bahari hii, acha waaandae madarasa ya mafunzo ya mara kwa mara kwa ajili ya kuyazingatia daima, na uimarishaji wa jitihada zao, acha wakumbuke kwa uangalifu mahitaji ya sala ya kila siku na usomaji wa Neno la Mungu ulioamriwa kwa Wabahá’i wote na Baha’u’lláh.”

(Nyumba ya Haki ya Ulimwengu, Kutoka kitabu cha Kiingereza “Wellspring of Guidance”, pg.114-115)

Ufunzaji Watoto

“Shule lazima kwanza zifunze watoto katika kanuni za dini, ili kwamba ile Ahadi na Tishio vilivyoandikwa katika Vitabu vya Mungu, viweze kuwazuia wasifanye mambo yaliyokatazwa na kuwapamba kwa vazi la kuzingatia sheria; Lakini hii kwa kipimo ambacho hakitaweza kuwadhuru watoto kwa kuwafanya wenye imani kali na ushupavu wa kijinga katika dini.”

(Baha'u'llah, Kutoka "Tablets of Baha'u'llah", pg. 68)

“Juu ya swali lako kuhusu elimu ya watoto: imekupasa kuwalea kwenye kifua cha upendo wa Mungu, na kuwahimiza mara moja kwenye mambo ya kiroho, ili waweze kugeuzia nyuso zao kumwelekea Mungu; kwamba mienendo yao iendane na kanuni za mwenendo mwema na silka yao iwe ya juu kabisa; kwamba watende uzuri wote na sifa njema za kibinadamu ziwe zao; kupata ujuzi kamili wa matawi mbalimbali ya elimu, ili kwamba toka mwanzo kabisa wa maisha yao waweze kuwa viumbe wa kiroho, wakaaji katika Ufalme, wanaovutiwa na pumzi tamu za utakatifu, na waweze kupata elimu ya kidini, ya kiroho, na ya Milki ya Mbinguni.”

(‘Abdu’l-Bahà, Kutoka kitabu cha Kiingereza “Gleanings from the Writings of Abdu’l-Bahà ” pg. 142)

“Lazima wajitahidi kwa njia zozote zile ziwezekanazo kuelimisha jinsi zote mbili, kike na kiume; wasichana kama wavulana; hakuna tofauti yoyote kati yao. Ujinga wa wote wawili hustahili kulaumiwa, na ajizi katika mambo yote mawili hustahili kukemewa.”

(‘Abdu’l-Baha, Kutoka Kitabu cha Kiingereza “Baha’i World Faith” pg. 399)

“Acha kinamama wafikirie kwamba chochote kihusucho elimu ya watoto ni cha umuhimu wa kwanza. Acha waweke kila juhudi katika suala hili, kwa kuwa tawi likiwa bichi na changa litaweza kukua kwa njia yoyote utakayoielekezea. Kwa hiyo inawapasa akina mama kuwalea watoto wao wadogo mithili ya mtunza bustani atunzavyo miche yake michanga. Acha wajibidiishe mchana na usiku kuweka ndani mwa

watoto wao imani na yakini, kicho cha Mungu, upendo wa Mpendwa wa malimwengu, na sifa njema zote na tabia.”

(‘Abdu’l-Baha, Kutoka kitabu cha Kiingereza “Gleanings from the Writings of Baha’u’llah” pg. 125)

“Mnapaswa mfikirie suala la tabia njema kama la umuhimu wa kwanza. Inawapasa baba na mama kuwa washauri kwa watoto wao kwa kipindi kirefu, na kuwaongoza kwenye mambo yale ambayo huelekeza kwenye heshima ya milele.”

(‘Abdu’l-Baha, Mateuzi kutoka Maandiko ya ‘Abdu’l-Baha, uk. 134)

Katika Zama hizi mpya na za ajabu, msingi usiotikisika ni ufundishaji wa sayansi na sanaa. Kufuatana na Maandiko Matakatifu yaliyo dhahiri, kila mtoto lazima afundishwe kazi na sanaa, kwa kiwango kinachohitajika. Kwa hiyo, katika kila mji na kijiji, shule lazima zianzishwe na kila mtoto katika mji huo au kijiji ni lazima ajihusishe katika mafunzo hadi kiwango kinacho hitajika.”

(‘Abdu’l-Baha, Kutoka kitabu cha Kiingereza “Gleanings from the Writings of Baha’u’llah” pg. 134-135)

Ufunzaji katika maadili na mwenendo mzuri ni muhimu zaidi kuliko mafunzo ya vitabu. Mtoto ambaye ni msafi, mkunjufu, mwenye tabia njema, mwenye kujiheshimu – hata kama akiwa mjinga – ni bora zaidi kuliko mtoto ambaye ni fidhuli, mchafu, mwenye tabia mbaya, na bado akawa mjuzi sana katika sayansi na sanaa zote. Sababu ya hili ni kwamba mtoto ambaye ana adabu, hata kama akiwa mjinga, ni wa manufaa kwa wengine, ambapo mtoto mwenye tabia mbaya, asiyejijiheshimu ameharibika na mwenye madhara kwa jamii, hata kama akiwa amelimika. Ikiwa, walakini, mtoto akifunzwa kuwa vyote viwili mwenye elimu na mwema, matokeo yake ni mwanga juu ya mwanga.”

(‘Abdu’l-Baha, Kutoka kitabu cha Kiingereza “Gleanings from the Writings of Baha’u’llah” pg. 135-136)

Kuwahamasisha Vijana*

“Enyi miti na mimea michanga, isiyo na kifani na myororo, ikuayo katikati ya bustani ya miongozo! Ee enyi wageni kwenye Undugu wa Ukweli!

“Ingawa hivi sasa ninyi ni wanafunzi, tumaini ni kwamba kupitia manyunyu kutoka mawingu ya neema, mtakuwa walimu; kwamba mtashamiri kama vile maua na majani yanukiayo katika bustani ya ile elimu ambayo ni ya akili na ya moyo; kwamba kila mmoja wenu atakua kama mti uliojaa matunda, mzuri, mbichi na wenye nguvu, ukielemewa na matunda matamu. . . .

“Hivyo, Enyi vijana waangavu, jitahidini usiku na mchana kufumbua siri za akili na roho, na kufahamu siri za Siku ya Mungu. Jiarifuni wenyewe juu ya shuhuda kwamba Jina Kuu Kabisa limepambazuka. Fungueni midomo yenu katika himidi. Toeni hoja na mathibitisho ya kusadikisha. Ongozeni wale wenye kiu kwenye chemchemi ya uhai; wapatieni afya ya kweli wagonjwa. Muwe wanafunzi wa kazi za Mungu; muwe matabibu wanaoongozwa na Mungu, na waponyeni wagonjwa miongoni mwa binadamu. Waingizeni wale waliotengwa ndani ya duara la marafiki wa karibu. Wafanyeni wale waliokata tamaa kujazwa na tumaini. Waamsheni wale wanaolala; wafanyeni wasiojali kuwa wenye kujali.

“Hivyo ndivyo yalivyo matunda ya maisha ya kidunia. Hivyo ndivyo lilivyo daraja lenye utukufu ung’ao.”

(Abdu’l-Baha, Kutoka Kitabu cha Kiingereza “Bahá’í Education, Compilationm pg 52-53)

“Vijana kwa hakika ni wale ambao kwao hoja lazima ichukue kujitoa kwao kwaajili ya miito yake mikuu, kwa kuwa yenyewe pekee hushikilia ahadi ya usalama wao wa baadaye. Bila kile ambacho Baha’u’llah amekitoa kwa binadamu, mtazamo wa siku za baadaye za ulimwengu kwa hakika ungeonekana usio wa matumaini kabisa, kwa kuwa nguvu za uovu katika asili ya watu huonekana zimepata ushindi, na ni nguvu ya kiroho tu, moja kwa moja kutoka kwa Mungu, ambayo itaiwezesha asili

njema ya binadamu kujitwalia tena mamlaka juu ya maisha ya watu.”

*(Kutoka barua iliyoandikwa kwa niaba ya Shoghi Effendi,
Kutoka “The Baha’i Youth, Compilation”, pg.3-4)*

“Yeye huwahimiza ninyi (vijana) kuazimia kufanya matendo makubwa, *mkubwa* kwa ajili ya Imani; hali ya ulimwengu pole pole inakuwa mbaya kabisa, na kizazi chenu lazima kitoe watu watakatifu, mashujaa, wafia dini na watawala wa miaka ijayo. Kwa kujitoa na kwa nia uthabiti, mnaweza kuinuka kufikia vilele vikuu!”

*(Kutoka barua iliyoandikwa kwa niaba ya Shoghi Effendi,
Kutoka “The Baha’i Youth, Compilation”, pg. 6)*

“Yeye huona kwamba vijana, lazima daima na kwa kudhamiria wajitahidi kutoa mfano wa maisha ya Kibahá’í. Katika ulimwengu unaotuzunguka tunaona mmomonyoko wa maadili, uzinifu, utovu wa adabu, ufidhuli, tabia mbaya – vijana wa Kibahá’í lazima wawe kinyume cha mambo haya, na, kwa utakatifu wao, unyofu wao, adabu yao, kudhukuru kwao na tabia njema, wawavutie wengine, wakubwa kwa wadogo, kwenye Imani. Ulimwengu umechoshwa na maneno haya; unataka mfano, na ni juu ya vijana wa Kibahá’í kuutoa.”

*(Kutoka barua iliyoandikwa kwa niaba ya Shoghi Effendi,
Kutoka “The Baha’i Youth, Compilation”, pg.7-8)*

“Kuwa Mbahá’í bila shaka unatambua ukweli kwamba Baha’u’lláh aliichukulia elimu kama mojawapo ya mambo ya msingi kabisa ya ustaarabu wa kweli. Elimu hii, walakini, ili iweze kuwa ya kutosheleza na yenye manufaa, lazima iwe ya mambo mengi kwa asili na haipaswi izingatie tu upande wa kimwili na wa kiakili wa mtu lakini pia vipengele vyake vya kiroho na vya kimaadili. Hii ndio inapaswa iwe programu ya mafunzo kwa vijana wa Kibahá’í ulimwenguni kote.”

(Kutoka barua iliyoandikwa kwa niaba ya Shoghi Effendi, Kutoka “The Baha’i Youth, Compilation”, pg.10-11)

**Vijana huandikisha imani yao kwa Baha'u'llah kwenye umri wa miaka 15. Wanaweza kupiga kura katika uchaguzi wa Kibaha'i kwenye umri wa miaka 18 na kuhudumu kwenye asasi zilizochaguliwa kwenye umri wa miaka 21. Wanaweza kuhudumu katika nafasi za kuteuliwa kwenye umri mdogo zaidi.*

“Ingawa bado mdogo katika umri, lazima ujitahidi kuanzia sasa, kupitia ushirikiano wa karibu na waumini wenzako, na kupitia matumizi ya uaminifu ya mafunzo yako ya Kibahá’í, kujiandaa mwenyewe kwa ile siku utakapotakiwa, kama mtu mzima na mshiriki mwenye kuwajibika wa Jumuiya, kushiriki kikamilifu katika shughuli za Hoja, na hivyo kujithibitisha mwenyewe astahiliye kuwa mshiriki wa Ushirika huu wa ulimwengu mzima uliofanywa na Baha’u’lláh.”

(Kutoka barua iliyoandikwa kwa niaba ya Shoghi Effendi, Kutoka “The Baha’i Youth, Compilation”, pg.13)

“... Hakuna uthibitisho mkubwa zaidi uwezao kutolewa kwa watu... wa nguvu ya ujana na uwezo ulio hai uhuishao maisha, na asasi ya Imani changa ya Baha’u’lláh kuliko ushiriki wa kiakili, usiochoka na ufaao wa Vijana wa Kibahá’í, wa kila mbari, taifa, na tabaka, katika maeneo yote mawili ya ufundishaji na utawala ya shughuli ya Kibahá’í. Kupitia ushiriki kama huo wale wachunguzi na maadui wa Imani, wakitazama kwa viwango vibadilikavyo vya shaka na chuki, michakato ya mabadiliko ya Hoja ya Mungu na asasi zake, watasadikishiwa kabisa juu ya ukweli usiokanika kwamba Hoja kama hii ni hai kabisa, ni nzima katika kiini chake hasa, na hali yake hatma imo katika ulinzi.”

(Kutoka barua iliyoandikwa kwa niaba ya Shoghi Effendi, Kutoka “The Baha’i Youth, Compilation”, pg. 23)

“Sambamba na ukuaji wa maisha yake ya ndani kupitia sala, taamuli, huduma na ujifunzaji wa mafundisho, vijana wa Kibahá’í, wanayo fursa ya kujifunza kwa vitendo utendaji kazi hasa wa Utaratibu wa Baha’u’lláh. Kupitia ushiriki katika mikutano na shule za kiangazi na vile vile katika Karamu za Siku Kumi na Tisa, na katika huduma kwenye kamati, wanaweza kukuza ujuzi wa ajabu wa ushauriano wa Kibahá’í, hivyo kuchora njia mpya za utendaji wa ushirika wa binadamu.

...Vijana pia hushiriki katika maisha ya jumuiya ya Kibahá’i kwa ujumla na huendeleza jamii ambamo vizazi vyote—wazee, wenye umri wa kati, vijana, watoto—wamejumuika kikamilifu na kufanya jamii moja timilifu. Kwa kukataa kupeleka mbele uadui na tuhuma kati ya vizazi ambavyo hufadhaisha na kutesa jamii ya kisasa, watathibitisha tena uponyaji na asili ihuishaji ya dini yao.’

(Nyumba ya Haki ya Ulimwengu, Kutoka “The Baha’i Youth, Compilation”, pg. 30-31)

“Macho ya watu wa ulimwengu yanaanza kutulenga sisi; na, kadiri hali ya binadamu iendavyo kutoka kuwa mbaya hadi kuwa mbaya zaidi, daima tutaangaliwa zaidi kwa makusudi na watu wasio Wabahá’i, kuona ikiwa tunazitetea asasi zetu kwa moyo wote; ikiwa sisi ni watu wa muumbo mpya au la, ikiwa tunaishi kufuatana na imani, kanuni na sheria zetu kwa vitendo hali kadhalika kwa maneno. Hatuwezi kuwa waangalifu mno. Hatuwezi kuwa wa mfano mno.”

(Kutoka barua iliyandikwa kwa niaba ya Shoghi Effendi, kutoka Kiingereza, “Excellency in All Things” Compilation, p. 13)

MAREJELEO

Maneno Ya Baha'u'lláh

Mateuzi Kutoka Kitab-i-Aqdas

1. uk
2. uk
3. uk
4. uk
5. uk
6. uk
7. uk

-Yote Kutoka “Ufupisho na Mpangilio wa Sheria na Maagizo ya Kitáb-i-Aqdas”

8. uk
9. uk
10. uk
11. uk
12. uk
13. uk

Kutoka kitabu cha Kiingereza “Gleanings from the Writings of Baha'u'lláh” (Buga Kutoka Maandiko Ya Baha'u'lláh) Makala ya Amerika

Umoja na Amani

14. uk
15. uk
16. uk

22. uk
23. uk
24. uk
25. uk
26. uk
27. uk
28. uk
29. uk
30. uk

Hii Ndiyo Ile Siku

17. uk
18. uk
19. uk
20. uk
21. uk

Mashauri

31. uk
32. uk
33. uk
34. uk
35. uk
36. uk
37. uk
38. uk

39. uk
40. uk
41. uk
42. uk
43. uk
44. uk
45. uk

Maneno Yaliyofichwa Ya Bahá'u'lláh

Kutoka Kiarabu

46. na 1
47. na 2
48. na 6
49. na 11
50. na 18
51. na 27
52. na 31
53. na 32
54. na 39
55. na 52
56. na 53

57. na 55
58. na 59

Kutoka Kiajemi

59. na 3
60. na 31
61. na 32
62. na 55
63. na 76
64. na 78

Maneno Ya Báb

Kutoka Hotuba Yake Kwa Herufi Za Walio Hai (b-1) Wana-Mapambazuko, Uk.92

Mateuzi Kutoka Maandiko Ya Báb

(b-2) - uk
(b-3) - uk
(b-4) - uk
(b-5) - uk
(b-6) - uk

(b-7) - uk
(b-8) - uk
(b-9) - uk
(b-10) - uk

Maneno Ya ‘Abdu’l-Bahá Kutoka Mazungumzo Ya Paris (Hekima Ya ‘Abdu’l-Bahá)

(A-46) uk
(A-47) uk
(A-48) uk
(A-49) uk
(A-50) uk

(A-51) uk
(A-52) uk
(A-53) uk
(A-54) uk

**Mateuzi Kutoka Maandiko
Ya ‘Abdu’l-Bahá**

(A-55) uk
(A-56) uk
(A-57) uk
(A-58) uk
(A-59) uk
(A-60) uk
(A-61) uk
(A-62) uk
(A-63) uk
(A-64) uk

(A-65) uk
(A-66) uk
(A-67) uk
(A-68) uk
(A-69) uk
(A-70) uk
(A-71) uk
(A-72) uk
(A-73) uk
(A-74) uk

